

WANT

32 pes

Namba 1,334

Wik i stat long Fonde Januari 20, 2000

70t

**Ol soldia
mas lukaut
long straik**

pes 2

**Taim nogut
bai kisim
PNG**

pes 3



pes 4

**Stori
bilong
disebel man**

pes 21

**Tok
pilal
wantaim
Kanage**



pes 25 na 26

Dusava lusim sia bilong IPA Menesing Dairekta

WENCESLAUS MAGUN i raitim

BIHAIN long planti toktok i kamap long nius long pasin Minista bilong Trade na Industry, Michael Nali i mekim bilong makim wanpela strongpela sapota bilong PPP, Gabriel Dusava olsem Menesing Dairekta bilong Invesmen Promosen Atoriti (IPA) long las wik Fraide, Mista Nali i rausim em bek na toksave olsem IPA bai edvetaisim dispela posisen long ol arapela lain i ken aplai na kisim.

Mista Dusava i no sainim wanpela kontrak bilong kisim dispela posisen na tu em i no bin go kisim dispela opis inap aste taim em i lusim dispela wok. Em i lusim dispela wok na i no kisim wanpela pinis pe tu long wanem em i no sainim wanpela kontrak.

Wantok i traim long kisim Siaman bilong IPA, Valentine Kambori long Lae bilong kisim sampela toktok bilong em tasol i no bin inap long wanem em i lusim Lae na i kam long Mosbi.

Tasol ol ripot i kam long Wantok long dispela wik i soim olsem Mista Nali i no

bin harim tok bilong Sief Ombudsmen Komisina Simon G Pentanu long namba wan taim, bilong noken makim Mista Dusava long dispela posisen.

Insait long wanpela pas Mista Pentanu i salim i go long Mista Nali long 13 Desemba 1997, we em i bin kisim long 26 Januari 1998, Mista Pentanu i edvaisim Mista Nali long noken makim Mista Dusava long wanpela posisen bilong wanpela sinia publik opis olsem het bilong wanpela dipatmen, het bilong wanpela statutori oge-naisesen, het bilong wanpela ovasis misin, kamap wanpela edvaisa o konsalten o kisim wok insait long opis bilong wanpela ministia.

Mista Pentanu i tok: "My view is that it would be offensive to the spirit of the Constitution and in particular the Leadership Code to appoint a person who has been dismissed from office to another public office within the three year disqualification period."

Dispela tok i min olsem Mista Pentanu i bin edvaisim Mista Nali long noken makim Mista Dusava long kisim wanpela publik opis long wanem sapos

Mista Nali i go het na mekim em bai bagarapim spirit bilong Konstitusen na Lidasp Kod.

Ombudsmen Komisina i bin painim aut olsem Mista Dusava i bin mekim sampela bikpela asua we i brukim Lidasp Kod taim em i bin mekim wok olsem Seketeri bilong Foren Afeas Dipatmen namel long 1991 na 1993.

Long dispela as kot i bin painim olsem em i asua na i rausim Mista Dusava long Oktoba 1997 taim em i bin winim sia bilong Yangoru Sausia Open Ilektoet na i go long palamen.

Mista Nali i tok em i bin makim Mista Dusava long kisim dispela posisen bihain long em i skelim olgeta gupela pasin na pasin nogut bilong Mista Dusava.

Tasol em i ting olsem Mista Dusava i gat planti ekspiens na i gat save bilong mekim kain wok. Em i tok tu olsem em i laikim wanpela man i mas kisim wok bilong Menesing Dairekta bilong IPA kwik long wanem dispela opis i stap nating longpela taim na i mekim wok bilong IPA i no ron gut.



• Gabriel Dusava.

Wanpela Kwik Mani Bisnis i laik pasim bisnis

... "Bai arapela tu i bihainim em"

**YAKAM KELO na IAN
KAKARERE i raitim**

Wanpela bilong ol dispela Kwik Mani Bisnis kampani insait long PNG bai bruk daun olsem na em i wok long tok-tok wantaim ol man bilong pinisim bisnis bikos ol i sot long mani (liquidation). Tingting i stap tu olsem ol narapela Kwik Mani kampani bai bruk daun tu taim dispela Kwik Mani Bisnis i pinis wok, Gavana bilong Sentrel Beng (Beng ov Papua Niugini) Wilson Kamit i tokaut.

Olsem na Mista Wilson i tokat olsem Beng bilong Papua Niugini o Sentrel Beng bai no inap long bekim mani ol manmeri i gat wantaim ol dispela Kwik Mani Bisnis o bai i no inap kisim toktok o mekim wanpela samting long dispela. Dispela em sanap bilong beng. Em i no tokaut long nem bilong dispela Kwik Mani Bisnis.

Mista Kamit i tok taim beng i luksave long ol dispela Kwik Mani Bisnis i stat, beng i bin tokaut strong long ol pipel i noken putim mani i go insait long ol dis-

pela kwik mani bisnis.

Em i tok klia long dispela tingting bilong em wantaim planti toksave na edvetismen long ol niuspepa na salim tok lukaut i go long ol manmeri long noken putim mani nating i go insait long ol dispela lain bikos beng i save olsem dispela kain samting bilong kamapim mani hariap bai bruk daun na olgeta manmeri bai lusim mani bilong ol.

Mista Kamit i tok nau yet ol dispela Kwik Mani Bisnis lain i nogat mani na bai ol i no inap peim bek ol manmeri husat i putim mani pinis.

Em i tok long Septemba 10 na 15 las yia beng i bin givim pas i go long ol dispela Kwik Mani Skim na askim ol long givim beng olgeta rekot na narapela toktok long hau ol i mekim wok bilong ol. Na long wankain taim tu beng i bin askim ol kwik mani skim long peim bek olgeta manmeri husat i gat mani wantaim ol.

Mista Kamit i tok beng i bin givim strongpela askim long mun Septemba na Oktoba las yia na putim long nius-

pepa tasol ol Kwik Mani Bisnis lain i no bin harim tok bilong beng na i no bin peim ol manmeri yet.

Em i tok wei ol dispela kwik mani skim i stat, ol bin nogat mani stret long peim bek win mani long ol man, ol i kisim tasol mani bilong narapela na givim i go long narapela man olsem win mani.

Mista Kamit i tok ol dispela Kwik Mani Skim i poket bruk olgeta na ol i nogat mani long peim bek ol manmeri. Ol brukim lo na kisim nating mani bilong ol manmeri na manmeri husat i putim mani i go insait i no inap kisim mani bilong ol nau.

Mista Kamit tok Sentrel Beng i tingting strong long sanapim ol dispela Kwik Mani kampani long kot.

Mista Kamit i tok beng i laik toksave olsem beng o gavman bilong Papua Niugini i no inap long givim tok orait long helpim ol dispela kwik mani bisnis kampani o helpim long peim bek mani bilong ol manmeri. Em i tok tu olsem ol i no inap helpim ol manmeri long kisim dispela mani bilong ol bek.



**Ol mama lusim wok
long lukautim bebi**

PLANTI ol mama i wok long lusim susu o redi long stap bilong ol yet. Taim ol i mekim olsem ol i liklik olsem pikinini i kisim skun gut na tu ol i gro gut. Dispela piksa i soim Jerry Yapa wantaim mama bilong em Lina i sanap long kisim piksa. Mama bilong Jerry Lina i tok em i amamas long lusim wok na lukautim pikinini inap em i redi long go bek long wok. Planti taim ol mama i save hariap long go bek long wok na ol pikinini i no save kamap gut. *Poto: Joe Kanekane.*

PLIS RIPOT

Pot Mosbi: Plis i stapim ol lain Saina long kisim bodi bilong tupela manmeri husat i dai long han bilong ol birua i go long paliamen haus bipo long ol i salim tupela i go bek long Saina. Plis i tok ol bai kalabusim ol Saina man husat i go pas long dispela samting sapos ol i karim bodi raun long Pot Mosbi siti. Ol man bilong Saina long Mosbi i askim plis long painim aut na kalabusim dispela ol lain husat i kilim i dai tupela manmeri insait long wanpela taka-sop long 3-mail haus sik las wik.

Plis i sasim Mejo Walter Enuma long dispela wik bihainim wanpela tok olsem em i bin ronawe long kalabus long taim bilong Operesen Rausim Kwik long mun Julai 1997. Ol plis long Boroko i holim pasim em na kisim pinga prin na arapela ripot na lusim taim em baim K200 beil mani.

Lae: Wanpela yangpela man i dai na narapela 6-ya mangi i pait hat long Angau Jeneral Haus sik bihain wanpela birua i bin kamap taim wanpela semi-trella trak i no inap long kisim brek na lusim rot i go bamim tupela. Ol lain long ples i belhat long dispela na kukim ka tasol draiva i pret long laip bilong em na em i ronawe.

Wanpela man bilong Morobe i go kalabus inap long 3-pela krismas bihain long plis i painim aut olsem em i planim mariwana. Taim ol plis bungim em, em bin gat 21 bikpela mariwana diwai na planti liklik neseri boks i stap wantaim em. Wankain pasin i bin kamap long tupela marit bilong Siasi taim tupela i wokim wankain pasin sampela taim i go pinis.

Ol plis man bilong Bumbu bareks i no save bihainim lo bilong bareks na kisim ol kankain manmeri i kam slip na stap nating long bareks. Ol plis manmeri yet i no bihainim dispela lo we opis i putim i go antap bilong ol long bihainim.

Madang: Plis ripot long Madang i tok paia i bagarapim 21 haus long Bulfo viles insait long Treng-Gogol eria. 14 famili i nogat haus slip na olgeta samting bilong ol i bagarap long paia. Dispela i kamap bihain long wanpela kros namel long ol man bilong Fulum viles long wanpela pait i bin kamap long kot bilong graun.

Olgeta plismammeri insait long Morobe na Madang i tok ol bai risain long plis Asosiesen sapos presiden Aloysius Eviaisa i no lusim wok ol presiden bilong plis Asosiesen. Dispela singaut i kamap bihain long ol plis i kisim promosen sampela wik i go pinis na ol i ting Mista Aloysius bai i no inap makim maus bilong ol gut.

Mendi: 3-pela man i dai pinis na planti haus na bisnis i pala pinis insait long wanpela bikpela rabel pait namel long ol lain Ujamp na Wogia insait long Mendi. Ol man i yusim ol strongpela gan bilong ol ami long kilim narapela narapela. Plis i tok i hat tru long ol i stapim pait bikos ol i pret long kisim bagarap long ol dispela strongpela gan ol paitman ui yusim. Planti haus i paia na tu olgeta meri pikinini i ronawe nabaut na slip wantaim wantaok o long bus.

Ripot i kam olsem long Tari i tok ol plisman insait long Tari i no mekim gut wok bilong ol. Ol i stap tasol na planti raskol pasin i wok long kama long ol man husat i ron long ol rot na insait long Tari stesin tu. Dispela singaut i kam bihain long ol i stilim tupela ka bilong Gijira Developmen Koporesen i lus long han bilong ol stilman.

Ol ami husat bikhet bai raus, Malpo tok

PEKU PILIMBO i raitim

BIKPELA tok lukaut i go aut pinis long olgeta komanda bilong ami insait long wanwan bareks insait long Papua Niugini olsem ol bai raus long ami sapos ol i bikhet na i no harim tok.

Dispela toktok i kam long Ekting Komanda bilong PNG Difens Fos Brigadia Jeneral Carl Malpo insait long wanpela bung aste long Murray Bareks.

Jeneral Malpo i tok kantri i nogat gutpela ami bikos long pasin ol i mekim long stap wok na askim gavman long kisim moa pe na narapela ol samting insait long wanpela askim ol ami givim long difens kansel las wik.

Em i tok ol ami i nogat pasin bilong harim tok na bihainim ol komanding ofisa bilong ol na dispela i mekim nem bilong ami kamap nogut.

Planti paul pasin i kamap long difens fos na sekuriti bilong kantri i no stap long wanpela gutpela posisen.

Em i tok sapos ol ami nating i bikhet, dispela i soim olsem ol komanda bilong ol long wanwan bareks i no fit na ino givim gutpela skul bilong harim tok.

Em i tok: "Taim ol soldia i kirap singaut nabaut, dispela i minim wanpela samting tasol na dispela samting em olsem ol kamanda bilong ol i no fit long bosim na lukautim ol. Pasin bilong givim aut oda na kontrolim ol man insait long ami i slek olgeta."

Em i tok i gat rot o sen long bihainim insait long ami sapos ol wokman i gat sampela wari na laik tokaut.

We i bilong autim dispela wari i mas stat long ol ami nating i go antap long kopol na ol arapela ofisa pastaim long em i kamap long bikpela ofis tasol dispela pasin i no bin kamap long las wik.

Em i tok olsem toksave mas i go long

olgeta man long dispela pasin tasol komanda bilong wanwan ples i no bin karim aut dispela wok bilong ol.

Difens Kansel bai mekim save long husat man i no mekim wok gut insait long ami na laik kamapim trabel na bikhet planti.

Jeneral Malpo tok: "Man husat ino harim tok, dispela man i nogat ples insait long ami. Ol dispela kain man bai mipela i rausim ol tasol."

Em i tok taim em i kamap olsem ekting kamanda bilong ami 6-pela mun i go pinis, em i lukim dispela pasin bilong i no harim tok i stap insait long ami na nau bai em i kamapim ol strongpela lo bai ol ami i ken bihainim na harim tok.

Wanpela opisal pepa bai go long olgeta komanda bilong ami insait long kantri olsem ol sinia ofisa husat i no mekim wok bilong ol gut bai i mas lusim wok wantaim ami na go.

Em i kros long ol ami husat i singaut long moa pe long wik i go pinis na tok "dispela em wanem kain ami yumi gat?"


Olgeta ami i mas tingting long wok bilong ol long sevim dispela kantri na long mekim dispela wok, olgeta ami i mas harim tok na strongim wok ol i gat.

Planti wok painim aut ol ami i karim aut long samting olsem gan na narapela samting i no kamap ples kila yet bikos planti bilong ol ofisa i no mekim wok bilong ol gut.

Jeneral Malpo i tok: "Wanem kain singaut pasin bai stap stat long nau (aste) insait long difens fos."

"Yumi ol lain bilong harim tok na bihainim, i no olsem ol narapela dipatmen. I nogat ples bilong man i laik kamapim yunior wok o wan hauslain pasin."

Em i tok ol ami i mas hamamas long yunior ol werim na noken pretim ol manmeri husat i givim takis mani bilong ol bilong sapatim ol ami. Em i askim hau yu



• Ekting Komanda bilong PNG Difens Fos Brigadia Jeneral Carl Malpo.

inap pretim man husat i givim kaikai na mani long yu.

Em i tok sapos bihain i gat sampela trabel o pasin bilong i no harim tok i kamap, ol komanda mas kisim ol wari na karim i kam long bikpela ofis na i no olgeta ami i mas na kam stret. Em i askim ol komanda long bihainim rot stret.

Em i tok tu olsem dispela pasin bilong i no harim tok i bin kamap 10 o 15 yia i go pinis na wok long kamap bikpela insait long ol dispela yia na nau i stap yet. Dispela pasin i kamap bikos planti senis i wok long kamap klostu klostu insait long menesmen bilong ami na ol dipatmen bilong em.

Jeneral Malpo i tok Difens Kansel i miting pinis las wik na disisen i stap pinis long han bilong kansel na ol bai givim aut dispela toksave i go long ol ami nau (tude). Dispela disisen em long bekim bilong askim ol ami i bin givim i go long Minista bilong Difens Muki Taranupi na Sekreteri Vari Fore las wik.

Em i tok ol komanda i no ken stap raun nating wantaim ol ami na tingting long kisim sapat bilong ol. Ol komanda i mas sanap strong long wok bilong ol olsem ofisa na tokok strong tasol mekim gutpela pasin long olgeta ami.

Ol Remand Senta na ol Juvenile Institusen nogat mani

WENCESLAUS MAGUN i raitim

OL Remand Senta long kantri i nogat mani bilong lukautim ol pikinini krismas bilong ol i stap aninit long 7 yia na tu ol yangpela mangi na meri krismas bilong ol i winim 7 yia na i go antap long 17 yia, long wanem Gavman i no moa skelim mani long lukautim ol dispela senta.

Aninit long Seksen 50 bilong ol Juvenile Institusen, ol Remand Senta i gat wok bilong lukautim na holim pas ol pikinini krismas bilong ol i stap aninit long 7 yia bihainim Seksen 20 (1) (d) o wanpela juvenile aninit long Seksen 21 (2) (b) o wetim wanpela ples bilong go kalabus o wet ong kamap long wanpela kot o stap inap lo i kamap wantaim disisen bilong mekim wanem samting long laip bilong dispela mangi o meri aninit long Seksen 30 (8).

Aninit long Mama Lo bilong Papua Niugini, Gavman i givim tok orait long kamapim ol juvenile seksen bilong wanpela koreksenel institusen, wanpela juvenile institusen o wanpela remand senta.

Dispela ol institusen i gat tupela wok long mekim. Ol i ken stap olsem wanpela Juvenile Institusen we mejistret i ken salim ol juveniles i go stap long en bihain long kot i painim aut olsem ol i brukim sampela lo na long wankain taim ol i ken go stap long wanpela remand senta.

Ol dispela institusen i gat wok tu bilong



• Ol Sekred Hat Bruda sanap ausait long Hohola Remand Senta.

kisim na lukautim ol remandees.

Namba Tu bos bilong Kongrigesen bilong ol Sacred Heart Brothers, Adolph Raio na bos bilong Hohola Remand Senta, Bruda Patrick Bokorum i tokaut long dispela hevi.

Tupela bruda i tok Gavman yet i givim tok orait na i putim nem bilong Hohola Remand Senta, Wewak na Erap Boys taun wantaim ol arapela Remand Senta insait long Nesenel Gaset long 1992.

Long dispela taim i kam inap nau na i go inap long wanem taim Gavman i rausim dispela lo, Gavman i gat bikpela wok long lukautim ol Remand Senta na ol Juvenile

Institusen. Tupela i tok Minista bilong Jastis na ministri bilong em i gat bikpela wok long glasim hevi bilong ol Remand Senta na ol Juvenile Institusen na painim aut watpo ol i no kisim olgeta mani bilong ol stat long 1997 i kam inap long dispela yia 2000.

Tupela bruda i sutim tok long Gavman long yusim mani bilong ol Remand Senta na ol Juvenile Senta long mekim ol arapela wok sapos Gavman i bin skelim mani pinis. Na sapos nogat, ol laik save mani i stap we bilong lukautim ol Remand Senta na ol Juvenile Senta.

Tupela i tok planti taim ol i go long Gavman na askim long mani bilong lukautim ol Remand Senta tasol oltaim ol i save kisim bekim olsem "Nogat mani".

Tupela bruda ya i tok nau long dispela taim ol i no inap long karim aut wok bilong ol olsem Mama Lo bilong kantri i tokim ol long mekim bikos ol i nogat mani.

Tupela bruda i tok i no long taim i go pinis long dispela yia, Dairekta bilong Child Welfare, Joseph Sukwianomb i tokaut olsem haus kalabus bilong ol juvenile i pulap tru long ol kalabus na i no gat gutpela rehabilitation program.

Tupela i tok sapos gavman i wari tru long lo na oda hevi, gavman i mas skelim mani long ol Remand Senta na ol Juvenile Institusen.

WANTOK

All departments. Phone: 325 2500 • Fax: 325 2579
P.O. Box 1982, Boroko, NCD, Papua New Guinea

Publishing Weekly, Thursday, for Word Publishing Company Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Ltd.

General Manager and Group Editor in Chief: Anna Solomon.	Papers distributed by air throughout PNG. Available by air mail subscription within Papua New Guinea and overseas.
Acting Advertising Manager: Joeko Oberleuter	Email address: word@global.net.pg
Editor of Wantok: Yakam Kelo.	

Word Publishing Company Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd. and are set out in full on the reverse side of its official display Advertising Bookings form.

Wari bilong ol helt woka i bikipela nau

IAN KAKARERE i raitim

OL komyuniti helt woka bai holim bikipela straik sapos ol hevi bilong ol long potnait pe na haus bilong slip wantaim ol arapela wari bilong ol i no kamap gut.

Nesanel presiden bilong Komyuniti Helt Wokas Asosiesen (CHWA) James Amuna i askim Dipatmen bilong Pesenel Menesmen (DPM) na Nesanel dipatmen bilong Helt long stretim dispela hevi bilong ol tude, Fonde Januari 20, 2000.

Namba wan hevi bilong ol helt woka wantaim DPM em long hadsip, yunifom, on kol na haia diuti alawens. Na namba tu em long haus bilong slip na wok.

Mista Amuna i tok em wantaim jenerel sekreteri bilong asosiesen Jack Suao i bin bungim wantaim ol bikman bilong Pesenel Menesmen dipatmen (DPM) long Desemba 3 las yia long stretim ol bikipela hevi we i stap long namba wan hevi bilong ol. Na DPM i tok ol bai kam bek wantaim sampela bekim long dispela askim bilong helt wokas asosiesen. Tasol inap nau nogat wanpela bekim i kam long DPM.

Mista Amuna i tok hevi bilong haus long slip na wok em bikipela wari bilong em wantaim ol asosiesen memba na ol i gat dispela bikipela hevi i stap wantaim ol i kam nau. Hau slip bilong ol i no gutpela tru long ol asples o ruel eria na tu long ol taun eria wantaim.

Mista Amuna i tok gavman i no ken tingting tasol long stretim gut ol haus sik na ol samting bilong mekim wok. Gavman i mas luikduk tu long wok na sindaun bilong ol wokman husat bai mekim long haus sik. Planti bilong ol i nogat haus na i save slip wantaim ol wantok na planti i stap nambaut long ol setelmen long ol taun na siti. Wanwan i laki long stap long haus bilong haus sik yet long kompau.

Ol helt woka i save kilim skin tru long mekim wok bilong sevim pablik na amamasim ol bos na gavman. Tasol sindaun bilong ol yet i no gutpela tru na ol i save karim dispela wari olgeta taim na wok wantaim, Mista Amuna i tok.

Em i tok ol helt woka long ol distrik na ruel eria i save slip long ol kopra haus we ol waitman i bin wokim long taim bilong Australia gavman long bipo. Ol dispela kopra haus i stap yet olsem na ol helt woka i save mekim nating long ol.

Ol i save stap tu long ol bus haus tasol ol i wok long kilim skin yet long sevim komyuniti long givim marasin na sevim ol sikmanmeri long ples. Planti bilong ol i save yusim mani bilong ol yet long traim stretim haus bilong ol i kamap gutpela bai ol wantaim famili i ken stap gut long em na mekim wok i go, Mista Amuna i tok.

Taim nogut bai kisim PNG

YAKAM KELO i raitim

Taim bilong drai na hai wara bai kamap long ol provins long Papua Niugini, Nesanel Weda Sevis opis i tokaut long dispela wik.


Dairekta Jenerel bilong Nesanel Disasta Menesmen Opis Ludwick Kembu i tokaut long dispela ripot bilong Nesanel Weda Sevis (NWS) olsem sampela provins nau i wok long gat drai taim na ren taim we i no wankain olsem ol i save bungim bipo.

Ripot long Is Nu Briten provins i tok olsem ol i wok long bungim drai taim we i narakain long bipo na tu long Westen provins (Not Flai) i gat luksave olsem levul bilong wara i wok long kam antap hap bilong leik Mari Distrik.

Nesanel Weda Sevis (NWS) long Mosbi i givim dispela tok luksave olsem LA Nina kondisen (senis long win) i kamapim dispela senis long taim bilong san, win na ren na ol samting. PNG i no save bungim kain senis olsem. NWS i no laik kamapim pret na kirap nogut long ol manmeri tasol ol i laik mekim toksave olsem long mak we ol pipel i ken kisim sampela kain save long ol senis we inap kamap.

NWS opis i tokaut tu olsem ol i luksave olsem sampela hap bilong Papua Niugini bai bungim bikipela taim bilong ren we bai i abrusim mak bilong ren ol i save kisim olgeta taim. Dispela bikipela ren bai pundaun

long mun Februari inap mun Mas. Provins we bai bungim hevi long hai wara na dispela bikipela ren em long Flai Riva long Westen provins na Inlen eria bilong Saut Kos. Ol namel provins olsem Manus, Nu Ailan,



• Bungim ol plastik samting em wanpela wok bilong kisim 20 toea. Ol manki long piksa i bungim ol plastik long go salim. Planti lain tu i mekim dispela.

ol Sepik provins na hap bilong Madang, Wes Nu Briten, Bogenvil, Morobe na Hailans bai bungim bikipela taim bilong ren tu. Ren bai pundaun bikipela moa abrusim mak em i save pundaun long oltaim. Sampela hap bilong Nu Ailan na Wes Nu Briten provins bai bungim bikipela taim bilong drai (bai nogat ren longpela taim) long dispela taim tu.

Dispela senis long we bai i kamap long taim bilong ren na taim bilong drai bai i stap inap long mun Me long dispela yia. Nesanel Weda Sevis ripot i tok.

Ripot i tok ol pipel inap bungim ol hevi long kaikai, wara saplai, ol hap bilong slip na stap gut na ol sik inap kamap. Olsem na ol manmeri long komyuniti i mas kisim save long dispela kain hevi na redim ol yet long wanem samting ol inap mekim long abrusim ol hevi we inap kamap, ripot i tok.

Dispela toksave em Nesanel Weda Sevis opis i salim pinis long olgeta Provinsal Disasta Kodinesen opis long redim ol yet wantaim ol plen bilong karimaut sapos bikipela taim bilong drai na ren i kamap.

Ripot i tok ol plen i mas karamapim ol samting olsem:

- toksave long ol manmeri insait long komyuniti, toksave long nius na tu long ol wok ples.
 - Bungim ol kaikai.
 - Stretim na bungim gut wara long ol ples na ol gavman stesin.
 - Long hap we wara i save ron na tait i save kam, traim surukim haus i go antap liklik long dispela taim.
 - Dipatmen bilong Helt long ol provins na distrik i mas bungim gut ol marasin saplai long sait bilong sik malaria na ol kain kain sik na bagarap long skin na arapela sik moa.
 - Ol pipel i mas bihainim ol pasin ol i gat long ples bilong ol long traim daunim bagarap bilong ol dispela taim nogut long i noken winim ol.
 - Pasin bilong komyuniti sapot wok i mas go strong.
 - Sampela kain isi rot i mas kamap long sapotim pasin ol ples manmeri i gat na komyuniti plen long traim abrusim ol hevi we inap kamap long dispela taim nogut.
- Ludwick Kembu Dairekta Jenerel bilong Nesanel Disasta Menesmen Opis i askim ol Provinsal Disasta Komiti na ol Distrik Disasta Komiti long statim wanpela liklik wok grup long traim skelim ol samting nau na stat karimaut sampela ol toktok we i stap antap.

Sir Mekere mas rausim Nali, Reveren Euling i tok

WENCESLAUS MAGUN i raitim

BOS bilong Melanesian Environment Foundation, Reveren George Euling i salensim Prait Minista Sir Mekere Morauta long rausim Trade na Industry Minista Michael Nali long Gavman bilong kisim bek gutpela nem.

Em i tok pasin Mista Nali i bin mekim pastaim long makim Gabriel Dusava olsem Menesing Dairekta bilong Invesmen Promoesen Atoriti (IPA) em i wanpela bilong ol kain disisen ol minista i save mekim we i save bagarapim gunem bilong Gavman na kantri.

Reveren Euling i tok, hevi Mista Dusava i bin mekim bilong brukim lo aninit long Lidasp Kod long taim em bin mekim wok olsem Foren Afeas Seketeri i no wanpela

tok win. Dispela hevi i bin kamap tru. Em i tok na pasin Mista Nali i bin mekim bilong go het na makim Mista Dusava long holim wanpela pablik opis em i kamapim planti tingting olsem: "Mista Nali i laik go het na bagarapim gutpela nem bilong Prait Minista Sir Mekere Morauta na Gavman bilong em bilong winim bek bilip bilong ol pipel."


Reveren Euling i tok Sir Mekere i mas sanap long toktok bilong em na rausim Mista Nali sapos em i laik winim bek bilip bilong ol pipel.

Em i tok olgeta pablik opis em opis bilong ol pipel. Na ol minista husat i makim wanpela man o meri long holim dispela ol pablik opis i mas makim ol dispela lain wantaim gutpela tingting na bihainim lo. Reveren Euling i tok pasin Mista Nali i bin mekim i soim ples klia olsem em i nogat gutpela tingting na tu i no redi long harim

krai bilong ol pipel inap planti toktok i bin kamap long ol niuspepa, radio na televisen olsem disisen bilong em i no gutpela.

Long dispela as, Reveren Euling i tok Sir Mekere i mas rausim Mista Nali. Em i tok Gavman bilong Sir Mekere i bin winim bel bilong planti ol pipel bilong PNG na tu ol gavman long ol arapela kantri taim ol i bin kisim pawa inap taim Mista Nali i bin mekim dispela disisen.

Em i tok dispela kain disisen nau i kirapim kain kain tingting long ol pipel long lumim bilip long Gavman bilong Sir Mekere. Em i tok tu olsem nogat wanpela pablik opis em i bilong wanpela politikel pati. Na olsem PPP i nogat rait long makim wanpela strongpela sapota bilong ol long kisim dispela opis.



• Reveren George Euling.

T
O
R
O

TORO I LUKIM PIKSA BILONG MR. BEAN NA EM LAIK BIHAINIM STAIL BILONG EM!!!

RAIT OLGETA!

NA TORO GO LONG WANPELA HARDWE STUA NA BAIM OL RAGO BILONG HAUS!!!

BAI GO YET YAH!

NAU EM BIHAINIM STAIL BILONG MR. BEAN STRET!!!

EM I GO GUT... TASOL LONG FRI-WEI BILONG HANUABA A, EM KISIM TAIM STRET!!!

HELPPP!!! AAAHH!!!

FORER FREE

Arawa gat Susa skul long Nu Silan

ARAWA Hai Skul long Sentrel Bogenvil i gat tupela susa skul long Nu Silan we ol i helpim ol wantaim ol sampela samting bilong yusim long skul.

Tupela skul em long Orewa na Aranui. Wanpela skul tisa long Arawa Hai Skul, Anita Salas i bin tokim Wantok niuspapa olsem ol i kamap wantaim dispela arenjimen bihainim wok-abaut bilong sampela hai skul tisa bilong Nu Silan i go long ol skul long Bogenvil long Desemba 1998.

Long dispela taim 12-pela prinsipel bilong sampela hai skul long Nu Silan i bin lukiuk raun i go long ol hai skul long Buka, Arawa, Buin na Sitwai na toktok wantaim ol hetmasta na ol arapela storiti long skul bilong kism ol save long ol samting we ol atai i laikim. Na planti i bin tok ol i sot long ol teks buk, ol samting bilong ol sumatin na ol tisa long yusim long rail long en na tu ol riding metrirel.

Misis Salas i tok long las yia, tupela skul i bin salim ol buk na megesin bilong ol sumatin na ol tisa long ridin na dispela i helpim skruim save bilong ol long ol samting i kamap long ausait wol.

Em i tok skul i save sot long ol teks na kurikulum buk long yusim long Mats, Saiens, Inglis na olgeta arapela sabjek.

Arawa hai Skul long las yia i bin gat 508 sumatin na 13-pela tisa tasol. Bikos ol i sot long ol klasrum, ol bin save holim ol klas long sif we namba wan grup i statim skul long 7 kilok na pinis long belotaim 12 kilok na namba tu grup i skul long 12-belotaim na pinis long 5.10 apinun.

Misis Salas i tok ol sem tisa i skulim tupela grup ya na dispela i save givim bikpela wok. Tasol ol i sot long ol tisa na ol nogat narapela rot long bihainim na ol i bin skruim wok tasol i go olsem.

Kongres laikim gavman i surukim taim bilong ol Bogenvil toktok

BOGENVIL Pipels Kongres (BPC) i laikim bai gavman i surukim deit bilong holim namba tu raun bilong ol toktok namel long ol na ol Bogenvil lida i go long namel bilong mun i kam.

Ol toktok bai kamap long Arawa long Januari 24 na pinis long de namba 28.

BPC Presiden Joseph Kabui i mekim dispela singaut bikos Kongres i lukim olsem Nesanel Gavman i no redi long politikel pekej we em bai prisanim long ol Bogenvil pipel long dispela raun bilong ol toktok.

"Bihainim ol toktok we mipela i kism, i luk olsem PNG i no redi wantaim politikel pekej long bekim dispela we

mipela i bin prisanim long han bilong Sir Michael Somare na delegesen long namba wan raun bilong ol toktok long Desemba 14 long Hutjena. Olsem na mipela i bilip i moa-beta long surukim taim bilong namba tu raun bilong toktok i go long namel bilong mun i kam.

"Ol agrimen we bai i kamap long ol dispela bikpela samting bai stapim ol hevi i poudaun

long nesanel gavman," Mista Kabui i tok long dispela wik.

Em i tok wanpela rot tasol long kirapim gavman long Bogenvil em rot bilong sindaun na toktok wantaim na kamap wantaim ol samting we olgeta grup bai wanbel long en.

Em i tok ol ol mas noken lukim ol arapela arenjimen we ol i wok long en bihainim Suprim Kot disisen olsem rot we i pasim ol negosiesen long bihain taim (politikel setelmen)

bilong Bogenvil. Em i tok ol pipel bai lusim dispela samting long han bilong Nesanel Gavman wantaim dispela interim gavman bilong larim ol sevis i go long ailan.

Mista Kabui i tok bikpela samting nau we ol Bogenvil lida long nesanel na provinsi level i laikim em long kism bekim ansa long politikel pakej we i sut long Bogenvil i kism moa paw, referendum vot na independens.

"Mipela i laikim Nesanel Gavman long prisanim dispela insait long namba tu raun bilong ol politikel toktok," Mista Kabui i tok.



Ol Elementeri skul tisa long Nu Ailan sindaun-long kos

MOA long 200 elementeri skul tisa long Nu Ailan provins i bin statim siks wik trening long dispela wik, Edukesen etvaisa Simon Pasingan i tok.

Em i tok narapela grup husat i pinisim trening bilong ol bai i greduet na kism ol setifiket pepa bilong ol tu.

Long taim bilong skul malolo, wan wan provins i wok long ranim ol kos bilong ol elementeri skul tisa bilong skruim save bilong ol long wok bikos planti bilong ol em ol i nogat trening long dispela wok pastaim. Na ol insevis na ol kain kos olsem i helpim ol gut tru long kism save long wok.

Mista Pasingan i tok ol dispela elementeri skul tisa husat bai greduet i pinisim 10-pela yunit na nau ol bai luksave long ol olsem ol registet elementeri skul tisa.

Em i amamas tu long Nu Ailan provins i bihainim na skruim gut ol nupela edukesen riform.

Provins i gat 19 top ap skul long dispela taim na ol bai opim foapela long dispela yia. Dispela em long Messi, Kabanut, Susurunga na Manga Pralmeri skul.

Mista Pasingan i tokol dispela skul bai i nidim ol nupela metrirel bilong yusim long ol wok bilong ol, moa yet ol teks buks bilong ol Gret 7 sumatin.

Em i tok wanpela metrirel opisa i kam pinis long Mosbi bilong stretim ol dispela samting wantaim Nesanel Edukesen dipatmen long Waigani.

Long posting bilong ol tisa, Mista Pasingan i tok Provinsi Edukesen Bod i bin sindaun long Desemba 29 na lukluk long ol skul we bai ol i putim ol wan wan tisa long wok long en na long dispela wik, ol bai pinisim na toksave long ol tisa long en.

Sentrel Bogenvil meri ronim ges haus long Arawa

WANTAIM ples i wok long kamap orait, ol meri long Bogenvil i laik stap insait tu long ol wok bilong kamapim developmen na gutpela sindaun bilong ol yet, ol famili na komyuniti.

Anita Salas husat i wanpela tisa long Arawa Hai Skul insait long Sentrel Bogenvil em i wanpela mama long graun we Arawa taun i stap long en.

Misis Salas wantaim famili na ol lenona meri i bung wantaim na ol i ranim tupela ges haus long Arawa taun we ol visita na husat moa i kam long Arawa i ken stap long en.

Ol i kolim ol long Pasifik Ges haus.

Misis Salas i tok ol i kirapim dispela liklik bisnis long ges haus long skruim ol sampela samting we ol i lukim olsem i ken helpim ol na famili na komyuniti. Pastaim tru ol i lukim olsem i gat nid long opim dispela kain bisnis na givim sans long ol visita ples bilong stap long en. Tu ol i talk givim sans long ol ges long kain kaikalk bilong ples. Namba tri samting

em long givim ol yangpela man-meri sans long trening long wok turisim na rot bilong lukautim ol ges.

Misis Salas i tok long K60 long wanpela nait, dispela i karamapim kaikai tu wantaim. Em i tok ol ges i save laikim tru ol stail kuk long ples we ol i kukim ol taro, banana, kaukau, na kumu na fis long kokonas milk.

Ol i save wokim tu mumu wantaim ol taro, kaukau na kumu. Ol i save kukim ol samting bihainim laik bilong ol ges.

Long givim gutpela tes long kaikai, ol i save kukim rais long kokonas milk, kukim pis na banana antap long pala.

Misis Salas i tok long dispela taim, ol Pis Monitoring Grup lain i rentim wanpela long ol ges haus we i gat tripela betrum long en.

Mani we ol i save kism i helpim ol meri long baim ol kaikai, ol woklain na ol arapela samting long ranim dispela tupela ges haus ya.

WANTOK

NIUSPEPA BILONG YUMI OL PAPUA NIUGINI STREET

P. O. Box 1982, Boroko
Telepon namba: 325 2500
Feks namba: 325 2579

PE BILONG WANPELA YIA 52 NIUSPEPA

PLES	AIR
PNG	K 68.00
Ostrelia na Nu Silan	US\$46.00
Esia Pasifik na Japan	US\$55.00
Amerika na Yurop	US\$95.00



Manus na Nu Ailan tisa kism gut malolo pe na balus tiket

OL TISA long Manus provins i bin laki long kism ol malolo pe na ol balus tiket long kism ol famili bilong ol i go long ples long pinis bilong 1999 skul yia.

Manus Provinsi Gavman i bin givim K71,000 long Provinsi Edukesen Divisen bipo ol gavman akaun i pas long pinis bilong yia na olsem divisen i bin inap long peim ol malolo pe na ol balus tiket long ol tisa na ol famili bilong ol.

Dispela mani tu i bin karamapim ol malolo pe we sampela tisa i no bin kism long las yia.

Provins Edukesen edvaisa Simeon Malai i tok olgeta tisa long provins i bin kism ol malolo pe tasol em no bin tok hamas tisa tru i stap long dispela lista.

Long ol arapela edukesen nius long provins, Mista Malai i tok Provinsi Edukesen Bod i bin bung long las wik long fainalaisim ol seleksen long ol sumatin i go long foapela hai skul long provins. Dispela i karamapim Papatilai Sekonderi Skul, nainpela top ap na tupela vokesenel senta.

Mista Malai i tok sampela paparama i no amamas long seleksen bilong

ol sumatin i go long Bundrahi Hai skul na dispela i bin wanpela long ol samting we Provinsi Edukesen Bod i bin lukiuk hat long em. Tasol em no bin tokaut long disisen we bod i bin mekim long en.

Long wankain taim tu, Nu Ailan provinsi gavman i bin peim K138,000 long karamapim ol malolo na tiket pe bilong ol tisa long provins. Long stat bilong las yia, em bin peim K40,000 tasol hevi long mani i sot i bin kamap yet na faipela tisa i bin sot long kism malolo pe na balus tiket bilong go long ples long en.

Provins Edukesen etvaisa Simon Pasingan i tok ol bai peim dispela faipela tisa husat i no bin kism malolo pe na balus tiket taim divisen i kism mani long dispela yia.

Em i tok em amamas long provinsi gavman long katim mani bilong peim ol malolo na tiket pe.

Em i tok divisen i bin sot tasol long peim faipela tisa bikos pe bilong baim ol balus tiket na VAT takis i bin go antap.

Ol nes long Sandaun i wetim toksave long straik

OL nes insait long Sandaun i redi tasol long kisim straik long taim ol i kisim toksave i kam long mama asosiesen bilong ol. Na ol lain husat i "fainensel mama" tasol bai i kisim dispela straik eksen. Brens Kaunsila bilong Vanimo Brens bilong Neses Asosiesen, Chris Pasmel, i tokim *Wantok* long dispela. Taim em i tokaut olsem bai Vanimo Jenerel Haus Sik i mas redi long bungim wanem kain ol hevi long lain bikpela namba bilong ol nes i wokabaut lusim ples bilong wok.

Long Mande taim Mista Fasmel i toktok wantaim *Wantok*, em i tokaut olsem moa long 36 fainensel memba bilong Neses Asosiesen long Vanimo Jenerel Haus Sik i wetim tasol toksave i kam long ol opisel bilong

Asosiesen na Dipatmen bilong Helt long kisim straik eksen.


"Ol mas husat i fainensel memba tasol long Vanimo Jenerel Haus Sik bai i lusim ples bilong ol long wok. Na Haus Sik bilong mipela i mas redi long bungim wanem ol hevi sapos ol nes na dokta i pulim dispela straik eksen i go longpela tumas. Na Vanimo bai bungim hevi bilong planti sikmanmeri na pikinini husat i save kisim marasin long Dapu Helt Senta nau i klos pinis. Dispela hevi bai i bungim 16 nes na dokta husat bai i stap wok taim planti long mipela bai i lusim ples bilong wok.

"Na bai i gutpela moa sapos taim dispela stap wok i stap yet i noken gat planti imejensi kes tumas. Bikos 16 nes ya bai bungim tru hevi long

sot long wokmanmeri, Chris Pasmel i tokim *Wantok* long Mande.

Ripot i kam long haus sik long Aitape i tok olsem ol nes na dokta long hap bai i ausait long dispela straik eksen PNG Neses Asosiesen i laik kisim. Tasol Helt Seketeri bilong Vanimo Daioses Mista Isidoh Nonori i tokaut olsem, husat nes o komyuniti helt woka i fainensel memba bilong PNG Nesen Asosiesen. Na ol i wok wantaim ol misin haus sik, ol tu inap long lusim ples bilong ol long wok taim dispela straik i kamap.

Wantok i kisim ripot olsem ol go pas bilong Vanimo Jenerel Haus Sik i stretim ol samting. Long redi long bungim wanem ol hevi bai kamap long taim planti ol nes i stap long straik.



• Plis long Wewak i sekim report long wanpela meri we i kamap long strit long las yia. Foto: FUZO PAUL.

Ombudsmen Komisin sekim Kumbakor yet

OMBUDSMEN Komisin i tokaut olsem ol i no kamap yet long mak bilong kotim Minista bilong Provinsal na Lokol Gavman Afeas Andrew Kumbakor. Ol i wok long mekim painimaut yet i go insait long ol toktok we i sutim tok long ol paul samting i kamap long opis bilong Minista Kumbakor, Ombudsmen Komisin ripot i tok olsem.

Ekting Sief Ombudsmen Komisina Ila Geno i tokaut olsem Mista Kumbakor i bin bung wantaim ol long dispela wik we Komisin i mekim klia long Mista Kumbakor long wok bilong ol insait long ripot nogut we i kamap long Minista Kumbakor.

Komisin i no kamap wantaim disisen yet long Mista Kumbakor bai i gat kot o nogat. Taim dispela disisen i kamap, Mista Kumbakor bai namba wan man long save, Mista Geno i tok.

Mista Geno i tok nau olsem Komisin i wok long karimaut wok painimaut i go insait long ol lida, ol lida i noken ting olsem ol i mekim sampela samting rong nau olsem na Komisin i sekim mi. Em i wok bilong Komisin long karimaut wok bilong em bihainim lo long sekim ol lida bilong PNG na wok bilong ol, Mista Geno i tok.

Mista Geno i tok em i mekim dispela toktok long bekim wanpela nius

ripot we i tok Ombudsmen Komisin wok long mekim wok isi isi tru long sekim ol ripot nogut bilong Mista Kumbakor long opis bilong em.

Dispela man husat i mekim komplem long Ombudsmen Komisin i mas sekim wok bilong Andrew Kumbakor em wanpela olupela wokman bilong Minista yet.

Mista Geno i tok Ombudsmen Komisin i kisim dispela komplem ol ripot bilong man ya na i wok long sekim ol rekot na wok painimaut i go insait long wok bilong Minista. Tasol ol bai tokaut bihain sapos ol wok painimaut bilong ol i soim olsem i gat ol rot na toktok i stap long kotim Mista Kumbakor o nogat.

Helpim grasrut woksop bai kamap long Is Sepik

Wanpela grasrut non gavman ogenaisesen ol i kolim Grasrut Pawa Mekim Kamap Program insait long Is Sepik provins bai holim wanpela tu wik kos stat long las wik bilong dispela mun Jenuari.

Dispela kos ol i kolim Ritrit 2000, Painim Nupela Rot Long Helpim Is Sepik na Papua Niugini Insait Long Nupela Milenum bai stat long Jenuari 24 na pinis long neks mun Februari 4, 2000. Kos ya bai kamap long olupela Boram Skul ov Nesing insait long Wewak taun.

Meri husat i go pas long ranim dispela kos na tu kodineta bilong Grasrut Pawa Mekim Kamap Program, Evangeline Kaima i tokim *Wantok* olsem astingting na dispela kos bai kamap em long helpim ol grasrut pipel long luksave long ol yet.

Em i tok Grasrut Pawa Mekim Kamap Program em i wanpela grasrut program we i lukluk long helpim ol kain lain olsem ol lain i drop aut long skul, ol lain we bisnis wok bilong ol i pundaun o

bagarap, ol lain husat i save sot long man olgeta taim, ol lain we famili bilong ol i bruk, ol lain husat i save hangamap long ol arapela lain olgeta taim na tu ol lain husat i gat o i bungim ol arapela kain hevi long sindaun na laip bilong ol.

Mis Kaima i tok ol grasrut pipel husat bai i stap insait long dispela kos bai lainim ol kain samting olsem, luksave long yu yet, kamap bos bilong yu yet, wanem kain ol risos istap long eria bilong yu, nid bilong famili, watpo na yu bungim hevi, rot bilong helpim yu yet na tu ol arapela samting moa.

Mis Kaima i tok Grasrut Pawa Mekim Kamap Program i holim pinis planti bilong dispela kain kos. Na dispela tu wik kos i namba wan kos bilong yia 2000.

Em i tok fi bilong stap insait long dispela tu wik kos em K200. Mis Kaima i tok husat grasrut man o meri i laik stap insait long dispela i ken go long Provinsel Yut Opis na lukim em.

Kago kalt ripot long Aitape i no tru

FELIX RAMRAM i raitim

RIPOT bilong kago kalt insait long Aitape i no tru na em wanpela giman ripot we i bagarapim tru gut nem bilong ol pipel bilong tripela ailan long nambis bilong Aitape long Sandaun provins, ol pipel i tokaut.

Ol pipel i singautim plis nau long go insait na mekim gutpela wok painimaut long ol trabel nau i stap bipo long sampela lain i lusim laip bilong ol.

Wanpela man long Aitape husat i no laik tokaut long nem bilong em i tok sapos plis long Aitape i bin mekim gutpela wok, bai plis inap long givim aut gutpela na stretpela ripot. Na i no dispela ripot ol i givim pinis we i bagapoaime nating gutnem bilong ol Aitape ailan pipel.

Bikman ya i tok trupela stori em wanpela lain man i mekim sampela kain wok long pasin tumbuna bilong ples we i egensim nara-

pela lain husat i gat kristen bilip.

Ol hevi nau i stap i stat long taim ol kristen bilip lain bilong wanpela long dispela tripela ailan i kari-maut ol wok redi long ol samting bilong selebretim Krismas na Nu Yia. Tasol narapela grup i egensim ol wantaim ol narapela tingting we i no sut bihainim ol Kristen bilip, bikman ya i tok.

Em i tok dispela hevi i stap bai i gutpela long ol lida bilong Aitape Katolik Misin na ol arapela kristen sios i ken kamap na bungim komyuniti bilong ailan husat dispela toktok i sut long ol. Na ol i ken stretim tingting bilong tupela grup ya na lukim ol i sikan na pinisim dispela hevi namel long ol yet.

Em i tok' tu olsem i gat lukaut i stap olsem sapos dispela i samting i no kamap bai i gat sampela lain i kisim lo i go long han bilong ol yet sapos wok bilong daunim dispela hevi i no kamap gut na stret.



BEEF CRACKERS



1 Gat Kik!
Morobeek
BEEF CRACKERS



HEPI BIRTHDAY

25% MORE

5 BISKETS INSIDE-1 FREE

IGAT kick!

Modereta Lowa lonsin United Sios redio program

WENCESLAUS MAGUN i raitim

MODERETA bilong United Sios (UC) long Papua Niugini, Reveren Samson Lowa i lonsin wanpela redio program bilong UC aste long Boroko UC haus lotu. Het tok bilong dispela program em "Stretim Famili Na Strongim Papua Niugini".

Reveren Lowa i tok dispela program bai kamap long Karai Sevis long olgeta Trinde nait stat long 8:10 i go pinis long 8:30.

Olsem na em i askim olgeta UC memba na ol pipel bilong Papua Niugini long putim ia long Karai Redio na harim ol toktok, kwaia singsing, drama pilai, na skul bilong God long dispela namba wan redio stesin bilong yumi.

Reveren Lowa i tok wanpela gutpela bilip man i bin sponsaim dispela program wantaim K1,500. Em i tok dispela mani inap helpim

UC long ronim dispela program inap long 10-pela wik.

Tasol em i tok maski Sios i nogat mani, em i bilip God bai givim Sios mani long ronim dispela program.

Reveren Lowa i tenkim tu menesmen bilong Karai Redio Stesin long givim UC tok orait bilong go het na ronim dispela redio program.

Long wankain taim ol bilip man meri na pikinini bilong UC i bin bung long beten na tingim ol misinari i bin kam long PNG 32 yia i go pinis na kirapim UC.

Ol bik man na meri husat i bin stap insait long dispela bung em Jenerel Seketeri bilong UC long PNG Demas Tongogo, Dairekta bilong Unity na International Mission -UC Australia Reveren Bill Fischer, UC Women Felosip Presiden Boio Oru, hetman bilong Boroko UC Gei Ilagi, wanpela UC pastor bilong PNG long Jemeka na Caymon Ailan, Reveren William Numa na ol lida bilong UC.



• Ol bik man na meri husat i bin stap insait long bung bilong lonsin UC Redio Program em long Jenerel Seketeri bilong UC Demas Tongogo, Dairekta bilong Unity na International Mission - UC Australia Reveren Bill Fischer, UC Women Fellowship Presiden Boio Oru na hetman bilong Boroko UC Gei Ilagi. Foto: Isaach.

Aitape Daiosis selebretim Jubili yia wantaim yut rali

ADAM ELLIOT i raitim

MOA long 350 yut bilong Aitape Dineri bai stat bung long Aitape long dispela Sarere bilong selebretim Jubili Yia 2000. Rali bai pinis long Sande Januari 23 wantaim wanpela Misa long 10 kilok long moning. Ol yut bai malolo long Sande na i ken stat long go bek long ples long Mande.

Astingting bilong dispela rali em "Tok I Kamap Man" na bai glasim wanpela bikpela toktok insait long laip bilong ol yut.

Dispela rali bai helpim ol yut long painim aut wanem wok ol Katolik yut inap long mekim na wok bilong Kraiss long laip bilong ol long dispela yia 2000.

Ol yut bai i kam long ol ples ausait long Daiosis bilong Aitape inap long Lumi, Yangkok, Nuku, na Aitape yet. Sampela bilong ol bai wokabaut inap long tripela de long kam stap insait long dispela bikpela yut rali.

"Long namba wan yia bilong redi, 1997, long yia bilong Jisas Kraiss em i sevia. Long 1998, yia bilong Holi Spirit, we ol bilip man na meri i selebretim wantaim wanpela bung long Vanimo. Long 1999, yia bilong God Papa, ol i redi long yia 2000 Jubili," Aitape Daiosis Katolik Yut Kodineta, Gerard Towun i tok.

Em i tok dispela program bai i gat wanpela Misa we Bisop bilong Aitape, Austen Crapp OFM bai go pas long mekim. Bihain long Misa bai i gat wok-sop bilong ol hevi i save kamap long

taim man o meri i dring bia na ol arapela strongpela dring na tu smokim o kisim ol drag olsem mariwana.

Em i tok ol ektiviti bai stat long 6 kilok moning wantaim kaikai na bai go pinis long 9 kilok nait wantaim ol drama na ol video program.

Mista Towun i tok dispela yut rali program bai i gat ol pilai, taim bilong harim tok na kisim skul long tok bilong God na tu ol arapela program bilong lotu.

Planti ol dispela program bai kamap long Aitape Hai Skul spot graun.



• Sampela yut bilong Aitape Dineri i selebretim Jubili Yia 2000.

Aitape Daiosis i putim mani long ronim dispela rali wantaim sampela mani i kam long ol yut bilong wan wan Katolik peris. Ol yut i bin bungim mani bilong dispela rali long las yia.

"Wan wan bilong ol 350 yut memba husat bai kamap long dispela yut rali i putim K10. Bisop bilong Aitape i givim K2500 na Minista bilong Provinsel na Lokol Level Gavman, Andrew Kumbakor i putim K5000 i go long ol Nuku yut. Mista Saweni i no bin helpim mipela," Mista Towun i tok.

ELCPNG holim 22 sinod long Hagen

PIUS MON i raitim

EVANJELIKOL Luteran Sios bilong Papua Niugini (ELCPNG) i holim namba 22 sinod long Hagen long dispela wik wantaim planti singsing na danis i kam long ol kain kain ples insait long kantri.

Dispela 22 sinod i stat long Sande long Banz na bai pinis long dispela Sande. Moa long 3000 pipel i bin kamap na stap insait long dispela sinod.

Dispela 22 sinod i tingim 70 yia bilong sios long kantri. Planti lain pipel i bin kam bung long harim na lukim ol samting i kamap long dispela sinod. Sinod bai pinis long dispela wik Sande.

Het Bisop bilong ELCPNG Dr Wesley Kigasung i tok dispela selebresen em bilong tenkim ol misinari bilong bipo na nau long olgeta hat wok ol i bin mekim long las 70 yia long kantri.

Dokta Kigasung i tok namba wan samting ol pipel bilong God i mas mekim em long tenkim Jisas Kraiss na ol misinari i kam pastaim tru taim na ol misinari i stap nau long hat

wok ol i save mekim.

Em i tok wok ol misinari i kam pas i statim em ol misinari bilong tude na ol bilip manmeri bai skruim i go het long dispela taim i go inap long pinis bilong dispela graun.

Dokta Kigasung i salensim tu ol arapela sios long wok bung wantaim Luteran Sios maski sapos pasin bilong lotu i no wankain long sios bilong ol. Em i tok olgeta Kristen pipel bilong God i lotuim wanpela God tasol olsem na olgeta Sios i mas wok bung wantaim.

Em i tok sapos pasin bilong bruk bruk i stap namel long ol kain kain sios long pasin bilong bilip na skul ol i kisim, dispela bai brukim ol sios na kamapim birua namel long ol pipel na ol lida bilong ol sios. Na taim kain pasin olsem i kamap, bikpela hevi i ken kamap insait long ol bikpela sios long PNG.

Em i tok long kisim Kingdom bilong God, ol manmeri na pikinini i mas bihainim pasin Jisas yet i mekim taim em i karim diwai kros.

"Yumi mas karim diwai kros long kisim laip i stap gut oltaim olsem Jisas Kraiss i mekim," em i tok.

Gavman i lus tingting long ol grassrut pipel long kantri

PEKU PILIMBO i raitim

PLANTI stil pasin i kamap insait long ol bikpela opis bilong gavman na planti ol liklik grassrut manmeri insait long Papua Niugini i kisim bagarap long dispela pasin.

Dispela toktok i kam long Nesenel Dairekta bilong Caritas PNG, Bruda Graeme Frawley i tok bihain long em i lukim planti pasin nogut na tu ol na oda hevi kantri i bungim long dispela taim.

Em i tok gavman i wok long lus tingting long ol grassrut manmeri na pasin ol i stap long dispela taim nogut na i no kamapim sampela rot bilong stretim hevi ol man nating i wok long karim.

Brata Frawley i tok: "Las taim tasol dispela taim bilong ol stilman long kisim mani long

PNGBC insait long Mosbi i soim klia olsem lo na oda hevi insait long kantri i moa bikpela. Gavman i giaman na kirap tokim ol manmeri olsem olgeta samting i orait tasol."

Em i tok olsem wanpela samting we i bagarapim tru dispela kantri em long stil pasin i kamap insait long ol bikpela opis. Dispela stil-pasin i moa bikpela bikos planti mani i save paul nating long han bilong ol wokmanmeri bilong gavman.

Em i tok ol liklik stil pasin olsem raskol i stilim ka, repim meri o kisim liklik mani long ol man na planti save singaut nabaut na tok dispela em i stil pasin.

Em i tok tasol ol i no save sekim gut ol bikman insait long ol gavman i save yusim mani nabaut na givim long ol wantok bilong ol long kamapim bisnis.

Bruda Frawley i tok: "Bai yu i no inap luksave namel long dispela tupela stilpasin o wei bilong kamap ris man hariap tasol tupela rot bilong stil pasin tasol i narakain na tu mani ol stilman bilong gavman i kisim long en i moa bikpela long ol liklik stilman wantaim gan."

"Long olgeta ol dispela stil pasin, ol liklik grasrut manmeri bilong ples tasol i wok long kisim taim stret," em i tok.

Em i tok ol yia i go pinis i lukim planti memba bilong palamen sanap long kot bilong ol lida long pasin bilong paulim mani long opis tasol taim dispela pasin bin kamap, ol i save risain na kot i no save holim ol.

Bruda Graeme i tok tu olsem i gat ol wokman bilong publik sevis ol i rausim long opis bihainim paul pasin bilong ol tasol dispela ol man i stap yet wantaim pul pei.

Sampela taim ol rausim ol dispela man na ol i holim planti posisen long narapela narapela hap na kisim pei yet.

Em i tok olsem dispela POSF Cairns mani i wanpela paul pasin i kamap i narapela bilong ol pasin hait ol bikpela man insait long gavman i kamapim.

Em i askim: "Olsem wanem bai dispela bikpela mani i lusim kantri long baim wanpela haus yu inap baim long liklik mani? Husat i givim tok orait long mani i lusim PNG na tu wanem samting i bin kamap long hap mani we i stap yet bihain long ol i baim dispela haus?"

"I gat planti paul pasin i wok long kamap wantaim narapela ol bikpela mani em ol manmeri i bungim na taim dispela ol manmeri i laik kisim ol dispela mani, ol i painim hat long kisim mani bilong ol yet."


Em i tok: "Sampela taim mani i save kisim longpela taim stret long kamap long ol manmeri husat i askim long mekim sampela wok."

Em i go het na tok dispela mani ol i kolim Slas Fari bilong ol memba we planti toktok i kamap long en tu luk olsem i gat wan wan memba husat i mekim gutpela wok na save long wanem hap mani i go long en tasol planti i no klia long wanem samting i kamap long dispela man.

Bruda Graeme i tok dispela em i no gutpela pasin long ol liklik manmeri husat i kism taim stret wantaim prais bilong olgeta samting i go antap na taim liklik mani i no inap baim bikpela samting.

Em i tok hap liklik tasol bilong ol dispela paul pasin i kamap ples klia tasol i gat bikpela hap i no klia na ol man i karamapim yet i stap.

Hailans Nius



• Momba bilong Obura Waninera Mukl Taranupl (namel) i kisim presen bilong em long Envaromen Dipatmen taim em lusim olsem vais ministra. Nupela ministra Herowa Agiwa (raithan) i kisim ples.

Wabag Taun Atoriti muvim ol man long haus bilong gavman

PEKU PILIMBO i raitim

OLGETA man husat i stap nating insait long haus bilong ol publik sevans long Wabag i mas lusim ol dispela haus na hap graun ol i stap long en.

Enga Provinsel Plis Komanda Sief Inspekta Eliack Jerry Frank i tok plis i helpim Wabag Taun Atoriti long muvim ol man husat i stap nating insait long ol haus bilong gavman.

Sief Inspekta Frank i tok ol i bin stat rausim ol man las wik Fraide na dispela wok bai go long narapela ol hap ples insait long taun tu.

Em i tok plis bai helpim tasol long rausim ol manmeri husat i sanapim haus long graun bilong gavman na ol i bin rausim pinis sampela lain husat i tok ol i papa graun na stap nating long gavman haus. Em tok ol dispela lain i gat haus bilong ol yet i stap tasol giman i kam na kamapim haus bilong gavman olsem bilong ol stret.

Em i tok Nesenal Kot Jas Salina Injia wantaim ol wokman bilong em bai i kam slip long Premier Hill we ol publik sevans i bin stap na ol bai muvim ol publik sevans long hap i kam long Aypos.

Sief Inspekta Frank i bin tok olsem i gat narapela 8-pela haus arasait long Wabag taun we ol bai rausim ol man. Em i tok ol man i slip long dispela ol haus i nogat rait long slip long bikos ol i no holim wok we gavman bai luksave na givim haus long ol.

Em i tok ol man long maket tu bai i muv i go aut na bai taun atoriti i stretim maket i go bikpela. Tasol i gat sampela liklik wari bilong graun wantaim ol papagraun na taim taun atoriti i kisim taitel bilong graun bai ol i stat long kamapim dispela ol senis.

Em i tok planti manmeri nating i kam wokim haus na i no kisim tok save long bilding bod na tu ol i kamapim dispela hap olsem wanpela setelmen.

Em i tok taim Wabag Taun

Atoriti i stretim ol dispela pepa wok pinis bai plis i helpim long rausim ol dispela man nating na kamapim maket i go bikpela.

Em i tok ol lain husat i wokim haus long maket i mas muv aut las yia tasol dispela samting i no bin kamap na ol i wok long stap yet.

Long wankain taim plis long Wabag i wok long helpim ol man husat i stretim rot namel long Porgera na Laiagam. Bikpela ren i bin bagarapim planti hap bilong dispela rot tasol wok bilong stretim rot i no save go het taim ol papa graun long hap i save stapim ol wokman na askim long kompensesen.

Em i tok dispela kain pasin i i stapim planti rot wok na nau yet plis i stap wantaim ol wokman na wok bilong stretim rot i go gut.

Momba bilong Kandep Jimson Sauk bai kamap long Kandep yet long dispela wik long opim wanpela nupela Health Senta.

Kansel bai lukautim gavman haus long Westen Hailans

Gavana bilong Westen Hailans Pater Robert Lak i promis olsem maski wanem kain ples, pawa bai i go insait long olgeta liklik ples long provins bilong em.

Em i mekim dispela tok long Minj long dispela wik long wanpela wokabaut bilong em long wanwan distrik long toksave long baset bilong dispela yia long wanwan kansela.

Long dispela bung wantaim ol kansela bilong Anglimp Saut Waghi Lokal Level gavman insait long Minj, em i toksave long olsem lokal gavman kansel bai kisim olgeta haus bilong Provinsel gavman insait long olgeta wanwan distrik insait long Provins. Ol kaunsel bai kisim

rent mani na tu lukautim ol haus. Pater Lak i tok insait long 5 yia plen bilong em, em i laik lukim olgeta liklik ples i kisim pawa insait long haus na ples bilong ol. Em tok maski sapos dispela haus i kuna haus i ples i nogut, em i laik long lukim pawa i go yet.

Pater Lak i tok insait longyia 2000 baset bilong Westen Hailans Provinsel Gavman, em i putim pinis mani klostu long K2 milien long kisim pawa i go long ol liklik ples. Em i tok em i wari long ol 400 000 manmeri bilong Westen Hailans Provins na em laik lukim dispela samting i mas kamap long wanwan ples.

Em i tok dispela wakabaut

bilong em bai kisim em i go long olgeta distrik bilong provins na em bai givim ol kaunsel na toktok wantaim ol bikos nau em ol wanwan kaunsel bai stretim sindaun bilong ol manmeri long ples.

Em i tok wok kamap i save kamap long wanwan liklik ples na em bai givim olgeta haus bilong gavman insait long wanwan distrik i go long ol kaunsel long ronim na kisim moni bilong stretim ol narapela samting. Sampela man i tok dispela em i wanpela gutpela samting bikos ol kaunsel bai i lukautim ol samting we i stap klostu na ol i ken lukim wanem samting i rong na fiksims.

Westen Hailans 2000 baset kisim tok orait

SIMON KUK na PIUS MON i raitim

K49 milien baset bilong Westen Hailans Provins i kisim tok orait pinis long Nesenel gavman.

Olgeta mani Westen Hailans Provinsel gavman bai kisim insait long dispela yia em long K49, 409 000 na dispela i soim olsem em bai kisim moa long K7 milien winim las yia baset bilong K41 milien.

Ol momba bilong Provinsel gavman i bin pasim na tok orait long dispela baset tupela wik i go pinis.

Westen Hailans Provinsel gavman aninit long Gavana Pater Robert Lak i bin tok olsem dispela ol eria bai kisim bikpela mani long dispela yia; stretim rot, bris, skul na hausik bai kisim K9, 412 250, Edukesen bai kisim K3, 111 998, Helt K2, 129 579 na Lo na Oda bai kisim K1, 475 354.

Olgeta lokal level gavman kaunsel bai kisim mani bilong ol inap olsem K3, 198 700 na long namba wan taim stret tupela taun atoriti insait long Minj na Banz bai kisim inap K10, 000 wanwan.

Gavman i givim tu K500, 000 i go long stretim ol man i gat ol liklik kopi gaden insait long wanwan ples na K200, 000 bilong ol man husat i laik

kamapim kaikai olsem poteto fam na arapela gaden kaikai. Mani bilong ol dispela samting bai Agrikalsa Benk na bai ol i givim i go aut long husat man i tingting long kamapim sampela wok.

Aninit long mani bilong Helt, Maunt Hagen General Haussik i kism K200, 000 na ol sios raunim hausik insait long provins i bin kisim K1, 300, 000.

Na mani bilong Infrastraksa K5,900, 000 i go long rot na bris na K1, 920 400 bai i go long karim aut Rurel Elektrifikesen Skim o karim pawa i go insait long wanwan hauslain. Na K1, 300 000 bai ol i yusim bilong stretim na sanapim stet 3 bilong Anglimp Hai Skul.

Olgeta skul insait long provins bai K610, 000 olsem Skul fi subsidi i kam long Westen Hailans Provinsel Gavman na ol meri i kisim narapela K500, 000 olsem ol i bin kisim las yia.

Bilong lo na oda ol i givim K121, 280 bilong strongim dispela bum get long Waghi Bruk, K335 000 i go bilong stretim ol auksileri plis na siti patrol plisman.

Narapela hap we bikpela mani i go long en em long pei bilong ol publik sevis man wantaim K7, 238 000, K16, 760, 800 i go long pei bilong ol tisa na sapos narapela bagarap o samting i kamap bai provisel gavman i gat K1, 050 000 bilong yusim.

BIKPELA TOKSAVE

NIU PRAIS

WANTAIM VAT



30t





TASOL PRAIS LONG DISPELA INO SENIS



20t

WANTAIM VAT



10t

WANTAIM VAT

NOKEN BAIM MOA LONG OLGETA STUA

Madang Nius



Karkar obsevetori i bagarap

WANPELA bisnis man long Karkar Ailan, Roger M. Middleton i tok sampela bikhet lain man i bin go insait long haus bilong sekim Karkar maunten paia na bagarapim tupela bilong tripela rekoding na ripiting stesen na stilim ol mesin bilong sekim maunten paia.

Mista Middleton i tok namba tri stesen i stap long Caldera (crater) na dispela ol wokman bilong RVO i no inap long go sekim long wanem i nogat mani bilong

baim helikopta bilong karim aut dispela wok.

Em i tok plis i holim pas na sasim pinis foapela man bilong Urigan, Narer na Keng na tripela moa ol i tingting long holim ol long dispela wik.

Em i tok ol plis i kisim bek sampela bilong ol mesin ol stilman i bin kisim.

Mista Middleton i tok Karkar Obsevetori i no wok inap long foapela mun olgeta bihain long dispela hevi i kamap.

Gavman bai sainim MOU bilong Ramu main

WENCESLAUS MAGUN i raitim

GAVANA Jenerel Sir Silas Atopare bai sainim Memorandum Ov Agrimen na maining developmen kontrak long Februari long Madang o long Mosbi sapos olgeta pepa wok na toktok i stret, Corporate Affairs Manager bilong Highlands Pacific Limited, Andrew Yauieb i tok.

Mista Yauieb i tokaut long dispela bihain long wanpela kibung namel long ol maus man bilong Highlands Pacific Limited, Madang Provinsel Gavman, Dipatmen bilong Mining, ol papagraun bilong Kurumbukari, Inland na Lowland Pipeline na Basamuk na Minista bilong Mining, Sir Michael Somare las wiken long Madang.

Mista Yauieb i tok dispela em las kibung bilong pasim ol toktok namel long olgeta dispela grup bipo long Gavman i ken glasim olgeta toktok na sainim MOA.

Em i tok tu olsem Sir Michael i bin amamas tru long Ramu Nikel na Kobalt main long wanem em i namba wan main long PNG bilong wokim pinis prodak long ol nikel na kobalt ol i digim long graun na salim i go long arapela kantri.

Mista Yauieb i tok Highlands Pacific

Limited nau i wetim Gavman long givim ol tok orait bilong go het na kirapim wok bilong main. Taim Gavman i givim ol tok orait bilong kirapim main, ol bai go het long kisim dinau mani long ol bikpela beng long ovasis na go het long kirapim main long Basamuk.

Laip taim bilong Ramu main em i olsem 20 yia tasol sapos olgeta wok i go gut, kampani inap skruim dispela taim i go moa long 40 yia. Dispela bai gutpela long sait bilong gavman long wanem main bai bringim plani mani i kam insait long kantri na gavman i ken yusim dispela mani long kamapim ol arapela servis bilong helpim ol pipel bilong Madang, na PNG olgeta.

Long wankain taim mausman bilong The Nature Conservancy, Wep Kanawi i laikim ol papagraun i mas save long wanem ol gutpela servis wok bilong main inap kamapim na tu ol hevi long bihain taim.

Em i salensim ol papagraun long noken pasim rot bilong ol NGO long tokaut long ol dispela bagarap na gutpela sindaun wok bilong main inap kamapim. Long wanem Mista Kanawi i pret nogut bihain ol hevi i kamap long bus, graun wara, solwara, pis, na ol binatang we ol pipel i save kisim long stap laip na bai painim hat long lukluk i go bek na sori long disisen ol i mekim pastaim.

Madang gavman laik givim gutpela servis

MADANG Provinsel Gavman i kamapim sampela rot bilong givim gutpela servis i go long ol pipel bilong Madang, Gavana bilong Madang, Jim Kas i tokaut insait long 2000 Baset bilong provins.

Long lukim dispela tingting i karim kaikai, Mista Kas i tok Madang gavman i redi long helpim ol papagraun long wok bung wantaim insait long ol bikpela risos developmen insait long provins.

Em i tok Madang gavman i redi long go het na karimaut ol infrastraksa developmen plen, go het long putim mani bilong karimaut ol wok painim bilong mekim ol developmen we i ken stap longpela taim na wok bung wantaim ol NGO.

Mista Kas i tok astingting bilong Madang gavman em bilong lukim olsem provins i gat inap samting bilong lukautim em yet na givim ol servis i go long ol pipel long ples.

Long lukim dispela astingting i karim kaikai, Mista Kas i tok i gat rot i stap bilong apim moa welfea na developmen i go long ol ples; apim rot bilong mekim mani; stretim wok bilong lokal level gavman long mekim baset na karim aut ol program; hapim stretpela pasin bilong wok bilong provinsel na lokal level gavman long lukautim mani gut; na strongim pasin bilong mekim mani.

Mista Kas i tok tingting bilong kamapim wanpela provinsel komiuniti i olsem olgeta pipel bilong Madang i mas wok bung wantaim. Pasin bilong sekim wok bilong olgeta lain insait long komiuniti tu i mas kamap.

Em i go het na tokaut long ol bikpela wok

Madang gavman i gat laik long kamapim. Dispela em olsem - infrastraksa developmen, ekonomik developmen, na lo na oda.

Mista Kas i tok wanpela bikpela hevi bilong kamapim Madang olsem kapital bilong provins em bikos i nogat gutpela rot na ples balus long plani hap bilong provins.

Em i tok dispela i helpim long kamapim pasin bilong stap insait long wan wan ples, na ol wanlain na i no bungim ol pipel bilong provins olsem wan pipel na wan provins.

Long stretim dispela hevi, Mista Kas i tok Madang gavman i putim K1.5 milien bilong stretim ol rot i go long ol ples, distrik na provinsel het kwata.

Em i tok Madang gavman i luksave olsem sapos ol i laikim developmen i stap yet, ol i mas i gat strong bilong lukautim ol servis i stap pinis. Em i tok dispela i ken karim kaikai sapos i gat ekonomik developmen.

Mista Kas i tok gavman bilong em i laik:

- Sapotim ol praivel sekta insait long provinsel ekonomik developmen forum;
- Helpim ol liklik na bikpela liklik bisnis insait long pasin bilong stretim infrastraksa na transpot na komiunikesen;
- Helpim ol pipel bilong ples long salim karim kaikai bilong ol long pasin bilong kamapim ol maket ples;
- Kamapim ol dinau maket aninit long 'land mobilisation schemes'; na
- Helpim viles teknoloji na ol skul.



Ol olpela wokman bilong Ramu Ranger i bringim teng igo long Long Ailan. Foto: WENCESLAUS MAGUN

Madang haus sik woka soim straik

MARTIN HAWEK i raitim

MOA long 300 wokmanmeri bilong Modilon jenerel haus sik long Madang i no amamas long sief eksekutyutiv opisa na sampela sinia opisa bilong haus sik bikos long wok menesmen bilong haus sik.

Ol i tok strong i mas gat wok painimaut long kamapim kila ripot long pasin bilong makim ol sinia eksekutyutiv na haus sik wokman.

Insait long petisen pepa bilong ol, ol i tok, long save bilong ol, John Levi husat i kamap sief eksekutyutiv opisa nau i bin kam long haus sik long helpim Dokta Nicholas Mann long 1998.

Ol i tok pastaim long atoriti i makim em i go long Madang haus sik, em (Mista Levi) i bin nogat wok na stap nating wantaim Nesanel Dipatmen bilong Helt. Ol i tok dispela makim bilong Mista Levi i no makim trupela interes bilong ol wokmanmeri bilong Madang haus sik woka.

Petisen bilong ol i tok tu olsem sief edvaisa i abrus tru long givim tok stia long ol seleksen komiti. Mipela nau i no save

long dispela signesa bilong seleksen komiti siaman bikos mipela i save olsem dispela posisen em pablik servis posisen, tasol long hia ol tok orait long pepa i soim mak bilong (signesa) hospitol bod siaman Florian Banin.

Wanem rot ol i bihainim i no stret olgeta na wanem kain tok stia ol i kisim i abrus olgeta tu. Ol i tok pasin bilong givim wok long wantok na ol pren yet i kamap long Madang jenerel haus sik long makim ol sinia helt opisa na sief eksekutyutiv opisa. Ol i givim tok piksa olsem wanpela meri helt woka i bin sindaun antap long wanpela posisen long 12-pela mun olsem eking opisa. Tasol ol i no makim meri ya olsem ful-taim wokmeri bilong dispela posisen. Ol komplek tu olsem sampela posisen bilong haus sik tu i go long sampela lotu lain.

Ol Madang hospitol woka i tok sapos ol dispela toktok bilong ol nogat bekim bilong en bihain long 7-pela de, ol bai kisim sikret balot vot long soim wanem samting ol i mas mekim gen.

Wantok i traim long toktok wantaim siaman na CEO tasol ol i no stap long bekim.

Madang NGO laik wok bung

KIWURAM KANAKO i raitim

OL non-gavman ogenaiesen i pasim tok long wok bung wantaim insait long wanpela kibung bilong ol long mun i go pinis.

Bosman bilong ol NGO long Madang Provinsel Asembli, Wesley Sanarup i bin tokim ol maus manmeri bilong ol NGO long dispela bung olsem kain kain senis i wok long kamap long provins na ol NGO i mas wok bung wantaim ol yet, komiuniti na gavman long lukluk long ol dispela senis.

"Maski yumi ol NGO i nogat plani mani na arapela samting long mekim ol wok bilong yumi, yumi mas traim long bungim wanem samting yumi gat long mekim wok," Mista Sanarup i tok.

Em i tok plani lain i save tok olsem ol NGO em ol lain bilong toktok tasol na nogat wok bilong ol. Tasol Mista Sanarup i tok em i ting ol NGO i mekim plani liklik gutpela wok insait long provins na kantri.

Em i tok olsem i gat ol gutpela NGO olsem BEST Inc, GROW Project, VSO, World Vision, Melanesian Solidarity, Madang Indigenous Peoples Alliance, Madang Provincial Council of Women na ol

arapela NGO i stap husat i gat ol gutpela manmeri i gat laik long mekim wok insait long komiuniti.

"Yumi mas bungim ol dispela gutpela savemanmeri husat i wok long ol wan wan grup na wok bung wantaim. Sapos yumi wok bung wantaim, bai yumi kamap wanpela lain we plani bai laik wok wantaim," em i tok.

Mista Sanarup i tok tu olsem i gat ol grup olsem United Nations Development Program husat inap long helpim ol NGO na ol komiuniti long mekim wok.


Aninit long UNDP i gat wanpela program ol i kolim long Global Environment Facility (GEF) we ol i gat sampela mani long helpim ol komiuniti na NGO long mekim wok long sait bilong bus na graun.

Long wankain taim tu, Mista Sanarup i tok tenkiu i go long BEST Inc long ronim ol liklik skul bilong ronim bisnis insait long komiuniti we ol inap long helpim ol yet.

Ol NGO lain husat i bin kamap long dispela las kibung em long BEST Inc, Melanesian Solidarity, Gospela Lighthouse Women's Fellowship, Madang Forest Resource Owners Association, Madang Research Institute na Northern Lights.



Lae Nius



Wau Bulolo Taun Lod Meja askim pipel long rispektim lo

LOD Meja bilong Wau Bulolo taun Edward Rimbao i askim ol pipel bilong Wau Bulolo long stap isi na noken pulim trabel.

Mista Rimbao i mekim dispela tok tok bihain long wanpela man i bin dai long Wau plis sel long las wik Fraide.

Mista Rimbao i askim famili na ol wantok bilong dispela man long noken pulim trabel bikos ol plis CID i kamap pinis long Bulolo na ol bai mekim ripot bilong ol long dispela bagarap.

Mista Rimbao i tokim Wantok olsem em i luksave olsem ol famili bilong dispela man i harim tok na stap isi na larim samting long han bilong lo yet i mekim. Tasol ol wantok na pren bilong man ya tasol i gat wari na belhat i stap.

Em i tok em i ting bai ol plis CID i pinisim wok painimaut bilong ol long tumoro Fraide.

Ripot i tok bikpela kros na belhat i stap long Wau Bulolo taun bihain long Jimmy Nime i bin dai long Wau plis sel long las wik Fraide we plis i bin holim em na lokim em bihainim sampela stil pasin i bin kamap.

Bikpela kros we famili i gat em, ol i ting plis i wok long kilim planti man long las yia i kam we plis i no holim wanpela na askim em gut long ol trabel samting.

Ol famili i tok i gutpela long ol plis i mas holim ol dispela lain ol i saspek

long ol na kisim ol i go gut long sel na askim ol gut. Na i no ken paitim ol nat-ing long haus o rot taim ol i no mekim trabel o i no holim wanpela birua samting i stap.

Wantok i luksave olsem dispela em wanpela bikpela astingting ol famili na komyuniti i gat bikpela bel kros long plis.

Jimmy Nime i bilong Wau na plis long Bulolo i bin holim na paitim em long ol stil pasin em i bin mekim long haus bilong wanpela waitman long Wau taun.

Plis i bin holim Jimmy taim em i bin stilim wasing masin long haus bilong wanpela bisnisman long Wau na ronawe i go stap long Bulolo wantaim famili bilong em. Plis long Bulolo i go kamap long banis em i stap long en na holim em na paitim em na kisim i go long Wau sel.

Plis ripot i tok tu olsem Jimmy Nime i bin komplek pastaim long sampela pen em i gat long bros na bel bilong em.

Ripot i tok taim plis i sekim sel long Fraide moning, ol i painimaut olsem man ya i dai.

Plis ripot i askim ol famili na wantok bilong man ya long noken kisim lo i go long han bilong ol yet na traim long kamapim birua long dispela hevi. Bikos ol plisman yet bai mekim painimaut long dispela hevi na kamapim ripot gut long bihain taim.

NFA opim trening senta long Umsis

JOE KANEKANE i raitim

Nesenol Fores Atori (NFA) i opim pinis wanpela trening senta long Umsis arere tasol long Lae siti long halivim ol papa graun, NGO na ol sumatin long ol wei bilong planim diwai na tu long kamapim neseri bilong planim diwai.

Menesing dairekta bilong Nesenol Fores Atori Thomas Nen i tok dispela tingting i bihainim luksave olsem planti ol pipel i gat laik long planim ol diwai tasol i nogat gutpela save lon dispela kain wok.

Mista Nen i tok atori i lukim olsem planti ol papa graun i wok long hariap tru long katim ol diwai tasol i nogat luksave olsem i gat ol pikinini diwai i stap na bai ol i gat nid long ol yusim.

"NFA i gat wanpela program bilong planim diwai i stap tasol mipela laikim ol papa graun yet long go pas long dispela program. Long wanem ol wokman bai no inap stap longpela taim long dispela ol ples. Ol papagraun yet i mas halivim ol yet," em i tok.

Kodineta bilong dispela program Don Bakat i tok dispela program i gat tripela bikpela tingting long luksave olsem dispela program bai halivim ol surukim wok bilong planim diwai.



• John Boko projek supavaisa bilong Umsis Trening senta i soim menesing dairekta bilong NFS Thomas Nem sampela long wok i kamap

Em i tok tu olsem planti ol NGO lain i save wok long laik bilong ol yet na dispela program bai halivim ol long wok bung wantaim olsem bai ol rot bilong planim diwai i ken go het moa.

"Dispela program bai pulim planti ol lain bilong mipela long kam wok klostu na kamapim sampela senis. Taim bilong wok wanwan i lus pinis. Mipela i mas wok bung wantaim sapos mipela laikim senis i kamap long forestri sekta," em i tok.

Em i tok tu olsem dispela neseri bai kamapim ol pikinini

diwai we planti bai lus sapos i nogat rot bilong lukautim ol gut.

Mista Bakat i tok sapos i gat ol pikinini diwai na painimaut long graun we ol i ken groa em bai nogat hevi long planim sampela bilong dispela ol diwai.

Trening senta bai op long namba siks mun na ol sumatin bai stat long kam kisim trening long mun bihain.

Dispela trening senta long Umsis i bilong traim tasol sapos i gat interes i kam long ol pablik long wanem NFA i gat tingting long surukim dispela aida i go long ol narapela provins.

trukai
RICE
That's right



Tupela moa Dokta bilong Oro provins

YAKAM KELO i raitim

ORO provins bai kisim tupela moa Dokta i go long Sohe na Ijivitari Distrik long Oro provins.

Oro Gavana Sylvanus Siembo i mekim dispela toktok bihain tasol long em i bin toktok wantaim Oro administresen na Nesenel Helt

dipatmen. Tupela Dokta wantaim bai i stap na wok long autstesen long Oro Be na Kokoda.

Gavana Siembo i tok bikos tupela Dokta ya bai i stap long distrik stesin, dispela bai mekim kamap Provinsal Ruel Helt Ekstensen Progrem taim tupela karimaut ol raun insait long ol ruel helt senta na ed pos.

Gavana Siembo i tok Gavman

bilong em i luksave long Helt olsem bikpela samting long provins olsem na ol i givim K160,000 insait long provinsal baset i go antap long potnait pe bilong ol Dokta insait long Oro provins.

Long dispela taim tu Gavana Siembo i mekim tok amamas i go long memba bilong Ijivitari Simon Kaumi na memba bilong

Sohe Dokta John Waiko long sapot bilong tupela long givim mani aninit long distrik sapot grent i go long kisim dispela tupela dokta i kam long ilektoret bilong tupela.

Gavana Siembo i tok gutpela wok tupela memba i mekim i soim olsem ol lida i laik wok bung wantaim long bringim developmen i kam long provins.

Milen Be bai pasim 2000 baset long Februari

IAN KAKARERE i raitim

Nupela Gavana bilong Milen Be provins Titus Philemon i tokaut bihain tasol long em i kamap Gavana long las wik olsem yia 2000 baset bilong provins bai Milen Be provinsal asembli i brukim long mun Februari taim ol i bung.

Long dispela taim asembli i bung bai Gavana Philemon i tokaut tu long nem bilong ol nupela provinsal eksekutiv kaunsil na ol bikpela polisi plen long gavman long dispela yia.

Mista Philemon i mekim ol dispela toktok taim em i toktok long kamap bilong em olsem Gavana long vot i nogat bilip las wik egen-sim olpela Gavana Dem Josephine Abajiah.

Mista Philemon i mekim tok amamas tu i go long olpela Gavana Dem Josephine Abajiah long gutpela wok em i bin mekim long Milen Be provins long las tupela krismas.

Mista Philemon i tokaut olsem dispela vot i nogat bilip we makim em i kamap Gavana i no gat wanpela hait jingting nogut bilong em yet o long gutpela nem bilong em yet.

Em i tok amamas tu i go long ol nesenel memba husat i wok bung wantaim em long mekim kamap dispela senis na tu ol kaunsil presiden long sapot bilong ol long sampela wik i kam.

Mista Philemon i tokim tu ol pablik sevans long provins olsem bai i gat gutpela wok bung wantaim i kamap long karimaut wok bilong bringim sevis na helpim long ol pipel bilong Milen Be provins. Em i tok wok bilong lukautim provinsal administresen bai i stap long han bilong provinsal administreta.

Nupela Gavana i tok tu olsem Milen Be provinsal gavman i sanap tu long karimaut ol polisi bilong nesenel gavman long sevim provins. Em i tok tu olsem bai gavman bilong em i sapotim tu wok bilong ol bisnis developmen insait long provins na kamapim gutpela ples bilong stap gut na ol wok bisnis tu i ken groa gut.

Giaman lotu i laik rejista

Wanpela kain lotu olsem kago kalt lotu long Kiunga eria. Westen provins i laik rejista olsem wanpela sios grup.

Dispela lotu grup ol i kolim ol yet Renbo Sios i wok long stretim ol pepa wok wantaim ol gavman atoriti long Kiunga nau.

Long las mun Kiunga plis i tokim hetman bilong dispela lotu grup Dine Kwekwe olsem lo i luksave long laik bilong wanwan long bilip long wanem samting ol i laikim, tasol ol i ken mekim dispela grup bilong ol sanap klia taim ol i rejista olsem wanpela asosiesen o grup.

Keateka Not Flai distrik komyuniti sevis opisa i tok Kwekwe i wok long go long opis bilong Komes long stretim gut lo bilong grup bilong em na ol pepa bilong kamapim asosiesen.

Kwekwe i bin statim dispela lotu grup bilong em 5-pela krismas i go pinis taim em i tok spirit i kam long em taim em i bin go long matmat bilong pikinini meri bilong em. Na spiriti ya i tokim em long statim wanpela lotu na kolim nem Renbo Sios.

Em i stat autim toktok long lotu bilong em tasol ol pipel long ples bilong em Mimingire i ronim em.

Em i bin go sanapim kem long ples bilong mama bilong em long Kikisram na insait long las 6-pela mun, dispela lotu grup i kamap bikpela wantaim moa long 1000 manmeri i kam na wokim kem long dispela eria.

Tasol ol wantok bilong Kwekwe i kros bikos ol lain memba bilong ol i kam wokim haus na kem long graun bilong Kikisram pipel. Na tu ol pipel bilong dispela hap tu i bilong ol ples klia lotu grup.

Ol pipel i go komplek long plis na plis i givim oda long ol dispela Renbo Sios memba long Desemba 22, 1999 long ol i mas lusim graun bilong ol pipel bilong Kikisram. Sampela i harim tok na go na sampela i stap yet wantaim lida bilong ol Kwekwe. Tasol ol pipel bilong Kikisram i kisim kot oda na rausim olgeta lain bilong Renbo Sios.

Planti toktok promis bilong Renbo Sios long ol samting bai i kamap long nupela yia i no kamap. Tasol lida Kwekwe i harim tok bilong plis fos na i traim long rejistaim lotu grup bilong em gut.

Plis i tokim Kwekwe olsem em wantaim ol memba bilong em i mas mekim lotu bilong ol stret long graun na asples bilong ol stret.



• Wanpela singsing grup long Sentral provins i mekim save long brukim skru na pairapim kundu long Kalsarel festival las yia.



• Ol sampela manki long Mosbi raun klinim nambis na bungim ol plastik kontena na ol plastik pipia long klinim kempen bilong NCD. Foto: Joe Kau.

NCDC pasim K113 milien baset

NESENEL Kapitel Distrik Komisin (NCDC) i pasim pinis K113 milien baset bilong yia 2000 long las wik Fraide. Dispela baset em wanpela bikpela baset insait long kantri we ol arapela provinsal gavman baset i daun liklik.

Long las wik Fraide Minista bilong Provinsal na Lokol Gavman Afeas Andrew Kumbakor i tok dispela em wanpela gutpela baset tru bilong NCDC na Nesenel Gavman i oraitim long baset ya i ken go het long karimaut wok bilong em long dispela yia.

Bikpela hap bilong dispela baset i go long stretim gut ol wok bilong rot, skul na ol bikpela sevis insait long Mosbi siti. Na dispela i bihainim 5 yia plen bilong NCDC long kirapim gutpela eduksen, rot sistem na helt sevis insait long Mosbi siti.

Raskol kilim boi Morobe long Mosbi ...Ol Saina komyuniti i laik straik

YAKAM KELO i raitim

WANPELA yangpela boi i bin dai long las wiken Sarere long Hohola, Mosbi long han bilong ol man nogut.

Dispela yangpela boi husat i dai em plis i tokaut long nem bilong em olsem Paul Semu, 22 krismas bilong ples Pepekane long Mumeng, Morobe provins. Em i dai long bikpela bagarap long bodi bilong em bihain long tupela man nogut i birua long em arere long SDA haus lotu long Hohola.

NCD Sentrel plis komanda Asisten Komisina Raphael Huafole i tok dispela pasin em nogut tru na em i askim ol komyuniti manmeri long Hohola eria long ripotim dispela tupela man long plis long helpim plis i traim holim ol man nogut ya.

Mista Huafole i tok kantri bilong mipela i wok long i gat ol man nogut we i nogat rispek long laip bilong narapela man olsem na em i bikpela samting long pablik i mas wok klostu wantaim plis fos long pait egen-sim dispela kain birua pasin.

Mista Huafole i tok dispela boi husat i kisim bagarap em wanpela boskru bilong pmv bas. Na em i bin wokabaut i go long haus taim tupela man nogut i bungim em long rot wantaim ol birua samting bilong pait.

Wanpela man husat i ron long ka i go i tokim Hohola plis olsem em i lukim tasol ol manmeri i bung na i lukim dispela birua. Dispela yangpela boi i traim long ronawe i go hait long ol stua long Hohola tasol em pundaun na dai bikos long pl bagarap em i

kisim long bodi bilong em.

Mista Huafole i tok dispela birua long yangpela manki Morobe ya na tu long dai bilong tupela Saina manmeri long las wik i no gutpela tru na i soim olsem kantri bilong mipela i gat ol man wantaim sik nogut i stap.

Mista Huafole i tok dispela dai bilong tupela Saina manmeri ya i hat liklik bikos plis i no kisim wanpela gutpela ripot long traim kamapim sampela rot bilong painim ol man nogut ya.

Tasol em i tok, em i gat bilip olsem sampela taim bihain bai sampela ripot bai kamap na plis inap kisim dispela trabel man.

Long dispela birua long tupela Saina manmeri ya, ol Sain komyuniti long Mosbi i laik straik na karim bodi bilong tupela manmeri ya i go long palamen haus.

Tasol Mista Huafole i tok long dispela straik em i no inap oraitim bikos plis i skelim dai ol birua bilong ol ovasis lain na PNG lain yet olsem wankain tasol we olgeta birua olsem i save go long han bilong plis long sekim na painimaut. Na husat plis i holim na lo i painim ol asua long dispela birua i ken kisim mekimsave bilong lo.

Em i tok plis bai holim ol Saina lain na sasim ol sapos ol i kamapim straik.

Em i tok ripot long ol man nogut kilim ol gutpela manmeri i no gutpela tru olsem Gavman i mas skelim dispela hevi na kamapim moa strongpela lo long traim mekimsave long ol raskol i save stil, kilim man i dai, bagarapim ol meri na ol arapela bikpela trabel moa.

Nuku papagraun painim K27,000 bilong ol

FELIX RAMRAM i raitim

WANPELA lain papagraun insait long Nuku distrik bilong Sandaun provins i wet tripela ya long painimaut wanem samting i kamap long hap mani i stap long wanpela sek ol i raitim long nem bilong ol.

Nau ol i kamap ples klia na singautim Sandaun Gavana John Tekwie na memba bilong Nuku na Minista bilong Provinsal na Lokol Level Gavman Andrew Kumbakor long mekim olgeta samting long pawa bilong tupela long painimaut wanem samting i kamap long dispela mani.

Ol ripot *Wantok* i kisim i tok, ol go pas bilong Waimang Lenonas Asosiesen i gat bikpela wari tru long dispela paul pasin i kamap na ol plen o as tingting asosiesen i gat long pasin bilong yusim dispela mani longen. Nau i slip nating i stap na bai i kisim planti ya gen long wet long ol dispela plen i karim kaikai.

Ripot i tok papagraun asosiesen ya i gat traipela wari tru long save wanem samting i kamap long dispela sek mani.

Sampela gavman pepa em *Wantok* i holim i soim olsem dispela sek ya i bilong PNGBC Vanimo Brens, sek namba 012704 ol i detim long 23 Me, 1997.

Na sek ol i raitim long baim mani ya i go long "Wamang Lenonas Asosiesen (Cletus Meisel)." Na long tambilo lep han kona ol i raitim long han "Sandaun Provinsial Tras Akaun."

Mausman bilong ol Nuku papagraun Joe Kaseno i tokim *Wantok* olsem inap nau dispela sek mani no kamap yet long ol papagraun bilong Nuku. Maski ol i adresim dispela nek i go long Waimang Lenonas Asosiesen na go pas bilong ol Cletus Neisel.

Na ol i bilip dispela sek mani i paul namel long ol gavman wokman insait long ol gavman opis insait yet long Provinsal Hetkota, Vanimo.

"Dispela em strongpela bilip bilong mipela. Planti paul pasin tru i save kamap tasol gavman i isi tumas long karimaut wok painim."

"Strongpela bilip bilong mipela em dispela sek mani i paul insait long gavman opis long Vanimo. Na mi i askim Sandaun Gavana na Rijinel memba John Tekwie long kamaut klia long Redio Sandaun long taim em i op gen na long ol niuspepa. Na tokim mipela olgeta memba bilong Waimang Lenonas Asosiesen wantaim tu olgeta Sandaun pipel na PNG olsem dispela sek em namba bilong em 012704 i no lus o man i paulim, tasol i stap yet long Sandaun Treseri Opis."


Mista Kaseng i go het na i tok: "Makim maus bilong ol memba bilong Waimang/Walo papagraun, mi singautim Minista bilong Provinsal na Lokol Level Gavman Mista Kumbakor long redi long salim ol opisa bilong em long kam daun long provins na sekim dispela paul pasin nau i stap. Na sapos dispela i no inap kamap hariap, mipela i bilip mipela i gat i inap strongpela toktok long bringim dispela samting i go long ai bilong Kot," Joe Kaseng i tokim *Wantok*.

Dispela K27,500 mani i bilong Rurel Eksen Program o RAP Fan bilong Gavana Tekwie. Mani ya i stap long wanpela Tras Akaun bilong Sandaun Provinsal Gavman na i save stap long lukaut bilong PNGBC Vanimo Brens.

Mani ya ol i rausim long peim i go long Waimang Lenonas Asosiesen bilong Nuku long karimaut edministresen wok bilong rejistarim ol graun aninit long ILG bilong Waimang (Nuku) na Walo papagraun grup bilong Aitape Is Kos.

Em i tokaut tu olsem em i bilip wankain rot narapela mak mani inap long K10,000 bilong ol papagraun long Amanab i go long wankain rot. Olsem na ol gavman opisel i mas hariap long sekim ol dispela paul pasin insait long Sandaun provins.

H E P I




SPEKOL KAIN OFA

FRI
YAMAHA OUTBOARD MOTOR NA OL SAMTING INAP LONG K5,000.

Baim nupela Toyota Land Cruiser old 75 Series pikap model long retel prais long dispela mun na bai mipela givin yu wanpela Yamaha 25HP Outboard Motor, wantaim ol sampela samting inap long K5,000. Hariap! Dispela mun tasol... Kam na lukim ol Ela Motors sales tim klostu long hap bilong yu na kisim wanpela niupela Toyota Land Cruiser 75 ute nau!


LIKLIK TAIM TASOL LONG OFA

LAND CRUISER 75 STAP TASOL LONG NOMAL PRAIS WANTAIM FRI YAMAHA 25HP OUTBOARD MOTOR.



SEL I GO INAP LONG 31st JANUARY 2000

DISPELA KARAMAPIM OL RITEL KASTAMA TASOL.



VISIT OUR WEBSITE - <http://www.elamotors.com.pg>

EM6659

VTA maket long Vanimo bai klostu op

FELIX RAMRAM i raitim

VANIMO Taun Maket bai ol i opim gen tude sapos opis bilong Helt Inspekta long Vanimo i amamas long olgeta wok mentenens em kodineta i bin karimaut long maket.

Opis bilong Helt Inspekta i bin pasim maket long Ogus 16 las yia bikos eria bilong maket i doti, graun i save pulap long wara long taim bilong ren, nogat haus pekpek na to nogat gutpela banis i banisim maket.

Vanimo Taun Atoriti i haiarim pinis wanpela kontrekta long karimaut ol wok mentenens long Vanimo Taun Maket long kos inap

long K29,500. Tasol ripot Wantok i kisim i kam long opis bilong VTA, i tok inap nau ol i givim K12,000 i go pinis long han bilong kontrekta. Na inap long 4-pela wik, ol wok isi bikos long hevi bilong sot long mani.

"Mipela i gat hevi bilong mani insait long provins, olsem na VTA tu i bungim dispela hevi bilong nogat mani. Olgeta wok bilong stretim maket i no pinis yet - mipela i mas kisim narapela K10,000 o moa long pinisim mentenens bilong maket bilong yumi. Dispela mani i bilong las yia na bikos long ol hevi bilong sot long mani, VTA i bringim dispela mak mani i kam fowat long dispela

yia gen," VTA opisel, Mista Ronny Ambau i tokim Wantok.

Em i olsem, VTA i luksave long hevi ol mama i bungim long das i bagarapim ol wantaim ol samting ol i salim long Dasih Nambis Maket.

Na taim bilong ren i stat las wik i kam, olsem na Taun Atoriti i traim long hariapim ol wok. Bai ol mama wantaim ol pikinini i ken muv i go bek long maket ples na hait long san, das na ren.

Mista Ambau i tok VTA wantaim ol mama i stap long "marimari" bilong opis bilong Helt Inspekta long opim gen maket o long larim i stap pas yet. Em i tok sapos VTA i

gat mani bai ol wok i ken go het gen. Long dispela taim opis bilong Helt Inspekta long Vanimo i tokaut olsem maket bai i op gen sapos VTA Kontrakta i karimaut gutpela wok mentenens. Na sapos opis bilong em i no amamas long wanem samting nau i stap, maket bai i stap pas yet.

Helt Inspekta, Mista Norman Powai i tokim Wantok olsem em i taim nau long VTA i luksave long planti samting. Na tingting long putim tambu long salim buai insait long maket bikos dispela samting tasol i as bilong planti pipia na ret-pela mak insait long maket ples. Em i tok Vanimo Taun Atoriti i gat wok nau long stat painim graun na

kamapim maket bilong salim buai.

Na larim bikpela maket insait long taun long salim tasol gaden kaikai, ol kumu na ol kain abus - i no olgeta manmeri i save kaikai buai, dispela yumi mas save.

"Ol narapela sait rot maket insait long taun eria em ol i kamapim pinis i stap. Ol i ken stap sapos i gat tokorait i stap namel long Vanimo Taun Atoriti na ol wod kaunsila.

Tasol sem taim, dispela ol sait rot maket i mas gat ol smol haus na rabis dram bilong putim ol pipia. Sapos ol dispela samting i no stap, opis bilong Helt Inspekta bai pasim ol dispela maket tu.



• Maket long Gordons nau i kamap ausait long maket banis. Ol mama i save kisim taim tru long taim bilong biksan na das na long taim bilong ren tu.

Gordons Maket stap pas yet

VERONICA HATUTASI i raitim

BIKPELA maket long Mosbi siti em Gordons Maket i stap pas long tupela mun taim ol woklain i karimaut ol wok long stretim insait bilong maket.

Na ol pipel i save wokim maket ausait tasol.

Long dispela wik, Wantok i bin go long maket ples long lukim ol wok i go het na kisim toktok long ol woklain long ol wok we ol i mekim long insait bilong maket.

Maket ples i bin pas long mun Desemba yet taim wok i stat na maski em i gat bikpela san o ren, ol mama na ol arapela pipel i save maket ausait long maket banis.

Nesanel Kapitel Distrik we i save bosim ol maket long siti i karimaut ol wok mentenens. Em i kisim siksapela sab kontrakta long karimaut ol wok long stretim ol tebol, penim gut ol maket haus na ol liklik taka stoa insait na stretim ol samting i bagarap. Bikpela samting em stretim wara paip na ol dreinej sistem o rot long wara i ron long em. Dispela em bikos i kam inap long nau, maket i save bagarap long wara taim em i ren long wanem i nogat gutpela rot long wara i ron long en insait long maket.

Wantok i no bin inap long toktok wantaim ol NCDC atoriti long kisim moa toktok long ol wok insait long Gordons Maket tasol taim em i wokim lukluk raun long hap, em i lukim ol bikpela wara paip i sindaun yet na ol wok lain i stat tasol long digim dreinej. I luk olsem bikpela wok long dispela i stap yet na maket i mas stap pas yet long sampela taim i kam.

Long nait, maket i nogat lait na ol wara paip i stap pas tu.

Long wankain taim tu, NCDC i wok long lusim takis mani taim maket i stap pas.

Mobail beng long helpim ol grasrut

ROSALYN ALBANIEL i raitim

FAINENS Pasifik Limitit kampani grup i kirapim Viles Fainens Limitit long sevim ol liklik grasrut kastoma.

Rot we em i wok i no wankain olsem ol bikpela komesel beng we i save operet long ol bikpela opis na ol i yusim ol kompyuta masin samting.

Rot we Viles Fainens i wok em ol i kirapim insait long ol komyuniti na ol woklain i save go long ol ples na ol setelmen long givim benking sevis olsem ol lon o dinau mani na ol pasbuk seving akaun.

Narapela samting tu em taim ol komesel beng i save sevim ol bikpela kampani na ol woklain, Viles Fainens i lukluk long helpim ol lain husat i nogat mani tumas.

Olsem na long sait bilong wok, Viles

Fainens i mas pulim ol grup kastoma na i no ol wan wan kastoma.

Bipo ol i kirapim wanpela han bilong Viles Fainens, ol mas lukluk long ol dispela samting:

- Hamas viles i stap long wanpela eria;
- Hamas haus na famili bai joinim Viles Fainens;

• Ol kain wok kamap long pulim mani long en long dispela eria na bihain long em i kisim ol dispela ripot, em ken go het long kirapim opis.

Wan wan han o brens i nidim samting olsem 1,500 kastoma insait long wanpela yia long wok i ron gut.

• Moa long dispela neks wik.

Telek kisim kontrak ofa long Ingran

Wanpela biknem singa bilong Is Nu Briten na PNG George Mamua Telek i bin kisim kontrak ofa wantaim wanpela rekoting kampani bilong Ingain inap long wanpela yia. Tasol Telek i no wokim fainol disisen yet, ol ripot long dispela wik i tok.

Rekoting kampani we i laik kisim Telek em

long Real World Records Limitit' bilong Not Gorsham, Ingran na ol i laik bai Telek i katim ol singsing bilong em wantaim ol long wanpela yia.

Peter Gabriel, biknem singa bilong grup Genesis i papa bilong dispela rekoting grup.

Telek i tok em bai lukim ol loya bilong em

na kisim etvais long dispela kontrak ofa bipo em i wokim disisen bilong em.

Wanpela long ol samting i stap insait long kontrak em long Real World Rekots tasol i gat olgeta rait long rekotim ol singsing na konset bilong em long wanpela yia na ol ken riniuwim gen kontrak long narapela yia.

Ol Papamama long Bogenvil wari long skul fi

**VERONICA HATUTASI
i raitim**

KLOSTU 2000 skul yia bai i stat long na long Bogenvil, planti papamama i wari tru long skul fi bilong ol pikinini bilong ol.

Ol i wari bikos ol bin putim mani bilong ol long ol Kwik Mani maket na ol dispela mani maket i no wokim peiaut yet.

Long Bogenvil, ol pipel i bin putim mani long U-Vistrak Fainens Koporesen, Mani Link, Milenium na Nekong Fainens Kampani.

Ol ripot we Wantok i kisim ol famili, ol lapun, ol woklain, ol skul, ol komyuniti grup na ol yangpela long ples i bin putim ol mani bilong ol long ol dispela mani maket wantaim bikipela tingting olsem mani

bilong ol bai gro na ol bai kisim long karimaut ol wok olsem peim skul fi, wokim ol haus long ples, stretim ol gaden kakau na kokonas, wara saplai na ol haus tisa long ol skul na haus bilong ol nes insait long ol helt senta.

"Ol ejen bilong ol dispela mani maket i bin kam long ol wan wan ples na wokim ol gupela toktok olsem sapos mipela i putim mani long ol skim ya, em bai gro. Na mipela i amamas bikos long bikipela winmani we ol komesel beng tu i no save givim long en.

"Stat long mun Jun yet, mipela i wet long kisim bek mani. Sampela ol man bilong Buin, Siwai na Nagovis i bin lusim ples long mun Julai las yia na ol bin go long Buka taim ol i harim olsem ol mani maket ya bai peim bek mani, tasol dispela i no kamap na nau yumi stap long nupela yia 2000.

Sampela ol man bilong saut Bogenvil i wet i stap yet long Buka bikos ol nogat mani long baim rot bilong ol i go bek long ples.

"Long taim bilong bikipela hevi long ailan, ol pipel i bin holim mani bilong ol na raun. Nau ol dispela nupela mani maket i kisim mani bilong mipela na mipela i nogat samting. Em i bagarapim mipela tru na mipela i no save long wokim wanem.

"Skul fi em bikipela samting na mipela i wari tru long en bikos sampela long mipela i gat ol pikinini i stap long komyuniti, hai na nesenel hai skul. Bai mipela i kisim mani we long baim ol skul fi?" planti askim.

Foapela mani maket olsem U-Vistrak, MoniLink, Milenium na Nekong Fainens em ol lain Bogenvil yet i go pas long ol.

I kam inap nau, nius we Wantok

i kisim i soim olsem i klostu taim bai U-Vistrak i wokim peiaut long wanem klostu ol skul bai stat na papa bilong mani maket ya Noah Musingku i tingim skul fi.

"Olgeta samting long dispela sait i stret. Dairekta Misac Autahe na lain bilong em i wok long toktok wantaim ol Beng ov PNG lain na i no long taim bai pei aut i kamap. Ol i opim pinis tu akaun long beng we Mista Musingku i salim mani long en. Bikos long ol skul fi, Mista Musingku i tok em bai wokim: peiaut klostu taim olgeta samting wantaim ol bikman long beng na gavman i stret, "ol ripot i tok.

Ol pipel long Bogenvil, Mosbi na ol arapela hap bilong PNG i wet tasol long peiaut bikos ol i gat planti wok plen long dispela mani, moa yet long stat bilong yia we skul fi em wanpela bikipela samting long ol papamama long kantri.

Ol kontrak tisa tasol long Sauten Hailans kisim malolo pe

HELEN REI i raitim

OL KONTRAK ovasis tisa long Sauten Hailans i bin kisim ol malolo pei na go taim ol aspres tisa i nogat. Na ol i malolo tasol long ol wan wan skul bilong ol.

Ol ripot i kam long provins i tok maski moa long 500 tisa i bin wokim protes mas i go long opis bilong provinzel edukesen edvaisa Jimmy Grita, tasol ol no kisim gupela bekim long en.

Ripot i tok Provinzel Gavman i bin kisim tasol K50,000 na ol bin yusim dispela long peim ol kontrak tisa long ol hai na sekonderi skul long provins.

Ripot i tok provins i laikim K.5 milien long peim tiket bilong ol tisa na ol famili bilong ol husat inap long kisim ol malolo balus tiket long go bek long ol aspres bilong ol.

Mista Grita i tok ol bin kisim ol balus tiket long ol ovasis tisa bikos ol no inap long stap bek long skul.

Em bin tok ol tisa i bin salim petisen pepa i go long en tasol samting tru em stap long han bilong provinzel gavman long givim mani long dispela samting.

Em i tok Gavana, edministreta na ol opisa i luksave long hevi na ol bai lukim olsem long dispela yia, ol tisa i kisim ol malolo pei bilong ol long taim yet.

Long wankain taim tu, ol tisa long Is Nu Briten provins i bin kisim ol malolo pei tasol ol tisa long ol ausait provins i bin inap long kisim ol balus tiket bilong ol.

Edukesen edvaisa Boas Koro i tok tru Provinzel Gavman i bin givim K200,000, mani i bin pinis bikos pe bilong balus i go antap tru na VAT takis tu i kamapim hevi.

Mista Boas i tok olbin askim ol tisa long ol provins olsem Nu Ailan, Wes Nu Briten na Pomio long peim rot bilong ol na ol bai peim bek mani bilong ol taim skul i stat.

Dokta Waiko stap long Tailen bung

PAPUA Niugini em i stap olsem wol lida long skruim na lainim ol tok ples na kalsa. Na bikos em no isipela samting, intenesenel komyuniti long edukesen bilong Senseri 21 i bin painim hat long givim kliapela etvais long dispela samting, Edukesen Minista Dokta John Waiko i tok.

Dokta Waiko husat i stap long wanpela edukesen woksop long Tailan i bin tokim konprens olsem edukesen rifom insait long kantri i putim PNG long gupela mak long save long ol planti toktokples.

Foti foa kantri long wol i stap insait long dispela bung long Tailen we ol i lukluk, glasim na skelim ol wok kamap insait long wan wan kantri long sāt bilong edukesen long 10-pela kismas. Dispela em long olgeta pikinini, man na meri i mas go long skul na kisim save.

Long Mas 1990 bung long Jomtim, Tailan ol gavman we i bin makim ol kantri long wol i bin pasin tok olsem olgeta manki i mas go long skul na pinisim faipela yia bilong praimer i o komyuniti edukesen. Na em i bikipela samting tu long redim ol yangpela wantaim ol save long skruim gupela sekuriti bilong ol.


Praim Minista bilong Tailan HE Chuan Leekpai bin opim bung.

Dokta Waiko taim em i prisensim pepa long dispela bung i tok long dispela yia, Nesenel Gavman i givim bikipela tingting long skruim humen risis na edukesen i wanpela rot. Olsem na em i skruim i go hap mani em i katim long Edukesen long 18 pesen na dispela i go antap long 5.2 mak we i winim mak bilong las yia.

Em i tok bai hat long kisim yunivesel skul, lukautim ol pikinini long kisim gupela skul lolsem long bipo.

Em bin tok long PNG, em i hat long wokabaut i go na i kam long skul bikos long ol maunten, nogat gupela rot. Olsem CODE na Distens Edukesen em wanpela gupela we ol pipel long ples i ken

Dokta kamapim nupela rot long stretim pes



I GAT bikipela bilip olsem ol lain husat pes bilong ol i bagarap long kensa, sua o eksiden bai kamap orait wantaim nogat mak bihainim wok bilong wanpela sejen dokta bilong Inglan long wok long dispela samting long kompyuta.

Dokta Ninian Peckitt husat pas-taim i wanpela sejen long Doncaster Haus sik long Not Inglan i save wokim ol piksa long kompyuta na bihainim kisim dispela long katim na somapim na stretim

pes bilong man o meri i kisim opresen. Rot em i save wokim dispela em long bildim ol piksa long het na kru bilong man na skenim long wokim plastik modol bipo em i katim sikman long rausim sik long bun o wanem hap long bodi. Em i save yusim kompyuta na modol ong skelim na glasim ol samting na bihainim somapim bek hap titanium o liklik hap metal long skin o bodi long man we em i katim long em.

Na bai yu no inpa lukim wanpela mak long operesen i bin kamap long en bikos titanium bai kamap olsem hap long bun bilong man na skin bai gro na karamapim. Dispela rot long katim na somapim man i no kisim longpela taim o sikman long stap long intensiv kea yunit o wari tumas long peim bikipela mani long operesen.

Ninian (Peckitt wantaim modol bilong skal o het na wanpela meri husat em bin karimaut gupela operesen long pes bihainim dispela nupela rot. Nogat mak tru long opresen i kamap long pes.

Helt opis long Is Nu Briten kliarim ol tok win long HIV/AIDS sut

LONG Is Nu Briten, ol kain tok-tok i no stret i wok long kamap we i sut long ol pipel i gat sik nogut HIV/AIDS.

Long ol ripot, ol toktok i go olsem sampela lain husat i gat dispela sik nogut i wok long raun na givim sut long ol arapela pipel wantaim posin binatng na ol i ken kisim bagarap long dispela sik tu.

Dispela ripot i wok long pre-tim planti memba bilong publik long Is Nu Briten na ol i autim ol wari long dispela samting long radio.

Provinzel Helt edvaisa Bernard Lukara i laik mekim klia long publik long provins olsem em no hap long wok bilong Helt Edukesen na Aweanes program long givim sut long ol man olsem hap bilong HIV/AIDS aweanes. Em i tok tu olsem Helt Dipatmen i no laik pretim publik long en.

Em i tok Helt Aweanes infomesen we ol i save autim long publik em long sevim laip na i no long pretim ol man samting. Mista Lukara i tok ol Helt Aweanes ektiviti na program i sut long HIV/AIDS we dipatmen bilong em i wok long karimaut i kamapim gupela samting long mekim ol man i

toktok Ina askim ol kwesten long ples klia long dispela samting we pastaim i tabu na ol pipel i no save toktok long en namel long ol. Em i tok yumi ken traime hat long senisim dispela pasin long sem na tabu long toktok long sik nogut ya HIV/AIDS.

Em i tok ol pipel i pret long dispela sik bikos long kikbek bilong em long wan wan man na sosaiti.

Em i tok bikos sik ya i save kisim ol kain man, maski ol i bikman, ol liklik man, ol wait na blakman na bilong wanem lotu, i moabeta long publik long senisim pasin bilong ol na noken rabisim ol manmeri wantaim sik nogut ya.

Em i tok long ol dispela tok win long provins we publik i wok long harim na pret long en, ol helt opisa i bin mekim wok painimaut long en na i painim olsem em ol giaman toktok tasol ya.

Mista Lukara i tok i gat lo bilong lukautim ol pipel wantaim HIV long ol man i no ken bagarapim ol na i gat lo tu long givim mekim save long ol lain husat i save olsem ol i gat dispela sik na ol i laik bagarapim narapela.

Level bilong nois we i ken bagarapim rot bilong harim

Wanem level bilong nois i ken bagarapim rot long harim bilong man?

Sapos nois i stap long bekgraun na yu laik singaut o toktok bikipela antap long mekim ol narapela i harim yu, dispela tu i no gupela long yu bilong yu.

I gat skel long makim level o mak bilong nois we inap bagarapim rot long harim o sapos i gupela. Dispela skel em ol i kolim long desibel.

Sapos yu stap long eria we nois level i abrusim 85 desibel insait long eitpela awa long wanpela de long planti kismas, dispela i mak long bai yu bungim hevi long yu i pas. Sapos level bilong nois i kamap bikipela, hevi long yu pas bai bagarap moa.

Sapos level bilong nois i go antap long tripela-faipela desibel, dispela bai hapim level bilong bagarap long yu. Tasol wan wan man i no wankain long wanem level bilong nois i ken bagarapim yu bilong ol. Dispela em bikos bosu bilong wan wan man i no wankain na tu sapos ma. i kisim ol strongpela kemikel, drag. Narapela samting yu bilong ol. Dispela em no gupela long ol liklik bebi long stap long ples we i gat bikipela nois long en tasol ol i save putim ol liklik bebi we i no bikipela na mama i karim ol long inkubeta o spesel bet we planti nois i kamap long en.

Ol lapun i save bungim hevi long yu i pas bikos dispela i we bilong em taim manmeri i go lapun, tasol sapos ol bin wok long wanpela indastriyel kampani we i save kamapim planti nois, man bai i bungim moa hevi long yu bilong em taim em i lapun.

Ol man i bin luksave long bagarap we ol nois i save wokim long bipo yet. Na olsem long taim bilong ol Roman Empaia, ol bin save peim kompensesen ol wokman husat i wok wantaim ol hevi metal samting bikos ol i luksave olsem dispela kain wok i mekim planti man i yau pas.

Long tude, planti woklain na pipel long ol bikipela kantri long wol we i gat ol bikipela wok olsem ol faktori, ol main na ol bikipela wok olsem i gat hevi long harim. Na dispela i kamap olsem wanpela bikipela sik tru. Na ol dispela kantri i save tromoim bikipela mani long peim kompensesen long hevi we ol woklain i bungim long nois long wokples. I kam inap nau, i nogat marasin o rot long daunim hevi we nois i save kamapim bagarap long pipel. Wanpela rot tasol em long traime stapim hevi long noken kamap. Ol i wokim dispela long helt edukesen, ol wan wan man i wokim samting long daunim hevi ya na daunim nois long dispela samting we i save kamapim bagarap long yu long wokples.

WANTOK

NIUSPEPA BILONG YUPU NA PAPIA NUGUIM STREET

Ol paitman winim plis long pawa gan

TAIM Plis i baim helikopta bilong ron antap long skai na lukdaun long ol stilman na ol stil ka, dispela i givim bikpela salens tru long ol stilman long tingting pastaim na mekim eksen bilong ol. Bikos sapos ol i wokim trabel na ronawe long lek o long ka, bai helikopta i ron antap long lukluk i kam daun long ol na bihainim ol i go stret na holim ol.

Helikopta bilong plis i bin helpim long holim sampela trabel man pinis long ka. Tasol klostu tasol long Novemba 1999 i laik pinis, na ol sampela man nogut i go long Megriga Bareks long 9 Mail na sutim dispela helikopta long sotgan. Ol i bagarapim dispela helikopta bai em i no ken flai moa.

Taim ol 5-pela stilman i hensapim helikopta bilong Pacific Helicopters long Desemba las yia na i laik stil long PNGBC beng long taun, dispela helikopta i no stap long ronim ol na holim ol. Olsem na ol plisman i mekim bikpela wok long sutim dispela helikopta i pundaun kam daun na ol i sutim ol dispela man nogut.

Sampela man husat i lukim dispela i tok olsem em i lukim piksa. Tasol sapos helikopta bilong plis i bin kamap tu na tupela helikopta i pait antap long skai bai yu ting wanem, stail o muvi piksa o?.


Plis i tok ol dispela stilman i yusim ol bom na strongpela masin gan bilong pait we inap kamapim bikpela bagarap long ol manmeri na ol samting. Na tu ol i ken winim plis fos long pait. Sapos ol man nogut i gat ol strongpela masin gat, long wanem rot tru ol i kisim ol dispela strongpela masin gan bilong pait. I nogat fektor i bilong wokim ol kain kain stail sotgan long hia. Gavman i mas lukluk strong insait long dispela samting nau bikos taim ol man nogut i holim ol strongpela pawa gan, ol i ken winim strong bilong plis fos na ami na winim strong bilong gavman tu. Olsem na sapos gavman i stap long lukautim kantri, em i mas kamap wantaim rot bilong daunim dispela hevi. Ol hailans i pait wantaim ol strongpela strongpela pawa gan winim ol plisman olsem na ol plisman i go lek na lusim bikos ol i no inap. Bai ol trabel lain i pinisim ol plisman wantaim ol ka bilong ol. Taim ol plisman i westim taim long senisim katres i stap, ol raskol pamim wanpela taim tasol na 10-pela o 20 katres olgeta i sut nabaut na kilim ol plisman o birua.

Ating gavman i mas baim ol kompas gan na givim ol plisman. Ol i ken stap longwe na glasim tasol long kompas na sutim ol raskol pundaun long graun. Narapela tu ating gavman i mas baim ol bom gan na givim long ol plisman. Sapos ol raskol i ronawe long ka o sip, pamim tasol bom gan i go bomim sip o ka bilong ol na pinism ol wan raun tasol.

Ating ol plisman i mas gat ol moa pawa gan na strongpela samting bilong pait wantaim lo na oda long pretim ol trabel pait lain long hailans na ol raskol long siti. Lo bilong gavman i mas go hat tu long husat man i stil wantaim sotgan i mas kalabus 20 krismas, kilim man em go laip yia, bagarapim meri em laip yia o mekim ol bikpela raskol pasin 25 krismas long haus kalabus.

Lo na oda em bikpela samting we i ken mekim kamap gutpela kantri we developmen na gutpela sindaun inap kamap. Sapos lo na oda i go nogut, planti samting bai i go nogut na bisnis bai bruk daun, planti gutpela senis i no inap kamap.

Oltaim gavman i save toktok long givim moa mani long strongim lo na oda na wok bilong plis fos tasol nogat wanpela gutpela risal i kamap yet. Moa manmeri i wok long dai olgeta wiken, plis i wok long kaunim moa mariwana diwai long olgeta hap ples, planti yangpela i het longlong pinis long smok mariwana, planti meri i bungim birua yet long ol man nogut na planti arapela moa. Ating plis i mas taitim tasol lo bilong kalabus i mas go strong moa na tu ol plis i mas stat long yusim ol strongpela pawa gan bilong pait wantaim ol man nogut husat i gat ol samting bilong nogut bilong pait tu.



Ol hap hap nius

Nali testim Gavman o testim Lo?

• Gavman i makim Gabriel Dusave olsem menesing dairekta bilong Investment Promotion Authority (IPA) long dispela wik. Tasol long Trinde aste, Minista Michael Nali i rausim em gen. Mista Nali yet i makim Dusave long dispela wik tasol em i senisim tingting na rausim gen Dusava bikos i gat planti komplek na toktok i kamap. Michael Nali i olsem lida bilong Gabriel Dusava long pati bilong ol Pipels Progres Pati (PPP). Dusave i bin kamap memba bilong Yangoru Saussia long 1s Sepik provins long 1997 nesenel ileksen. Tasol Ombudsmen Komisn i painim em asua long brukim sampela lo we i banisim wok bilong ol lida bilong kantri taim em i bin wok olsem Seketeri bilong Foren Afeas Dipatmen pastaim long em i go sanap long ileksen.

Ombudsmen Komisn i bin skelim em i brukim lo long rekot bilong mani i no stret na opis bilong Foren Afeas dipatmen i kisim nem nogut.

Bikpela kot bilong Lidasip Traibunel i bin kamap we kot i painim Mista Dusava asua long brukim ol lo bilong lida. Em i bin apil planti taim egensim disisen bilong Lidasip Traibunel na go kamap long Nesenel Kot na tu kamap long Suprim Kot tasol olgeta i apil bilong em i abrus.

Dispela longpela kot bilong Mista Dusava long klinim nem bilong em long ol sas bilong mani na wok i paul long opis bilong Foren Afeas i mekim na ilektoret bilong Yangoru Saussia i nogat memba bilong palamen long 1997 yet inap nau 2000. I gat kot oda bilong kaunim gen ol balot pepa bilong 1997 nesenel ileksen we narapela kendidet i kisim 6-pela vot abrusim Mista Dusava.

Dusava i gat nem tu long ol wok painimaut long toktok bilong tupela bikpela haus long Australia ol i kolim Kens Konsevetri na Malagan Haus. Dispela ripot tu i no pinis yet.

• Man i go pas long PNG Difens Fos soldia long rausim Sandlain ami long 1997, Meja Walter Enuma i kamap gen long kot long sas bilong ronawe long Boroko plis sel. Tasol loya bilong Meja Enuma Powes Parkop i tok em i skelim olsem ol plis i no sut stret long dispela sas. Ol i kisim ol toktok na ripot bilong ol i go bek long 1997 hevi bilong Sandlain we Enuma wantaim ol sol-

dia i go pas long en long rausim ol dispela ovasis ami long PNG.

Mista Parkop i tok sapos plis i laik kotim Meja Enuma long sas bilong rausim ol Sandlain ami, i gat ol arapela bikman bilong gavman, ol lida bilong kantri na ol bosman bilong ami tu i stap long plis i sasim ol na i no Meja Enuma wanpela. Mista Parkop i tok dispela kot i no sut stret long sas bilong em tasol i kalap nabaut.

• Ol lain bilong yumi long Sauten Hailans provins i wok long surukim pait i go yet bihain long dai bilong olgeta Gavana Dick Mune. Bikpela pait we ol i yusim ol sotgan na kilim dai planti lain na tu bagarapim ol wok na sevis long provins i kamapim bikpela nius insait long Papua Niugini olsem wanpela provins bilong ol bikpela trabel pait. Plis ripot long dispela wik i tokau olsem ol i luksave long sampela strongpela sotgan we ol man i yusim long pait wantaim birua bilong ol. Na ol i luksave tu olsem ol dispela sotgan em bilong ol ami we i bin lus long banis bilong ol sotgan long Mosbi las yia. Plis ripot i tok tu olsem ol man bilong pait o long kilim man i wok long hait namel long ol meri na ol liklik pikinini husat i go pas long fran long soim kros na belhat. Na ol man tu bilong kilim man i save hait namel long ol. Ol i tok i soim olsem sampela ami o soldia bilong PNG Difens fos i stap insait long dispela birua long provins.

Taim olpela Gavana Dick Mune tu i bin dai, pait tu i no bin liklik. Bikpela pait moa we planti samting i bagarap. Long las wik tu ol lain long Mendi tu i mekim bikpela pait na ol plisman i hat long stapim bikos ol dispela birua lain i yusim ol strongpela pawa sotgan winim ol sotgan bilong ol plisman.

Plantil ol bikpela tok hat i wok long i go kam nau long ol lida bilong Sauten Hailans provins long mekim samting long stapim dispela kain birua na trabel long provins. Toktok i kamap olsem ol lida yet i save go pas long sapotim o mekim rot bilong ol birua samting i kam long en na go long ples we o ples lain bai yusim long mekim trabel. Olsem na ripot i tok ol lida yet i mas save long we bilong stapim ol trabel na birua insait long provins. Long dispela pait long Mendi, ripot i tok tripela man i dai pinis.

OPIM AI

wantaim
Kena'e Ka'au

Amamas bilong krismas na nupela yia i go long yupela olgeta

YES, planti pipel i autim wankain toktok long olgeta hap bilong dispela wol long olgeta pipel. Tasol wanem as tru bilong dispela ol toktok. Wanem kain tingting i stap long ol lain husat i mekim dispela toktok na tu long ol lain em dispela toktok i go long ol. Mi tu mi mekim dispela toktok long planti manmeri na long ol pikinini tu long taim bilong krismas, i kam inap nau. Ating mi mas stop nau bikos i luk olsem ol dispela toktok i nogat mining moa.

Moabeta sapos yumi i tok, 'amamas i mas stap wantaim yu long olgeta de.'

Mi no ting em i gutpela sapos amamas i stap long tupela o tripela de tasol na ol narapela de long wanwan yia em i nogat amamas.

Na sapos mi mekim dispela toktok, bai moabeta sapos mi yet mi ken givim sampela amamas i go long ol lain em mi mekim dispela kain toktok long ol. Mi save olsem long planti lain mi bin mekim ol dispela toktok, mi no inap givim wanpela samting long amamasim ol. Na tu planti bilong ol i nogat wanpela samting o rot bilong amamasim ol yet long ol dispela de.

Yes, sapos yu ritim o harim ol toktok em ol bikman na ol bikpela kampani bilong kantri i mekim long dispela taim, man, ol i at planti gutpela toktok long mekim. Tasol i nogat wanpela gutpela samting i bihainim ol dispela toktok. Ol ino inap givim mani o amamas bilong ol long helpim ol turangu.

Mi yet mi bin gat narapela tingting tu taim mi mekim dispela toktok long ol pipel. Mi gat amamas bilong Jisas long bel bilong mi na dispela amamas mi laik givim i go long narapea. Amamas bilong Jisas em ino bilong toktok tasol. Em i mas go wantaim sampela pasin o eksen bilong autim dispela amamas. Na sapos yu gat amamas bilong Jisas long bel bilong yu em bai i hat long ol arapela samting i daunim dispela amamas. Na amamas bai i stap oltaim.

Na olsem wanem long taim dispela toktok i kam long yu. Wanpela pren i givim mi dispela toktok. Mi bekim, 'tenkyu tru tasol mi no klia tru lo'g amamas em yu toktok long en.' Sapos amamas pren i tok long en i kam long Jisas, em mi laikim. Bikos em bai stap oltaim. Sapos em bilong dispela graun, em bai pinis wantu. Long dispela taim tu mi luksave olsem, long dispela 100 yia i go pinis, bikpela wok bilong ol pipel long dispela graun em long bagarapim sindaun bilong ol narapela. Em long traime win na kamap nambawan.

Ol i kamapim ol samting bilong pait. Ol i kamapim ol pait na sampela i pait yet. Tasol i luk olsem olgeta bai lus yet.

Bikpela samting bai bagarapim sindaun bilong ol pipel em ol bagarap i kamap nau long bus, graun na wara. Yes, sampela bilong ol dispela bagarap i kamap bikos i gat ol pait. Bikpela moa i kamap bikos ol pipel i gat inap, tasol ol i laikim moa yet.

Dispela neks 100 yia mi laik tingim gen toktok bilong John F. Kennedy wanpela president bipo bilong Amerika na askim yupela ol rida long tingim na bihainim.

Em i tok 'Noken toktok na askim long ol wanem samting yu laikim kantri bilong yu bai wokim long yu, tasol askim yu yet, wanem samting yu inap long wokim long strongim kantri bilong yu.'

Olsem ol hevi i kamap nau long bus, graun na wara. O ol hevi i kamap nau long kantri bilong yumi. Yumi wanwan mas sanap na mekim. Yumi noken wetim ol narapela.

Yes. Amamas bilong krismas na nupela yia i stap wantaim yupela oltaim.

WANTOK spot wiken

Liklik nem tim pawa long Pot Mosbi

POT Mosbi mens sofbal i bin lukim wanpela bikpela win stret we ol tim i nogat nem i mekim save long biknem tim las Sande.

Malangan husat i sindaun daunbilo tru long poin lata i semim stret AB Bears 2-1 long kisim tupela poin. Arapela tupela gem ya em NGI i daunim pawa bilong MSC 7-2 na Tigers i winim sempion tim Brown Eagles 6-1.

Insait long arapela ol gem, Manalos i surik i go bek long namba foa ples bihain long em wilwilim stret Dolphins 7-2 na Hawks i stat long win gen bihain long em i waraim stret Burmah Raiders 12-1.

Bihain long gem long las wiken, poin lata nau i sanap olsem Gazelle na Bears i stap long 23 point, Hawks 18, Manalos 16, MSC 15, NGI 14, Brown Eagles 13, Elcom 12, Malangan 10 na

POM MENS SOFBAL RIPOT

Raiders na Tigers 8 na Dolphins 4.

Malangan em tim i nogat nem tru long kompetisen ya. Tasol taim Joe Avuchulas jnr i mekim wanpela asua na ol i stat long skoa.

AB Bears i go pas wantaim skoa 1-0. Na ol i inap long banisim dispela skoa na noken larim Malangan skoa.

Tasol i bin gat bikpela presa stret long infil pilaia bilong AB Bears na ol i no tromoi gut bal i go long poroman bilong ol.

Orait Willie Boas i skorim namba wan ran taim wanpela asua i kamap long infil bilong Bears. Na skoa nau i sanap 1-1.

Arapela asua i kmap taim pitsa bilong A Bears Anselam Bunbun taim em i no pits gut long larim Bernard Tito long kam winim skoa 2-1.

Dispela gem nau i mekim nau na Bears i stap wantaim Gazelle long namba wan ples. Malangan nau i surik i kam long namba 9 ples long poin lata.

Dispela win bilong Malangan tu i givim sans long tim sapos ol i ken winim sampela moa gem na stap insait long fainel 5.

Brown Eagles i mas senisim pasin bilong ol sapos ol i tingting long win. Las wik egensim Tigers, tingting bilong ol pilaia bilong Brown Eagles i no stap stret long dispela gem na ol i lus 1-6.

Tigers i kamapim gutpela gem bikos ol beta bilong em i soim tru laik long kisim tupela poin ya. Ol pilaia olsem Peter Simon Eremas Simba na Henry Tibe i kamapim gutpela gem we ol i skorim sampela poin.

Ol i kisim gutpela sapat i kam long Francis Diap na Isacc Wartovo.

MSC i wok long mekim planti liklik asua na ol i lus long NGI. Win bilong NGI i kamap bihain long tupela pilaia i paitim hom ran we i kam long Michael Pukai na Leonard Palauva insait long namba wan ining na namba tri ining.

Pukai i bringim tripela arapela pilaia long kam hom taim em i paitim hom ran ya.

Tupela hom ran bilong Elcom i kam long Demas Tovia na Simon Daniel i no helpim tim long win ya bikos Manalos i kirapim paia stret long rekotim win.

Pitsa bilong Manalos Tommy Kipma i paitim wanpela hom ran long bringim em yet wantaim Danny Mong na Jerry Edward long kam hom.

Nogat mani long salim aussie ruls tim: Gori

AUSSIE RULS RIPOT

WOKABAUT bilong nesenel aussie ruls tim i go long Nu Silan i bin stap bihain long PNG Aussie Ruls Futbol Kaunsil i no inap painim mani.

Dispela wokabaut bilong PNG tim, Mosquitoes i go long Nu Silan bai kosim Ruls Kaunsil moa long K90,000 olgeta.

Presiden bilong PNG Ruls Futbol Kaunsil Thomas Gori i tok olsem tim menesmen bilong PNG Mosquitoes i askim em sapos dispela wokabaut i stap bikos ol i no painim inap mani.

Gori i tokim pinis presiden bilong Nu Silan Ruls Futbol Kaunsil (NZRFC) Will McKenzie olsem PNG tim i no inap kamap long dispela salens.

Dispela tingting long mekim dispela wokabaut i bin kamap las yia bihain long PNG na Nu Silan i opim wanpela gem namel long Western Bulldogs na Hawthorn long Wellington las Januari 29.

PNG Mosquitoes i winim Nu Silan na nau ol Nu Silan i laik bekim tru long as graun bilong ol tasol dispela bai i no inap nau.

"Mak bilong kina i go daun tru na arapela samting tu, wanwan pilaia bai tromoi K3000 olsem levi fi ya long go stap insait long dispela tonamen. Na K3000 em i bikpela mani tru ya," Gori i tok.

Dispela mani bai karamapim wokabaut bilong tim, na tu haus slip, kaikai na balus tiket bilong go na i kambek.

Gori i tok eksekutiv bilong em i no laik long kisim dinau long mekim dispela wokabaut bikos dispela bai i no helpim tru spot insait long kantri. Bikpela tingting bilong PNG Rules Futbol Kaunsil (PNGRFC) nau em long kamapim spots long kantri.

Presiden bilong PNGRFC i mekim bikpela tok amamas tru long ol opisel na ol pilaia husat i taitim bun long mekim mani long go stap long dispela tonamen.

Nau yet PNGRFC i tingting long go stap insait long tonamen bai kamap namel long ol Pasifik Ailan kantri. Dispela tonamen bai kamap long Fiji we ol kantri olsem Samoa, Nauru, Fiji na Central Desert Eagles na PNG yet bai resis long em.

Gori i tok PNGRFC tu i wok long tingting nau long traim pusim aussie ruls long stap insait long Saut Pasifik Gems 2003.

PSSA bai i no givim sans

PSSA RIPOT

HENRY MORABANG i raitim

NCD Pablik Sevan Soka Asosiesen (NCDPSSA) bai i no inap givim sans long wanem klab i no baim K500 afiliiesen fi bilong em.

Presiden bilong NCDPSSA Bede Tomokita i mekim dispela toktok bihain long 9-pela klab i no givim mani bilong ol.

Tupela top tim olsem Air Niugini na NPF i no baim fi na i luk olsem tupela bai aut long dispela sisen ya. Ol arapela klab husat i no baim fi yet em Works, Transpot, POSF, NPF, NCC, NBC, Health, Commerce na Air Niugini.

Tomokita i tok olsem dispela ol klab i no baim fi bai i no inap kik long dispela wiken. Na sapos nem bilong tim i stap long dro, ol gems komiti bai tokim ol pilaia long noken kisim fil ya.

Em i tok olsem arapela bikpela samting tu em rejistresen bilong ol pilaia. Olgeta klab i mas baim dispela fi tu. Sapos wanem ol klab i yusim ol pilaia i no rejista, ol bai rausim poin bilong ol.

Presiden i toktok strong tu

olsem olgeta klab i mas baim rejistresen bilong ol pilaia bilong ol. Rejistresen fi em K20 long wanwan pilaia long divisen bilong man na tu divisen bilong ol meri.

Tomokita i tok em i sori tru long kain pasin we PSSA bai mekim tasol em i no inap helpim o sapatim ol klab.

Em i wari liklik bikos tupela biknem klab Air Niugini na NPF i no baim na i min olsem PSSA bai bihain yet disisen long rausim poin stat long Disemba 17 las yia. Em i min olsem Air Niugini na tu ol arapela klab husat i no baim bai lusim klostu long 6 poin olgeta ya.

Planti klab i ting PSSA em wanpela helpim grup long givim fri sevis o samting, ating dispela kain tingting i no stret ya. Ol klab i wok long yusim ol arapela klab na wok long pilai insait long kompetisen.

Tomokita i tokaut tu olsem PSSA i wok long painim hat long mani long baim ol voluntia husat i save katim gras long fil, pe bilong ol referi, na tu alauens bilong ol opisel husat i save lukautim gem.



• Kule Mata bilong Fisheries i autim stall bilong em egesim Cellnet insait long Pablik sevan soka kompetisen las wik. Tupela tim dro ya.

Norths sofbal tim i strong yet

POM WIMENS SOFBAL RIPOT

Wantok i no pilai gut long en na stat long skorim poin.

Wanpela liklik asua tasol i kamap em taim pitsa Fenella Sam i bin kisim bagarap taim bal i paitim em na ol i karim em i go aut long fil.

Wanpela ran bilong Wantoks ya i bin kamap long namba tu ining we Kurai Tovia i kam hom bihain long mama bilong em, Encie Tovia i paitim wanpela gutpela bal i go long lep autfil.

Norths i stat long mekim poin long namba tri ining taim Ellie Marsipal, Mechtill Raymond na Veronica Ulavai i kam hom.

Long namba foa ining, tupela tim wanpela i traim long skorim poin tasol ol i banisim gut trô ol yet.

Insait long dispela ining, pitsa bilong Wantoks Pauline Wakit soim tru olsem em i wanpela gutpela pitsa na i no larim wanpela

pilaia bilong Norths long paitim bal long winim namba wan bes. Em i kisim gutpela helpim tru i kam long ketsa bilong em Anna Trawen.

Sam na ketsa bilong em Robertha Kaul tu i mekim wankain na ol biknem beta bilong Wantoks olsem Kurai, Kolish Banam na Andrewlar Moe i painim hat traim stret ya.




Norths i kisim sampela skoa insait long dispela ining long skorim tupela ran we i kam long winim gem 6-1.

NORTHS i soim strong yet bihain long longpela malolo bilong Krismas na Niu Yia wantaim gutpela win egensim Shell Wantoks. Ol meri Rabaul i wilwilim stret ol susa ya, Wantoks 6-1 las wik Sarere.

Insait long arapela gem Gold Cup Gazelle na Mazda i kisim wanpela isi win stret bihain long Malangan na Chebu i no soim pes. AB Bears i waraim stret ol Valvoline All Stars 14-2.

Norths i kamapim gutpela pilai bihain long ol glasim gut eria we

Ol wiken spot eksen long Pot Moshi



Paiyo joinim Westley long Paramatta Eels

PILAIA bilong Kumul Elias Paiyo i sainim gen tupela yia kontrak wantaim Kellyville insait long Sidney Metropolitan kompetisen.

Dispela Kellyville, em susa klab bilong Paramatta Eels husat i save pilai insait long Nesenele Ragbi Lig kompetisen.

Paiyo i sainim kontrak las Novemba wantim dispela klab na i bin kam malolo long ples na go bek gen.

Dispela bai givim sans nau long Paiyo i go pilai insait long Paramatta long bikpela Sidney ragbi lig resis.

Em i tok olsem em i amamas tru long dispela ofa bilong Eels na em i gat bikpela tingting nau long pilai strong na traim stap long prima tim.

Kontrak bilong Paiyo i tok olsem Kellyville bai givim wok long em, na em bai wokim sevis ran wantaim ATCO kampani - wanpela tenspot na bilding kampani.

Paiyo i kam hait tasol long kantri na bihain em i redi long go bek long joinim gen klab ya. Planti ol arapela klab long Metropolitan i laikim sevis bilong em long pilai wantaim ol tasol em i strong yet na stap wantaim Kellyville.

Ol klab ya i bihainim sevis bilong em bikos ol i lukim em i pilai gut tru long PNG Kumul husat i salensim ol Aborijin tim bilong Australia.

Wanpela klab long France tu i laikim sevis bilong em tasol em i ting olsem ofa bilong Kellyville i gutpela.

Kompetisen bilong Nesenele Ragbi Lig long Australia bai stat long Mas 4 bikos long 2000 Olimpik Gems long Sidni.

Kellyville bai holim tupela gem pastaim bihain em bai gem tru bai stat ya.

Paiyo husat i save pilai huka bilong PNG Kumul bipo i tokaut olsem em i amamas tru olsem arapela PNG pilaia David Westley i sainim wanpela kontrak wantaim Paramatta Eels.

"Mi amamas long David i joinim Paramatta long dispela sisen bikos em tu mangi long Papua Niugini ya," em i tok.

Paiyo i save trening aninit long lukaut bilong olpela biknem winga bilong Paramatta na tu Australia Kangaroo Eric Grothe.

"Grothe i helpim mi planti trai tru na em yet i tokim kosa long traim holim mi yet long klab long nara-pela tupela yia." Paiyo i tok.

Bipo long gem, Paiyo i tok em i save toktok wantaim Grothe olsem 20-30 minit bipo long em i ran go insait long fil ya.

"Grothe na kosa bilong mi i save yusim long lock na huka, ol i tok olsem ol i gat wanpela gutpela plen long bihain taim," PNG Kumul pilaia i tok.

Paiyo i wok long kamapim nem tru namel long ol Paramatta sapota na em i laik traim holim fom bilong em long traim winim wanpela spes long go pilai long Wol Kap long France.

Em i tok Metropolitan kompetisen i wok long strong tru bikos planti ol pilaia husat i no winim

kontrak gen long NRL i wok long go pilai insait long dispela

kompetisen ya. Dispela kompetisen nau i gat

12-pela tim olgeta bihain long tripela nupela klab i kam join ya.



• Ol pela kumul huka Elias Paiyo i save kism bikpela sapot long ol wanplis bilong em long PNG.

Belo bai lusim Vipers

JOE KANEKANE i raitim

BIKNEM fowet bilong Mosbi Vipers Cedric Belo bai lusim Vipers laim long wanem em bai go skul long Lae long dispela yia.

Belo husat i wanpela bilong bik lain husat i wok long sambai bihain long Vipers tim insait long ol pilai bilong ol long ol yia i go pinis i tokim Wantok olsem em bai go long Lae.

Em i tok em bai skul long Lae Teknikel kolis olsem na em bai no inap stap wantaim ol Vipers.

"Kampani bilong mi salim mi go skul long Lae. Mi no save wanem tim bai ol i kism mi i go pilai wantaim long wanem mi no save wanem samting i bai kamap long Lae," em i tok.

Belo i wanpela bilong ol fowet we ol selekta i wok long putim was long ol long kism ples bilong sampela ol Kumul fowet husat i wok long lusim stail strong long pilai bilong ol.

Em i tok em i no save sapos em bai stap insait long Bombers sait long wanem gat planti ol gutpela pilaia i stap long Lae tasol em i laik pilai wantaim wanpela klab we i



• Cedric Belo long taim memba long Pot Mosbi Vipers tim husat i resis long SP inta citi cup

gat gutpela sponsa na menesmen.

"Sapos ol Bombers selekta i makim mi em gutpela sapos nogat mi mas traim bes long winim tingting bilong ol olsem mi ken stap insait long wanpela kain sait olsem. Lae i gat gutpela ol pilaia olsem ne mi mas wet tasol," em i tok.

Belo i bin pilai wantaim Kime Bulls taim tim i go insait long resis bilong Inta-Siti resis na bihain em i pilai wantaim Mosbi Vipers inap long tupela yia olgeta.

Dobo Warriors makim nupela opisel

WANPELA ragbi lig klab insait long Pot Mosbi, Dobo Warriors, i makim ol nupela opisel long go pas long klab long 2000 sisen.

Warriors em wanpela strongpela klab we planti ol pilaia i kam long hap bilong Koiari, em ol papa graun bilong Pot Mosbi siti.

Dispela klab tu i gat nem we em i saplaim Pot Mosbi Vipers wantaim tupela pilaia olsem Patrick Kenosi na Cedric Belo.

Ol nupela opisel em Sam Petrus i kamap presiden. Olpela presiden Job Ebei i kamap olsem namba tu na sekretari-bilong klab em wanpela wokman bilong British Amerikan Tabako.

Petrus i tok klab i bin kamap gut tru tasol i wok long go daun bikos ol olpela opisel i no lukautim gut. Long tupela yia 1998 na 1999, klab i painim planti hevi tru bikos menesmen bilong klab i no gutpela tumas.

Insait long 2000 sisen, nupela presiden Petrus i tok em i laik wok gut na traim bringim klab i kam antap long top faiv. Las yia, klab ya i sindaun daunbilo tru long as bilong poin lata.

Em i tok klab em bilong ol pipel insait long Koiari na em i laik kism sampela pilaia insait long Koiari Lig long Sogeri Lig.

Dobo Warriors klab tu nau i singaut long olpela na nupela pilaia long kamap long trening long Apex Oval long Boroko. Trening ya bai kamap long Mande na Trinde.

Klab nau i tingting long surikim sampela yangpela pilaia i go pilai long A gret we ol bai kism helpim long sampela biknem pilaia olsem Obert Batia, Geno Maino, John Bana, Boli Boli, Norris Selu, Lawrence Selu na Cedric Belo. I gat ripot olsem Belo nau bai go stap skul long Lae na bai joinim wanpela klab long Lae.

Magani i statim trening nau

MAGANI ragbi lig klab long Pot Mosbi i statim pinis trening bilong em long nupela 2000 sisen.

Trening ya i stat long Mande na bai ran inap sampela taim bihain long ol klab opisel i tokaut long trening de tru.

Magani klab i holim yet sevis bilong Colin Geno, Galama Mulaga, Noel Orim, Backo Naipao na Winnie Peset.

Klab menesmen tu i amamas long tokaut olsem Karo Pat i joinim gen klab husat i bin go pilaia wantaim wanpela klab long Grup 20 long Nu Saut Wels Kantri kompetisen las yia.

Arapela samting tu em Magani klab i amamas olsem Adrian Genolagani i joinim gen klab bihain long em i lusim Souths.

Las yia em go pas long redim tim Souths husat i winim Pot Mosbi gren fainel na bihain tu em i go pas long tim long taim Souths i stap insait long resis bilong Cambridge Cup las yia.

Ol biknem tim i no soim laik long pilai

IAN KAKARERE i raitim

TUPELA tim husat i pilai long gren-fainel las yia, Niwaf Raiders na Rusa Cowboys i no soim laik long stap insait long 2000 ragbi lig sisen bilong Kiunga.

Nau yet tripela arapela tim Fly Hawks, Waliya na Tigers tasol i bai pinis afiliesen fi na i soim pes long jenerel miting we i bin kamap las wik.

KIUNGA LIG RIPOT

Presiden bilong Kiunga Ragbi Lig Yangtem Katie i tokim Wantok olsem arapela tim olsem Airport Norths i soim laik long joinim kompetisen na i bin soim pes long miting, tasol ol i no baim yet afiliesen.

Katie i tok em i guria stret olsem tupela tim ya i no soim laik na i no kamap long jenerel miting na tu i no baim afiliesen fi bilong tupela .

Presiden i tok pri-sisen bilong

Kiunga lig bai stat long Januari 23.

Kiunga lig em wanpela bilong foapela ragbi lig asosiesen insait long kantri i baim ful afiliesen i go long PNG Ragbi Futbol Lig (PNGRFL). Ol arapela senta ya em Kagua, Kundiawa na Raibaul.

Katie i tok taim em i stap lukautim divisen bilong Famili na Komyuniti Sevis, em i yusim sampela mani bilong Not Flai distrik

long baim afiliesen fi bilong Kiunga i go long PNGRFL.

Fly Hawks husat i laik rausim nem nogut bilong em long dispela ya na laik kamapim gutpela gem long dispela yia.

Presiden bilong Hawks Peter Tatano i tok klab bilong em bai traim painim wok bilong ol sinia pilaia olsem wanpela rot long kism ol gutpela pilaia long traim winim

sempionsip long dispela yia.

Planti ol pilaia bilong tim i kam long Kiunga na Lake Murray distrik we planti bilong ol i painim hat long mani na ol i go bek long ples bilong ol ya.

Em i stretim toktok bilong wantaim wanpela kampani we ol sinia pilaia bilong klab nau bai wok olsem sekyuriti gat long lukautim bris bilong Kiunga. Na dispela bai holim bek ol pilaia long sapatim na pilai strong long klab.

Zeming opim Teptep spots festival



• Ol sumatin wantaim tisa (holim kundu) i mas long opisel opening bilong Nayudos Amon Union Spots festival long Teptep. Foto: Opis bilong Deputi Praim Minista.

DEPUTI Praim Minista Mao Zeming i bin opim Nayudo Amon Union Spot tonamen long Teptep stesin insait long Madang provins.

Mista Zeming i bin kamap olsem spesel visita bilong Mema bilong Kabwum Ginson Sanou na memba bilong Raikos Stahi Musa. Dispela spots tonamen bilong Nayudo Amon Union em bilong ol pipel insait long Raikos na ol Kabwum pipel.

Taim Mista Zeming opim dispela tona-

RUREL SPOTS RIPOT

men em i askim olgeta pipel na tim husat i kamap long pilai long soim gutpela pasin bilong spotman.

Em i tok pasin bilong pilai i ken kamapim gutpela sindaun namel long ol yangpela na tu ol bikman long ples.

Deputi Praim Minista i toktok strong tru long ol yangpela long lusim pasin bilong bikhet na hambak na traim givim samting

go bek long komyuniti. Na pasin bilong pilai spot em i gutpela samting stret.

Long strongim toktok bilong em, Mista Zeming i askim long noken bihain kain pasin we tupela pipel bilong Siassi, em iektoret bilong Deputi Praim Minista yet long traim kamapim spaK brus (marajuna).

Bihain long Mista Zeming i opim dispela spots festival em i bin flai i kam bek gen long Pot Mosbi.

Cellnet i ken kamapim gutpela gem

HENRY MORABANG i raitim

CELLNET i mas painim nupela straika long kisim ples bilong Henry Bae long fowat sapos ol i gat tingting long stap insait long fainel.

Sapos straika Bae i gat tingting long skorim gol, ating Cellnet i nap winim dispela gem egensim Fisheries isi tru.

Yangpela boi Bogia ya i kisim planti gutpela sapot tru long midfil tasol em i mas guria liklik o mas poret long golkipa bilong Fisheries na abrusim mak ya.

Pilaia kosa Joe Ganisi na papa bilong tim Charles Hayes i mas skelim tim gen na makim ol gutpela straika long skorim gol ya. Planti ol sapota bilong Cellnet long saittain i no amamas tumas.

Fisheries husat i go pas long poin lata i

PSSA RIPOT

mas lap long Cellnet ya. Bikos sapos Cellneti win, ol bai abrusim Fisheries.

Ol man bilong painim pis tu i no slek. Ol i wok long taitim bun stret long kamapim gutpela pilai egensim Cellnet.

Ol Fisheries i gat wanpela gutpela sans taim straika bilong ol i kikim wanpela strongpela bal i go long golkipa bilong Cellnet tasol boi ros ya i wokim stail na rausim bal ya.

Fisheries i gat sampela ol gutpela pilai long Difens klab olsem Kule Matu i go pas long tim. Em i wok long kisim strongpela sapot i kam long Noan Pakop husat em hapman tu bilong sutim dat ya.

Ol meri Cellnet i soim strong bilong ol taim ol i nekim Fisheries 2-1.

Insait long arapela soka nius, NCDC man na meri i winim gem bilong ol 3-0 egensim biruwa tim NAQIA long Sarere.

Long gem bilong ol man, NCDC i skorim tripela gol bilong ol insait long namba tu hap bilong pilaia.

Biknem pilaia na kosa Joe Aisa yet i go pas long dispela win. Arapela tupela gol i kam long Tommy Sispurea na Paul Kaniyoisi.

Arapela pilaia husat i givim sapot long NCDC i win em tarito David Kaepapa. Em i poromanim gut tru Aisa long kamapim gutpela gem we ol straika i painim tu tru long skorim gol.

Na long gem bilong NCDC meri na NAQIA, Ricky Jonathan na Annette Kora Aisa i go pas long tim long winim dispela gem. Skoa bilong ol meri i sanap olsem NCDC 3 na NAQIA 0.

Graun bilong holim 2003 SPG i gat kot

GRAUN we ol i makim long wokim ol haus slip bilong 2003 Saut Pasifik Gems long Fiji nau i gat bikpela toktok i kamap long en.

Gavman bilong Fiji i no laik baim K5 milien long 12 hekta gran we ol i makim long wokim haus slip na ol ples pilai bilong 2003.

Insait long wanpela niuspepa ripot, Fiji Times, dispela graun em wanpela lokel kampani Rups Investmen i kisim na baim long K668,000 tasol nau ol i apim pe i go long K5 milien olgeta.

Minista bilong Spots long Fiji Gavman Ponipate Lesavua i tok prais bilong graun em i antap tumas, na gavman nau i wok long toktok wantaim dispela kampani long kisim graun bek ya.

Em i tok olpela gavman i givim dispela graun i go long Rups Investmen na nau nupela gavman i laik kisim bek graun na mekim ol gutpela samting long em.

Ripot long Fiji Times tu i tokaut olsem Gavman bilong Saina bai wokim K20milien developmen we bai redi long holim 2003 SP Games.

POM UNION RIPOT

Wanderers winim 7's fleg

WANDERERS ragbi union klab i winim namba wan taitel bilong em long NCD Rugby Union Sevens compeition. Nupela klab ya i autim biknem tim, Harlequins 24-10 long Bava Park oval las wiken.

Dispela sevens tonamen i bin kamap long Sarere na fainel i kamap long Sande. Ol Wanderers i putim Maroon jesi na ol i autim tiket bilong Defence 26-7.

Harlequins i go long finel bihain long ol i winim Yunivesiti 24-17.

Na long Kap fainel, Wanderers i gat 7-pela ol intanesenel pilaia long tim na ol i salim Harlequins husat i gat sampela ol intanesenel pilaia tu olsem Andy Agovaua, Norman Tokunai na Joe Kautu.

Tupela biknem pilaia olsem Willie Arthur and Paul Pomo so i go pas long dispela win bilong Wanderers. Ian Leklek husat i lusim Harlequins i joinim Wanderers i bin kamapim gutpela gem stret long nupela klab.

Kodineta bilong Pot Mosbi Union Sevens Ian Liveras i tok olsem wanwan klab i ken putim tupela tim insait long kompetisen we ol i ken gat sans long pilai insait long fainel.

Insait long arapela nius, nesenenel trening skwat bilong nesenenel sevens bai stat sampela taim neks wik we ol pilaia bilong arapela senta bai kam long Pot Mosbi long trening bilong ol.

Bai i gat tupela pilaia bilong Mt Hagen, 6-pela bilong Goroka, 11-pela bilong Lae and 5-pela bilong Daru.

Ol top rana bai traim bes long makim PNG

OL TOP rana bilong Papua New Guinea i tokaut pinis olsem ol bai traim givim moa trening long winim taim bilong stap insait long 4x400 relay resis long Sidni Olimpik Gems long Sidni, Australia long Septemba.

Ol rana ya i mekim dispela toktok bihain long wanpela miting wantaim presiden bilong PNG Atletik Yunion presiden Tony Green long Nesenenel Spots Institut long Goroka, Isten Hailens provins.

Green i tok olsem em i wokim wanpela mak pinis we i ken helpim ol dispela rana

long traim winim taim bilong Sidni Olimpik.

Dispela 4x400 mita em i gutpela stret, na PNG rana i gat gutpela sans moa long 4x100. "Mipela i gat strong long 400 we ol pilaia olsem Jeffrey Bai na Clement Abai i ken mekim gutpela ran.

Tasol nau yet i gat tupela rana husat i ken ran insait long 47 sekens long kisim mak bilong 3minit na 7 sekens. Tupela rana ya em Ivan Wakit na Mowen Boino.

Ol arapela pilaia em Peter Pulu, Elias Roboam, Varo Varo, Juniu Irima, Samuel

Bai na Jonathan Miria. Green i tok kwalifaing taim i mas 2 sekens moa long nesenenel gems rekot we PNG tim i brukim long 1991 Saut Pasifik Gems long Pot Mosbi.

PNGAU i bilip olsem ol rana bilong nesenenel tim i ken brukim rekot sapos ol i kisim gutpela sapot long ol gavman na ol sponsa.

Wakit husat i makim maus bilong ol rana i tok ol i ken winim kwalifaing taim sapos olgeta i tren wantaim long NSI na tu resis wantaim long ol ovasis kompetisen long

Australia. PNGAU nau i wokim wanpela program we ol bai salim i go long Nesenenel Olimpik Komiti long sindaun na klasim long painim sponsa.

Insait long arapela stori bilong atletik, samting olsem 46 rana na 14 kosa i bin pinisim tu wik trening bilong ol long NSI long las wik Fraide.

Dispela kem em bilong redim wanpela tim long Osenia sempionsip we bai kamap long mun Ogas na tu Olimpik Gems long Septemba long Sidni.

Ripot long Indonesia ami laik tekova no tru

Jakarta, Indonesia

Presiden Abdurrahman Wahid bilong Indonesia i putim strongpela tok lukaut egensim ol toktok long plen we ami bilong em i laik rausim gavman bilong em, ol ripot i tok.

Presiden Wahid i tok gavman bilong em bai givim bikpela mekim save long ol lain husat i karimaut dispela samting.

Em i tripela mun tasol bihain long nupela gavman bilong Presiden Wahid i tekova long olupela lida bilong kantri long 32 kris-mas, Presiden Suharto.

Insait long wanpela bung wantaim ol niusman, ol bin askim em long dispela samting bikos ol i harim ol tokwin long sampela ami lain i ken wokim samting long rausim gavman taim ol no amamas long sampela samting.

Wanpela long ol em pasin we gavman i laik wokim long kisim i go long kot ol ami lain husat i kilim dai na bagarapim nating

planti pipel bilong Is Timor. Wanpela long ol em Politikel na Sosel Afeas Minista husat i bin olupela ami bos, Jenerel Wiranto. Ol ripot i kamap olsem Presiden Wahid i laik rausim Mista Wiranto tasol em i tok dispela i no tru.

Washington long las wik i bin givim tok lukaut long ami bilong Indonesia i noken mas salensim demokretik gavman bilong Presiden Wahid.

Ambasada bilong Amerika long Yunaitet Nesens Richard Holbrooke i tok Amerika i wari taim em i harim nius long plen bilong ami bilong Indonesia i laik rausim gavman.

Long las wik, Presiden Wahid i bin rausim mausman bilong militeri long gavman Meja Jenerel Sudrajat long ol toktok em i wokim olsem Presiden Wahid i no suprim komanda bilong ami long Indonesia. Bos na sief bilong ami staf Jenerel Agus Wijoyo i tok ami i nogat plen long rausim na tekova long gavman.

Moa pipel dai long Ambon

Ambon, Indonesia:

Ol ripot long dispela wik i tok seven pela moa pipel i dai long Ambon long pait namel long ol Kristen na Muslim. Na moa i kisim bagarap. Dispela em antap long 50 pipel we ol ripot i tok ol i dai pinis long pait namel long tupela grup ya.

Ol ripot i tok pait i bin kamap long masohi taun we i stap long Seram Ailan.

Moa trabel namel long ol Muslim na kristen long Indonesia

Jakarta, Indonesia:

Planti tausen Muslim lotu memba i bin kukim wanpela Kristen sios biling na ka long Lombok, ol ripot i tok.

Lombok em wanpela turis ailan.

Ol ripot i kam long Antara nius ejensi i tok trabel i bin bruk taim palnti tausen Muslim lotu lain i no wanbel long hevi na pait we i wok long go het yet namel long ol Muslim na Kristen long Maluku, ailan provins i stap klostu long Lombok.

Ripot i tok ol Muslim lain i bin wokim paia na kukim haus lotu na tu wanpela ka wantaim.

Ol soldia na plisman i bin stapim ol

Muslim grup taim ol i laik bagarapim ol arapela Kristen sios na biling, ol ripot i tok.

Long Maluku we ol i kolim tu long Spais Ailan, hevi na pait namel long ol Muslim na Kristen grup i bin stat long Januери las yia na i wok long go het bikpela yet. Samting olsem 2,000 pipel i dai pinis long dispela pait.

Ol Muslim lotu lain i karimaut protes long Indonesia bikos ol i tok gavman i no wokim samting long stapim ol pait na kilim dai man long Maluku Ailan. Sampela bikman long Muslim lotu i laikim bai i mas gat Islamik Holi wo long daunim ol dispela hevi.

Amiman bilong Indonesia kisim sas long Is Timor hevi

Is Timor:

Plis bilong Yunaitet Nesens i holim pasim na kalabusim wanpela amiman bilong Indonesia long wanem em bin wanpela long ol husat i kilim dai ol Is Timor pipel long Liguica Katolik Sios las yia, ol ripot i tok.

Ol no autim nem bilong dispela man tasol ol ripot i tok ol UN plis i bin holim pasim em long ples bilong em long Liguica long dispela wik Mande. Saspek ya i bin memba bilong Besi Merah Putih (Red White Iron) militia. Nau em i stap long Dili haus kalabus we ol intenesenel pis kipa i lukautim. Em bai kamap long kot long Dili long ai bilong ol nupela jas bilong Is Timor we ol bin makim ol long wok bilong ol las wik tasol.

Ol UN plis i bilipim olsem namel long 50 na 100 pipel i bin dai long mun Epril las yia long Liguica taim ol ami bilong Indonesia na ol sapota bilong ol i paia na sutim ol. Sampela de bihain gen, ol milia ya i bin kilim 13 pipel long haus bilong Manuel Carascalao, wanpela Is Timor independen lida husat i bin wok long lukautim sampela refuji long haus bilong em.

Dispela em namba wan saspek we UN plis i holim na sasim em na we namba wan sas grup bilong Is Timor bai sasim em.



Samting long tingim taim bipo

• Dispela dolman o ston monumen i sanap long Dolmen Pak long Sunchan long Korea. Sunchan, Posong na Hwasun provins long Korea em tripela eria we ol bikpela ston konstraksen i sanap i stap. Pastaim ol i ting taim ol bikpela wok devel-opmen i kamap olsem wokim ol dam long banisim wara, ol bai brukim ol dispela bikpela ston monumen we i gat histri long en. Dolmen Park long Sunchan Kaunti i gat nainpela dolmen i sanap, sevenpela haus ol i wokim long ston na ol arapela samting i sanap i stap. Ol dispela samting em ol i wokim long ston namel long taim bilong Niolitik na Brons Ej. Korea i bin gat moa long 80,000 dolmen 30 krismas i go pinis tasol ol i bagarapim planti bilong ol taim ol i wokim ol bikpela konstraksen na tu kamapim ol len developmen. Piksa i kam long *Newsreview* megesin.

Ol wansolwara nius

Forum kisim \$A7.2 milien long Australia

Suva, Fiji:

Australia i givim \$A7.2 (K13.3 milien) milien long Saut Pasifik Forum Seketeriet long karimaut ol wok bilong em insait long tripela yia i kam, ol ripot i tok.

Ripot i tok dispela em nupela rot Australia i bihainim bikos pastaim, em i save gviim mani long wan wan yia.

Hai Komisina bilong Australia long Fiji Susan Byod taim em i sanim dispela tripela yia agrimen wan-

taim eking Seketeri Jenerel bilong Forum Iosefa Maiaave i bin tok dispela i bikpela samting na i gutpela bikos em bai givim sans long ol rijinel grup long plenim na redim ol wok bilong ol na ol noken wari long sait bilong mani.

Em bin tok tu olsem dispela i gutpela bikos taim mani i stap, seketeriet bai i go het wantaim wok long givim sevis long rijen na kain sevis we ol i laikim Forum long givim.

Fiji Times kot wantaim gavman long edita

Suva, Fiji:

Kot bai wokim disisen long wok permit bilong Edita bilong *Fiji Times* niuspepa long dispela wik.

Biknem milenia papa bilong niuspepa bilong Australia Rupert Murdoch i papa tu bilong *Fiji Times* niuspepa. Na gavman bilong Fiji i bin putim oda long rausim *Fiji Times* Edita Russel Hunter long las mun yet bikos em no amamas long sampela ripot we niuspepa bilong em i wokim.

Hai Kot long Fiji i bin givim tok orait long *Fiji Times* nius-

pepa long skelim na glasim pasin we gavman i bin wokim long tambuim Mista Hunter long stap na wok long Fiji na givim em wanpela mun tasol long lusim Fiji long Desemba. Disisen bilong kot bai larim Mista Hunter i stap long kantri inap kot i harim keis bilong em.

Loya bilong niuspepa Everett Leung i apil egensim disisen bilong gavman bikos em i tok disisen i no bihainim imigresen lo, gavman i bin wokim wanksait disisen na i no wokim long gutpela rot.

Ol stilim ol samting bilong pait long Solomon Ailan

Honiara, Solomon Ailan:

Ol stil lain long Honiara, Solomon Ailan i bin stilim ol samting bilong pait long wanpela trak long dispela wik, ol ripot i tok.

Na plis long hap i bilipim olsem bai narapela trabel i kamap gen long kantri.

Long las yia, i bin gat trabel na hevi namel long ol Guadalkanal na Malaita pipel. Sampela pipel bilong Malaita i bin dai long en na samting olsem 10,000 moa i bin ronawe lusim ples bilong ol.

Olpela praim minista bilong Fiji Sitiveni Rabuka i bin kamap olsem namel man na stretim tupela grup long kamapim bek bel isi pasin na gutpela sindaun namel long tupela grup ya.

Asisten Plis Komisina John Hcmelo i tok sampela stilman husat i karim ol gan i bin go insait long plis pos long Auki, biktaun bilong Malaita na lokim ol plis opisa long rum na kisim ol samting bilong pait long amari na ronawe.

Washington, Amerika:

Liklik boi Cuba stap insait long intenesenel hevi

Long dispela mun, nius i kamap bikipela long wanpela liklik pikinini bilong kantri Cuba long Saut Amerika.

Nem bilong manki em Elian Gonzales husat i gat siksipela krismas.

Na nius bilong em i kamap bikipela long intenesenel level bikos ol gavman bilong Amerika na Cuba i stap insait long en. Dispela em long ol toktok we bai liklik manki bai stap long en, papa long Cuba o long ol hauslain long Amerika.

Ripot long stori bilong liklik boi ya em osem em bin wanpela long ol manmeri na pikinini husat i bin stap long wanpela bot i karim sampela lain bilong Cuba i go long Amerika, tasol em i kapsait. Taim ol arapela lain i lus, Elian i bin stap laip na ol i painim em. Na ol hevi na kot i kamap taim ol i laik painim ples na ol hauslain bilong pikinini i stap long en. Papa bilong pikinini

i stap long Cuba taim ol ankel na hauslain i stap long Amerika.

Nau hevi i kamap bikos gavman bilong Amerika na Cuba i bin go insait na ol tok kros namel long ol i kamap. Na pikinini i stap namel taim tupela i pait na i no kila wanem kantri em bai stap long en.

Orait, kot disisen long Amerika long dispela wik i skruim rait long lukautim Elian long papa bilong em husat i stap long Cuba.

Atoni Jenerel Janet Reno i tok sapos sampela lain i laik salensim dispela, i moabeta long ol i go long Federel Kot na i no long Stet Kot. Ms Reno i tok Stet Kot i bin givim tok orait long pikinini i stap long Amerika inap long Mas 6 taim kot bai harim keis bilong em, tasol dispela i no inap long abrusim disisen bilong Federel Kot.

Jas Rodriguez bilong Miami i bin tok boi ya i mas stap long Amerika inap long Me 6 long wetim kot.

Em bin wokim dispela disisen long givim taim bilong harim ol toktok long Lazaro Gonzalez, ankel bilong Elian husat i laik bai boi i stap wantaim em long taim em i wetim kot.

Tasol dispela i egensim Imigresen na Naturelaisesen Sevis oda we i laikim boi i go bek long papa bilong em long Cuba.

Belgrade, Yugoslavia:

Ripot tok NATO bom kilim dai 2,000 Yugoslav pipel

Ripot bilong Yugoslav ami jenerel i tok pasin we NATO ami i bin wokim long bomim Yugoslavia i bin kilim dai 2,000 pipel. Na bikipela mak long ol dispela i dai em ol pikinini.

Jenerel Lazarevic em Yugoslav ami jenerel husat i wokim ripot i tok NATO i no bin inapim tru wanpela gutpela samting we ol bin laik long kamapim tasol ol i bin kilim moa long 2,000 pipel bilong Kosovo las yia long pait namel long ol Yugoslav ami na ol Kosovo paitman.

Jenerel Lazarevic i bin wanpela long ol top komanda long taim pait i bin kamap strong na NATO i bin lonsim ea straik long traim stapim Presiden Slobodan Milosevic long pait egensim ol Albania pipel long Kosovo. NATO Ea straik na tromoim ol bom long Yugoslavia i bin pinis taim Yugoslav ami i bin lusim Kosovo na Yunaitet Nesens intenesenel pis kiping grup i tekova na go insait we nau em i lukautim i stap.

Vitina, Yugoslavia:

Soldia bilong Amerika bagarapim pikinini Albania

I gat ripot osem wanpela soldia bilong Amerika i bin bagarapim na kilim dai wanpela liklik meri Albania husat i gat 11 krismas long Kosovo.

Oi i autim nem bilong soldia ya osem Staf Sajen Frank Ronghi na em i wanpela long ol 50,000 intenesenel pis kipa husat i wok long lukautim Kosovo stat yet long Jun 2 las yia bihain long NATO i karimaut

wo egens long Presiden Slobodan Milosevic na gavman bilong em. Sajen Ronghi husat i wanpela wepon skwat lida i stap nau long ami sel na wet long ol i transfere em i go long Jemeni.

Ami ripot i tok ol bin painim bodi bilong liklik meri long las Fonde na ol bin bagarapim em bipo ol i kilim em.

Oi Kosovo Albania i save lukim ol US pis kipa osem ol hiro bihain long Amerika i bin sapotim strong NATO bom kempin long Yugoslavia las yia.

Argentina:

Biknem soka sta i sik



Biknem soka pilaia na kepton bilong Argentina, Diego Maradona wantaim namba 10 jesi. Em bin keptonim Argentina long 1994. Na long henkais, Maradona i toktok long ol niusman. Piksa i kam long Weekend Australian niuspepa.

Biknem soka pilaia long wol, Diego Maradona, man husat i bin skorim bikipela sko long las senseri i slip i stap long haus sil long Uruguay, Argentina long Saut Amerika.

Planti manmeri long PNG husat i save bihainim ol spot pilai bai luksave long nem bilong dispela biknem soka hiro long wol.

Maradona i gat 39 krismas na gutpela skin bilong em we em save pilai wantaim i no luk gut. Long dispela taim em i sik na ol ripot i tok ol strongpela drag we em save kisim i bagarapim em.

Tasol long gut taim bilong em, em bin keptonim Argentina na kisim em i go long winim Inglan long 1986 Wol Kap. Long dispela taim, em bin yangpela manki tasol wantaim 16 krismas. Na em bin kamap osem nesenenel hiro. Long dispela pilai tu, hap tok we planti long spot wol i save long en i bin kamap taim Maradona i skorim gol na dispela em long "Han bilong God i wokim na em i skorim gol" na kwiktaim bihain gen, em bin skorim narapela gol we Argentina i bin winim Inglan.

Man we planti soka fen na long sait bilong spot i lukim em osem namba tu biknem soka pilai long wol bihain long Pele i save gat hevi wantaim ol drag na dispela i wok long daunim em yet.

London:

Lapun man tru kalabus long drag sas

Kot i painim wanpela lapun man Inglan osem em i rong (gilti) long haitim salim ol strongpela drag.

Oi ripot i tokol i bilip osem dispela man ya em i stap long rekot osem namba wan lapun man long Inglan long kisim sas na kalabus long dispela kain rong.

Nem bilong man ya em Joseph Causton na em i gat 75 krismas.

Oi ripot i tok man ya i bin stap insait long wanpela mali milien grup we i save hait na salim kanabis, em strongpela drag osem mariwana namel long Not Afrika, Marabella long Spain na Inglan.

Lapun Joseph i bin ronim gutpela bisnis bilong em long baim ol tin plam tomato long Spain na salim long Inglan.

Tasol samting tru tru em insait long ol kago bilong ol tin tomato plam, ol bin save haitim na putim ol tin kanabis we ol i redim pinis long salim long Inglan, Snaresbrook Crown Kot i bin harim osem.

Oi opisa husat i bin painaut long dispela samting i bin kirap nogut long rot we ol lain ya i bihainim long wokim hait gut tru

na salim ol drag ya na ol atoriti i no save painim ol.

Oi i save weldim gut tru ol tin, putim ol lebol o mak osem ol tru tin tomato na ol atoriti i no inap long kwestenim ol. Oi i savew putim ol hap prais long ofodim ol long abrusim ol atoriti long ol kain kwesten.

Traipela bubu Causton bilong Bradwell Avenue, Dagenham, Essex i no bin bisi taim kot juri we i gat eitpela man na foapela meri i glasim, skelim na wokim disisen insait long tri na haf awa long en. Em bin wok long tok em no wokim rong.

Kot i bin sasim em i rong long gat 2,061 kilogram hevi kanabis we sapos i salim bai kisim faiv milien paund long en.

Em bai kamap long laspela kot long Februari 11.

Long wanwik kot, ol i harim rot we plis i bin karimaut ol wok na painim rot bilong drag bisnis i stat long Not Afrika we ol i kisim kanabis, putim long sip na salim i kam long Marbella long Spain we ol i putim gut tru long ol foa kilogram tin tomato bipo ol i salim ol long Inglan wantaim ol arapela trupela tin tomato.


Japan:

Noken ting osem ol Buka tasol i save pilaim ol bambu ben o flut, nogat ya. Oi Siapan tu ya



• Oi memba bilong Bambu Okestra i holim wanpel; a woksop bilong ol pikinini long Play Park, Setagaya long Tokyo. Oi pikinini i wokim ol han marimba na givim wanpela mini konsert long ol instramen bilong ol. Piksa i kam long Pacific Friend megesin.

Moa stori long dispela neks wik.



• Oi Kosovo refuji i ronawe lusim ples Racak long las yia taim hevi na pait i stap long ples bilong ol. Piksa i kam long Refugee megesin.

Luksave long ol turangu nogut lain

YAKAM KELO i raitim

LUKSAVE em singaut o askim bilong ol sampela disebel o turangu lain insait long Morobe provins. Na dispela Luksave singaut em ol i laik bringim i go aut tu long ol arapela provins insait long Papua Niugini.

Long graun i gat kain kain manmeri bilong kain kain ples wantaim kain kain skin kala. Na olgeta manmeri i no wankain, maski yumi i wankain long lek, han, bodi na pes. Tasol insait tru long lewa na sol bilong yumi em yumi i no wankain long wanpela narapela.

Yumi i gat kain kain bodi tu we i no wankain. Sampela i bikpela fatpela, sampela i longpela tru, sampela i sotpela na sampela i no stretpela bodi olsem planti i gat. Ol dispela lain husat i gat krungut bodi long lek o han o bek-sait samting em yumi save kolim ol, ol turangu lain. Long tok Inglis ol i kolim ol disebel (disable) lain.

Papua Niugini em i wankain long planti arapela kantri we i gat ol turangu manmeri olsem (disebel) i stap. Ol i olsem mama i karim ol olsem yet we han o lek o bodi bilong ol i no stret.

Olsem na planti taim famili bilong ol yet i save wok hat long helpim na sapotim ol long kaikai, waswas, senisim kolos, muvim bodi na arapela samting moa ol i ken mekim long amamas na stap



• Morris Dangka Billy i sindaun wantaim sampela famili long wanpela betde pati long Mosbi.

pasin i save mekim dispela pikinini i pilim nogut long bel na tingting na dispela tingting i ken bagarap laip bilong dispela pikinini long bihain.

Morris Dangka Billy bilong ples Zageheme Dedua long hap bilong Tewae Siassi eria long Morobe provins i bin tokaut olsem ol

gat long laip bilong ol olsem na ol i save traim wok strong long mekim sampela samting i kamap long lukautim ol.

Morris i tok em i no bilip olsem ol lain bilong em, em ol disebel lain o ol lain husat i no inap long mekim wanpela samting. Mi bilip ol lain bilong mi i ken mekim

long wanem kain save ol i gat.

Morris i tok insait long dispela intitusen o grup bilong ol, ol i mas traim long trenim ol disebel o turangu lain bilong ol long wok didiman, wok kuskus, mekim penting na droing, wokim samap na planti arapela samting ol i ken wokim. Olsem na taim ol i bung olsem grup, ol i ken sapotim ol yet gut. Mi bilip planti ol disebel manmeri em ol save lain tru long mekim wok. Tasol ol i nogat sapot o ol samting bilong mekim wok wantaim olsem na ol i stap nating na singaut long 10 toea 20 toea i stap, Morris i tok.

Long Morobe provins, ol lain disebel grup i bung pinis na kamapim sampela miting bilong ol pinis long dispela tingting bilong kamapim institusen o asosiesen bilong ol. Na Morris i stap nau

Planti ol turangu lain i save mekim sampela samting bilong lukautim ol yet o long sapotim ol long stap laip. Olsem na long ol strit olsem Lae, Mosbi, Hagen, Rabaul na planti arapela taun tu, planti ol turangu lain i save sindaun na putim plet long ol manmeri i tromoi wanpela 10 toea o 20 toea long ol. Ol i ken kisim ol dispela mani long baim kaikai na samting ol i sot long en.

wantaim famili bilong ol.

Tasol planti ol turangu lain i save mekim sampela samting bilong lukautim ol yet o long sapotim ol long stap laip. Olsem na long ol strit olsem Lae, Mosbi, Hagen, Rabaul na planti arapela taun tu, planti ol turangu lain i save sindaun na putim plet long ol manmeri i tromoi wanpela 10 toea o 20 toea long ol. Ol i ken kisim ol dispela mani long baim kaikai na samting ol i sot long en.

Long las wik, wanpela man turangu man olsem i bin autim sampela bikpela tingting na wari bilong em long Wantok niuspepa olsem insait long olgeta famili i mas gat wanpela pikinini em papamama i no save laikim tumas. Arapela bai papamama i mekim olsem feveret pikinini na wanpela tasol bai ol i no givim em bikpela laikim tumas. Na dispela

turangu lain long PNG i laik kamapim wanpela asosiesen bilong ol insait long kantri. Dispela asosiesen em ol bai kolim PNG Institute of Disabel we bai i makim olgeta turangu manmeri lek nogut, han nogut o hap bodi i nogut insait long Papua Niugini.

Morris yet em wanpela disebel man na em i tokaut olsem em i bin raun long Lae na Mosbi na i save toktok wantaim ol turangu lain olsem na kisim tingting bilong ol. Sapos ol i lain bilong kaikai buai, em bai i go sindaun wantaim ol na kaikai buai na stori wantaim. Na em i save askim ol, olsem wanem na ol i sindaun long rot na singaut long 10 toea 20 toea i stap. Na planti i save bekim olsem, ol famili bilong ol i no laikim ol na i no inap lukautim ol.

Morris i tok dispela wari em planti disebel o ol turangu lain i

kamap sampela samting. Ol i ken mekim wok we i ken kamapim kaikai, Morris i tok.

Morris i tok long em yet, em i ken bainim ol buk, wok gaden o mekim ol kuskus wok long opis bikos em i bin mekim dispela wok bipo wantaim Agrikalsa na Laivstok dipatmen na tu wantaim Moore Business System. Mi save olsem planti wanlain bilong mi tu i gat save, han na bodi bilong mekim kamap sampela gutpela wok, em i tok.

Olsem na as ol i laik statim dispela PNG Institute of Disable em long bungim ol dispela turangu lain bilong ol wantaim bai ol i ken traim long luksave long wanem kain save wanwan i gat long mekim wanem kain wok. Orait ol i ken traim long askim long kisim helpim aninit long nem bilong grup long givim trening long ol

lain long kisim vot bilong ol. Na taim ol i kamap memba long palamen ol i no moa tingim promis bilong ol long ol turangu disebel lain.

Olsem na Morris i tok ol i save bilip tasol long ol lida husat i save mekim wok tru bilong stretim gut sindaun bilong ol manmeri long komyniti na mekim tru toktok long ol pipel.

Em i tok bikpela God Papa i givim yumi olgeta manmeri wanpela spirit tasol. Olsem na maski yu gutpela man, maski yu kam pastaim na arapela i kam bihain long yu, God Papa bai skelim olgeta manmeri wankain tasol.

Morris i amamas long toktok em i bin harim long nius olsem memba bilong Nawae Kennedy Wenge i bin sanap long haus palamen na askim gavman long tingim ol turangu lain olsem insait long kantri.

Long las bung bilong palamen long mun Novemba 1999, Mista Wenge i askim gavman long kamapim sampela kain institut o banis bilong ol dispela lain han nogut, lek nogut na bodi nogut bai ol i ken i gat sapot na helpim tu bilong gavman.

Praim Minista Sir Mekere Morauta i bekim olsem ol bai lukluk long dispela samting bihain.

Morris Dangka Billy taim em i harim dispela nius, i tok dispela em olsem God i harim prea bilong mipela. Oltaim mipela i save prea long God i mekim givim gupela stia na tingting long ol lida bilong mipela long mekim gutpela wok bilong sevim ol pipel na kantari. Olsem na dispela nius i kamap olsem God i harim prea bilong mipela, em i tok.

Memba bilong Nawae Kennedy Wenge i tok em amamas tru long bung wantaim ol dispela lain disebel grup na em i laik wok klostu wantaim ol long iukim olsem dispela tingting ol i gat long kamapim insitutsen i mas kamap tru long lukautim na sevim interes bilong ol dispela turangu lain.

**FRI BAIBEL
KOS
LONG PAS**

I kam long wanpela pren long America sapos yu laikim fri kos salim nem na adres igo long:

**WOL BAIBEL SKUL
WBS - PNG 12,
P.O. Box 9346,
Austin, TX 78766 USA.**

Tok giaman na haitim rong em bikpela asua

MASTA WAI i raitim

SAPOS yu mekim wanpela bikpela asua, bai yu pret nogut na i no laik ol arapela manmeri: i save o plis i no ken holim yu na kalabusim yu. Olsem na dispela pret bilong yu bai mekim yu mekim planti giaman tok o pasin long traim karamapim ol rot we bai soim rong bilong yu. Dispela pasin i save kamap long olgeta de long yumi planti manmeri. I no long ol bikpela rong pasin tasol ol liklik asua pasin tu.

Long opis sapos yu mekim wanpela asua long kompyuta masin we yu presim rong baten na kompyuta i dai, bai yu pret na giaman wokabaut i go longwe na tasim ol pepa nabaut o stori wantaim narapela wanwok bilong yu long haitim asua yu mekim long kompyuta. Larim narapela lain i kam painimaut na ol yet i ken traim long stretim kompyuta masin. Dispela em tingting bilong ol nupela lain long wok husat i save laik traim tasol ol masin long traim kisim save long yusim. Bikpela toktok i stap ples klia olsem, sapos yu no save, askim bai arapela i ken helpim yu.

Noken pret long askim arapela long helpim yu. Bikos yu pret na sem long arapela bai luksave olsem yu no save long dispela masin, yu laik haitim na giaman olsem yu save. Na taim yu mekim asua, yu surik i go bek na hait na arapela i painimaut long samting i go rong na ol i traim sekim. Taim ol i askim tu husat i mekim dispela asua, nogat man i laik tokaut bikos ol i no laikim arapela save long hevi ol i gat long i no save long yusim masin o ol samting bilong wok. Long sait bilong wok, yu i no inap save hariap tru long mekim wanpela wok taim yu go stat nupela. Bai yu wok inap olsem tupela wik o wanpela mun samting long yu kisim strong long toktok wantaim arapela wokmanmeri, han bilong yu bai strong long save tasim ol samting bilong wok na tingting bilong yu bai op long wanem samting yu ken mekim. Em nau yu gat strong. Long dispela namel taim tu bai arapela wokmanmeri i mas kam toktok wantaim yu na helpim yu inap yu kisim sapot na strong.

Taim wanpela kampani i wok long bruk daun isi bikos bisnis i no inap pulim moa mani, papa bilong dispela kampani tu i bai haitim tru dispela samting. Em i no laikim arapela kampani long save bikos ol bai pulim nabaut ol kastoma o traim long tekova long bisnis ya. Beng tasol i save long kampani i pundaun o i strong yet long ron. Bai papa bilong dispela bisnis i tingting long traim arapela rot bilong kirapim bek na strongim bisnis bilong em. Olsem na em i no laik tokaut long hevi we i bungim em bikos long bikpela samting em i mas holim yet ol kastoma na bisnis interes bilong em i stap strong yet karamapim ol hevi we i wok long kamap. Bai i gat ol sain o piksa i kamap we kampani bai stat long rausim sampela wokman long wok, salim sampela kampani ka, salim ol sampela haus bilong kampani na traim long daunim bisnis i go daun

liklik long em i mas strong yet long stap laip na wok strong long kirap bek long bihain.

Ol liklik pikinini tu i save mekim planti giaman o hait pasin na toktok long haitim o karamapim ol rong ol i mekim. Ol bai sutim tok long narapela liklik manki na ol yet bai traim long abrusim pen papamama bai paitim ol.

Pikinini bilong i save mekim planti rong long haus we em i save sutim tok long bikpela susa bilong em. Taim em i kisim maka pen na rait nabaut nabaut long sait sait bilong haus, mi save kros na askim long husat i mekim dispela. Wantu em bai tok i no em, tasol bikpela susa bilong em. Tasol i save skelim long han rait na save olsem bikpela susa bilong em i save gut long rait na i no inap rait olsem kuka i wokabaut. Long san taim mi save salim ol pikinini long go slip. Taim ol igo lokim dua long rum bilong ol, ol bai giaman pasim maus na nois bai ino gat tru. Tasol tingting na het i wok istap na putim was taim mi o mama bilong ol i go aut long stua o kaikai buai long maket, wantu ol i kam aut na pilai pilai istap. Taim mipela i kam bek na askim, ol bai tok, ol i slip pinis na kirap. Wanpela trik bilong pikinini bilong mi em, taim em i les long kaikai, em bai kaikai wan spun tasol na giaman dring kol wara antap na giaman ron gen i go long toilet na mekim kain kain long yumi arapela i mas kaikai pinis orait em tu bai i tok em inap na bai em lusim hap i stap long frisa. Ol pikinini i save gat trik na giaman pasin bilong ol i stap. Sapos ol i mekim rong ol i no inap long tokaut tru.

Long politiks, wanpela memba o lida taim em i mekim giaman toktok o promis long ol pipel, em bai mekim kain kain eskus long olsem mani i nogat, gavman i no givim mani yet long distrik, mani i no go yet long pasbuk bilong em, na planti arapela giaman toktok moa. Lida i save olsem em i bin mekim sampela bikpela toktok long ol pipel na ol pipel i bihainim dispela toktok maus bilong em yet i bin pairap na mekim. Tasol long holim bel bilong ol pipel wantaim em long sampela taim i kam, em bai mekim sampela karamap toktok long welwelim bel bilong ol pipel na wet long sampela taim gen. Ol memba i no save tok stret long hevi ol i bungim o wanem samting ol i mekim na hevi i kamap. Ol bai haitim tru wanem as na mani i no i no kamap long pasbuk, o wanem as na mani i sot o pinis na arapela moa.

Taim wanpela memba i save go joinim wanpela pati politikel pati long gavman sait, em i no save tokaut tru long wanem as em i go joinim dispela pati. Ol bai karamapim toktok tasol na tok, ol pipel i laikim em i mas stap long gavman long bringim sevis i go long ol. Sampela i save tok, em i bilip long polisi bilong dispela pati bikos em yet i sanap tu long dispela kain polisi we inap bringim developmen na sevis i go long ol pipel bilong em long ilektoret. Tasol tok tru olsem ol i no laik stap longwe long ol hap we pawa i kam long en na mani wantaim ol gutpela samting bilong ol memba i kisim olsem potnait pe na alawens

na arapela ekstra mani bilong lukautim gut sindaun bilong ol memba. Sampela tu em ol lida i gat sampela praivet bisnis wok na ol i mas stap wantaim gavman bai sapot bilong givim moa bisnis i go long praivet bisnis bilong ol i ken kamap isi na ol bai mekim moa profit long praivet bisnis na kampani bilong ol. Long stap insait long gavman sait, bai bisnis bilong yu i no inap bungim salens o resis. Tasol em bai kisim moa bisnis na kastoma i kam na bisnis bilong yu i ken groa bikpela tu. Dispela em sampela bikpela tingting ol memba i save kalap kalap long wanpela politikel pati i go long narapela. Insait long 5-pela krismas long palamen, sampela memba i bin senisim pati o kalap long pati 4-pela o 5-pela taim pinis na ol pipel bilong ol yet i paul olgeta long ol.

Long ausait long rot o strit, yumi save kolim sampela giaman lain olsem ol konman. Ol dispela konman tu i gat bikpela save long mekim giaman toktok na kisim samting bilong yu. Ol i ken mekim yu bilip long ol na harim tok bilong ol.

Mi bin kalap long PMV long ples i kam daun long Lae long wanpela moning. PMV i lusim mi long taun na taim mi kam daun

wantaim han bek long sait bilong IPI Biding long taun, wanpela man i kam na tok halo long mi na askim, ol lain bilong yumi long ples i stap orait o? Mi paul olgeta long dispela man tu na mi askim em, husat lain yu askim? Na em i tok, ol lain bilong yumi long ples, yu stap long ples na i kam ya, olsem wanem, ol i stap orait o nogat? Mi paul olgeta na mi tok, kolim nem bilong ol lain bilong yu long ples ya. Man ya i lukim mi tok hat na bel hat nau, em lusim mi na i go. Long Mosbi tu, mi wanpela meri bilong mi i bin go long Hohola Supamakot long baim sampela kaikai long wanpela Sande moning. Mitupela na ol pikinini tasol i stap na tok yutupela i kam long stua. Mipela i karim sampela saksak na banana long ples i kam tasol yupela i no stap olsem na mipela i go lusim long haus bilong mipela. Apinun bai mipela i karim i kam, meri ya i tok olsem. Mi na meri bilong mi i paul tru bikos meri ya ino wantok bilong mipela. Meri ya i kirap gen na tok meri bilong mi pes bilong em i wankain tru long liklik susa

bilong em olsem na olgeta taim ol i save traim long toktok wantaim mipela. Meri ya i askim meri bilong mi long givim em K10. Na long apinun taim papa bilong ol i pinis wok na i kam, bai ol karim ol saksak na banana samting i kam long haus bilong mipela na bekim bek K10 tu wantaim. Taim mi luksave olsem meri ya i askim long mani, mi kisim tingting pinis na stat long wokabaut i go pas na meri bilong mi sanap toktok long meri ya nogat na lusim em na tekov bihainim mi.

Sapos meri ya i bin gat sampela hevi, inap long em i ken tokaut stret long mipela i harim. Tasol em i giaman haitim dispela hevi bilong em, na traim long mekim switpela toktok long mipela i amamas long em na givim em K10.

Olsem na mi bilip i gutpela moa long i no ken mekim giaman toktok. Noken karamapim hevi o rong bilong yu na mekim narapela samting long ol lain i bilip long yu. Noken tok giaman bikos yu no inap stretim tru dispela hevi bilong yu long dispela kain pasin. Tok tru, askim long helpim na soim stret wanem hap yu rong long en. Ating sindaun bilong yu bai gutpela long mekim samting long stret long stretpela rot bilong gutpela laip na gutpela sindaun.





Worena i kamap bikpela ples tru



LONG bipo bipo tru i gat papamama na wanpela pikinini man tasol ol i stap. Dispela pikinini man bilong tupela em save manki bilong wokim gaden na painim abus long bus.

Wanpela taim dispela manki i kisim spia bilong em na em go painim pik long bus. Taim manki yet kamap kiostu long wanpela bikpela mama ol i karim wara Amaku em lukim sampela naispela yangpela ol meri i wok long painim pis bihainim wara Amaku i kam daun. Boi lukim olsem em hait tasol i go long hap ol yangpela meri Maprik i putim samting long em. Boi isi tasol em haitim wanpela grasket bilong wanpela yangpela meri Maprik insait long kuna.

Taim ol meri Maprik painim pis pinis em san i go daun nau na ol laik go bek long ples long Maprik, taim ol laik kisim grasket bilong ol wanpela meri em painim grasket bilong em i no stap.

Ol poro meri bilong em painim grasket bilong em tasol ol i no lukim ol les na ol go bek long Maprik. Meri ya i wok long krai na sindaun i stap. Manki Worena hait insait long kunai na em kam ausait na tokim meri Maprik olsem yu krai long wanem.

Meri kirap na tok mi wok long painim grasket bilong mi olsem na mi wok long krai. Orait manki ya tokim dispela meri olsem maski, san i ron go daun pinis,

mitupela go long haus bilong papamama bilong mi.

Meri i orait tupela stat long wokabaut i go bek long ples bilong manki ya. Bipo tupela go bek long ples bilong manki ya em givim bek grasket long meri ya.

Bihain manki ya wantaim dispela meri tupela i marit na meri ya i karim wanpela pikinini man. Orait papa bilong bebi kisim

wanpela pik na em kisim meri blong em na bebi na ol go long ples bilong meri long Maprik.

Taim ol kamap long Maprik papamama bilong meri i amamas nogut tru.

Long nait ol manmeri wokim paia bilas patim kundu singsing i go inap tulait i bruk.

Long moning ol kisim tupela i go insait long haus tambaran

bilong Sepik na ol wokim sampela kastom pasin.

Bihain manki ya kisim meri na bebi bilong em na ol go bek long ples bilong manki ya long Worena.

Olsem na nau bai yu lukim planti manmeri bilong Worena na tu ol Maprik na Worena ol i gat wanpela tokples tasol.

Joe Ambros i raitim.



Nem: Regina Pau
Adres: Hawian Vocational Centre, P.O. Box 256, Wewak, ESP.
Save laikim: Go long lotu, pilai spots, pilai sook, mekim pren.

Nem: Regina Aio
Adres: Kuwiningini Catholic Mission, P.O. Box 51, Maprik, ESP.
Save laikim: Pilai sook, go long lotu, pilai volibal, mekim pren.

Nem: Mista Sam Gigmai
Adres: P.O. Box 3004, Lae, MP.

Nem: Johnathan Marins
Krismas: 16 (man)
Adres: Angoram High School, Private Mail Bag, Wewak, ESP.
Save laikim: Pilai spots long wiken, lukim vidio so. ritim buk, go long kalsa nait na danis.

Nem: Rodney Bau
Krismas: 16 (man)
Adres: Angoram High School, Private Mail Bag, Wewak, ESP.
Save laikim: Stadi, lukim vidio na TV, redim ol buk, niuspepa na waswas long Sepik wara.

Nem: Richard Gee Madaura
Krismas: 19 (man)
Adres: C/- Banara Catholic Mission, P.O. Box 142, Madang Province, PNG
Save laikim: Harim musik, tok pilai, tok pilai na pilai ol spots gem.

Nem: Irene Dilindwi
Krismas: 21 (meri)
Adres: Amahup village, P.O. Box 430, Maprik, ESP
Save laikim: Volibal, rit na harim musik, go long lotu, stori wantaim ol gel pren na salim pas long pren.

Nem: Andrew Kambum
Krismas: 17 (man)
Adres: P.O. Box 1583, Mt Hagen, WHP
Save laikim: Pilai volibal, soka, tas na basketbal, ritim niuspepa na mekim penpen.


Nem: Rod Steward Kosmei
Krismas: 16 (man)
Adres: P.O. Box 43, Ambunti, East Sepik Province.
Save laikim: Pilai soka, volibal, raitim pas, na harim lokol musik.

Nem: Molina Kosmei
Krismas: 19 (meri)
Adres: P.O. Box 63, Ambunti, ESP.
Save laikim: Go lotu, pilai volibal, harim rok na gospel musik, mekim penpen, lukim piksa na londri.

Nem: Isaac Appiah
Krismas: 20 (man)
Adres: P.O. Box 664, Agona Swedru, C/R Ghana.
Save laikim: Was long muvi, pilai soka, senisim ov presens.

Nem: Michael Saifo Ansong
Krismas: 20 (man)
Adres: P.O. Box 384, Agona Swedru, C/R Ghana.
Save laikim: Swim, pilai soka, senisim ov presens.

Nem: Miss Vida Doris Arhin
Krismas: 27 (meri)
Adres: P.O. Box 600, Caribbean Site #B5, Oguaa town, Ghana, West Africa.
Save laikim: Volibal, spoting gem, musik, danis, kalsa historik, raun, lav meking na mitim pipel. Mi painim man bilong marit tu.



Bilong wanem papamama tok nogat?

Di Pren,

Mipela harim ol hat taim yu bin kisim taim meri na yu i stap wantaim tasol nau i luk olsem gutpela na yu i stap longwe long meri. Dispela bai i mekim dispela ol hevi long i no stap wantaim yu moa. Sapos dispela meri bilong yu i stap yet wantaim mamapapa bilong em long haus, ating papa bilong em i no patim em moa bikos nau meri i no save raun wantaim yu o lukim yu.

Tasol hevi tru bilong ol papamama i pasim yu long maritim dispela meri i stap yet. Yu bin tok olsem yu traim long tokim papamama bilong em olsem yutupela i laikim narapela narapela na laik marit tasol. Yu bin askim mipela long givim sampela tingting long yu bai yu inap tokim papamama bilong meri olsem yu laikim tru dispela meri na laik maritim em.

Mipela laik tokim yu olsem yu traim na painim aut wanem as ol papamama bilong meri i no laik long yu i maritim pikinini meri bilong tupela. Ating tupela i ting pikinini meri i yangpela tumas long maritim yu? Ating yu kam long narapela provins na tupela laik bai pikinini lmeri i marit long wanpela man insait long provins bilong tupela yet? Ating tupela i ting bai yu no inap givim inap mqani na ol samting olsem braid prais? O ating i gat narapela ol as we tupela i tok nogat? Ating yu bin save long sampela bilong ol dispela samting, ating yu bai inap long tokim tupela olsem bai yu mekim wanem na ating bai tupela i ken senisim tingting na tok orait.

Sampela taum em bai hat long yu o meri long painim aut as tupela papamama i mekim dispela pasin sapos yutupela i toktok long tupela stret. I gutpela yutupela painim narapela rot, traim askim ankol o narapela wantok bilong meri long toktok long tupela papamama bilong meri. Yu ken tokim sampela wan lain bilong yu long toktok wantaim lain bilong meri.

Sampela taim i gutpela sapos yu i toktok wantaim wanpela pater o pasto. Dispela ken mekim na ating bihain long 6-pela mun o wan ya nabaut, ating tupela inap senisim tingting na larim yutupela i marit.

Sapos yu i no inap long painim aut as bilong tupela i tok nogat long dispela wei orait yu mas tingting long yu yet na traim mekim ol narapela samting.

Em i luk olsem yutupela meri bai bruk lusim narapela narapela o ating meri bai lusim ol lain bilong em na kam long yu. Tasol i gutpela sapos yu toktok wantaim meri long ol dispela samting pastaim.

Em i gutpela tingting tu sapos yub toktok wantaim famili bilong yu pastaim long yu mekim ol dispela samting. Ating em bai gutpela sapos wanpela wanblut bilong yu i toktok wantaim lain bilong meri.

I nogat sampela isi wei long tokim tupela papamama sapos tingting bilong tupela i strong pinis olsem yutupela bai no inap stap wantaim. Mipela laik askim yu long pre long ol dispela hevi yu i gat nau na wanem samting bai kamap bihain. Long pre, God i save heplim ol manmeri na soim ol narapela ol rot dispela hevi inap pinis.

Laiplain


Sapos yu i gatv wanpela wari, rait long LAIPLAIN, P O Box 6047, Boroko o telefonim mipela long 326 0011. Taim yu rait long mipela, ptis putim nem na adress bilong yu. Mipela no inap salim bekim i kam bek long yu sapos yu i no givim nem na adress gut. Mipela save toktok long ol hevi tru tasol bai mipela no inap givim nem na narapela ol toktok yu mekim long publik.

Di LAIPLAIN,
LONG ol ripela yia olgeta, mi bin kamapim wanpela strongpela pren wantaim wanpela meri insait long siti we mi bin wok pastaim long ol i transferim mi i kam long dispela ples kanaka nau mi stap long en.

Mi bilong narapela provins tasol mitupela i laikim narapela tumas na mitupela i bin pasim tok long marit bihain. Tasol ol papamama bilong meri i no laikim mitupela long i go raun wantaim o marit tu. Papa bilong meri i save patim em nogut tru taim em i painim aut olsem em bin i kam raun wantaim mi.

Mi bin i go lukim papamama bilong meri na tok save long tupela olsem laik bilong mitupela i pas pinis tasol dispela i no save senisim wanpela samting. Mi yet bilip tru olsem God i bin makim dispela meri olsem meri bilong mi stret. Hau bai mi inap long tokim tupela papamama olsem mitupela i laikim narapela narapela na laik marit?

Tingting strong long kamap man bilong em.




• Mensing Dairekta bilong Nesenel Fores Sevis Thomas Nen i witesim ol lapun i sainim sek long kism pinis pe bilong ol long Bulolo. Poto: Joe Kanekane.



• Ol soldia long Mosbi i sindaun harim toktok long wanpela straik ol i kamapim long apim potnait pe bilong ol.

PHONE CARDS



PRICE GOING UP SOON SO,.....
BUY AT THE CURRENT VALUE AND....


**SAVE!
SAVE!
SAVE!**

Card Unit	Current Value	New Price
5	K1.10	K1.50
10*	K2.20	K3.00
25	K5.50	K7.50
50	K11.00	K15.00
100*	K22.00	K30.00


* Currently out of stock

AGENTS:
BUY IN BULK AND GAIN ON COMMISSIONS
PHONE:
300 5091 or 300 5094.

 **TELIKOM PNG**
Now we're really talking!



• I no man nating . . . Provinsel Edministreta bilong Morobe provins Ainene Sengero traim sikarapim gita long las PMT miting pati. Poto: Franco Nebas.



• Ol tisa long Sentrel provins i wet ausait long edukesen opis long Mosbi long kism ol balus tiket.

Wantok Niuspepa Reaches the People who want Good Value

Some advertisers tend to underestimate the buying power of the average Wantok Niuspepa reader without appreciating the dynamic attributes of Wantok's audience.

Wantok Niuspepa is reaching 150,000 readers per week. Consider this is more than twice the readership of any other newspaper.

Most read the Wantok word for word. Every advertisement gets the attention it deserves,

Wantok Niuspepa readers are loyal in their product preferences. Price is a concern but familiarity and perceived value guides their buying behaviour.

Advertising in Wantok Niuspepa can influence their buying patterns and create loyal customers of your product and services range.

Wantok Niuspepa is reaching the readers who really matters and it will be to your advantage to educate your target market more thoughtly.

Wantok Niuspepa can be your alternative point of sale venue in merchandising your product and services. After all, consumer conversion can only come through approaching your target market directly.

ADVERTISING SPACE COST ... PRICES QUOTED EXCLUDES 10% VAT

Advert Size	Mono	One spot colour	Two spot colour	Full colour
Full Page - 38cm x 7col	K 944.30	K1,194.30	K 1,444.30	K 1,944.30
Half Page - 28cm x 5col	K 497.00	K 747.00	K 997.00	K 1,497.00
Half Page - 19cm x 7col	K 472.15	K 722.15	K 972.15	K 1,472.15
Quarter Page - 19 x 4col	K 269.80	K 519.80	K 769.80	K 1,269.80

Compare Wantok's cost per column cm !
K3.55 per col/cm against the Dailies K6.52 for the same size!!
Volume discount rates are also available on request

Nupela soka asosiesen bai kamap long Mosbi

HENRY MORABANG i raitim

I GAT bikpela plen nau long kirapim wanpela nupela soka asosiesen insait long Pot Mosbi long dispela ya.

Nem bilong nupela soka asosiesen ya em Hiri Soka Asosiesen we Samuel Basim na Alphonse Kurabi i go pas long statim.

Tingting bilong kirapim soka asosiesen i bin kamap bihain long jenerel ileksen bilong Pot Mosbi Soka Asosiesen we Kuma Aua i

autim tiket bilong Dokta Kuam Malai long resis bilong presiden.

Sampela sapota bilong Dokta Malai olsem Baku Bakuwai, Basim na Kurabi i tingting long statim dispela asosiesen.

Mista Basim i tokim *Wantok* sampela taim i go pinis olsem nupela Hiri Soka Asosiesen i kisim ful sapot bilong Sosel Sevis divisen bilong Nesenel Kapital Distrik Komision.

Em i tok nupela soka asosiesen i tingting long bringim tu ol soka tim bilong ol viles insait long Hiri konstituensi long resis.

Kurabi i tokim *Wantok* aste olsem tingting na plen i gutpela tru olsem Hiri Soka Asosiesen bai holim wanpela miting Kone Tigers klab long Waigani long Sarere. Dispela miting ya bai stat long 3 kilok.

Kurabi em wanpela olupela pilai na kosa bilong Blu Kumuls klab long Pot Mosbi bipo na em i gat save long wok bilong soka.

Em i laik mekim tok kia olsem dispela nupela soka asosiesen em i no salensim PMSA nogat. Dispela asosiesen ya em long

traim bringim soka i go long ol pipel insait long NCD.

Dispela nupela asosiesen bai mekim Pot Mosbi i gat tupela soka asosiesen wankain olsem long Lae. Lahi i kamap bikos LFA i wanpela soka asosiesen na i no helpim soka insait long Lae siti.

I gat sampela ripot olsem sampela ol sinia eksekutiv bilong Pot Mosbi Soka Asosiesen i sapotim dispela nupela asosiesen ya.

HENRY MORA-BANG i raitim

MAZDA bai skelim strong bilong Wantoks taim tupela i bung long bikpela gem bilong Pot Mosbi wimens softball resis long Sarere.

Mazda em i stap namba tri long poin lata na biruwa bilong em, Wantoks, i stap long namba tu na AB Bears i bosim namba wan ples.

Dispela gem ya bai pulim planti sapota long lukim bikos tupela tim ya bai resis long husat bai go antap long poin lata.

Long namba wan taim tupela tim i bung, Wantoks i bin win 6-3, olsem na Mazda tu bai laik bekim dinau long dispela win ya.

Mama bilong yet Emma Kalas bai go pas long wantaim helpim i kam long Shirley ToMangana, Tessie Rolly, Dorcas Horris na Alice Kalas.


Long autfil, Mazda bai putim Tara ToMangana, Helen Singiat na Suliana Tongia we ol bai sambai tasol long flai bai.

Dispela ya Mazda i kisim olupela kepten bilong Pot Mosbi Rei Melepia long bringim sampela eksperiens i kam long tim.

Wantoks tu i no nogut. Ol i gat ol pilai olsem Bernadette Uruna, Kolish Banam, Veronica Bagasel husat i save strongim tim long taim nogut na gutpela taim wantaim.

Ol sampela pilai i kam na go tasol tripela pilai wantaim meri olsem Theresa Trawen na Pauline Wakit i stap yet.

Wantok i kisim nupela kosa nau long Andrew Moe. Em i lusim Royals klab na



• Susa ya bilong AB Bears i kaikai tit stret ya las wiken. Sapos yu laik lukim em, kam long Bisini Parade.

Mazda bai skelim strong bilong Wantok

kam joinim tim we i helpim tru tim long surik i go antap long poin lata.

Mista Moe i bringim tupela pikinini bilong em Mathilda na Andrewlar long kam sapotim ol lapun bilong tim.

Planti man i ting olsem dispela gem ya bai strong tru na wanem tim i no mekim asua bai win.

Insait long arapela ol gem, Norths bai winim Chebu, AB Bears bai waraim stret Malangan na All Stars bai mekim save long Gazelle.

Gem namel long All Stars na Gazelle tu

bai wanpela gutpela gem long lukim. Gem ya bai kamap long taim bilong kaikai brekfas so mipela i no kia sapos ol sapota bai kamap o nogat.

All Stars i kisim sevis bilong biknem pitsa bilong Lae Nancy Pala. Em i kisim sapot i kam long ol pilai olsem Iamo Launa, Mona Lisa Leka, ol tripela susa ya Sabati, Freda na Fiore Meso na Anna Worsley na Mary Worsley.

Gazelle i gat ol biknem olsem Jenny Pilak, Mathilda Pondriket, Dorcas Salaiua na Mechtill Tonga junia i stap long holim na strongim tim ya.

Skul soka makim skwat

POT MOSBI Skuls Soka Asosiesen i makim pinis tripela trening skwat bilong en long dispela ya. Ol trening skwat ya em long Anda 17 (man), Anda 18 (meri) na Anda 18 (man).

Siaman bilong Orogen Skuls Soka Salens John Mogi i tok dispela nem ol i putim aut em long las ya. Na bai i gat sampela senis we ol nupela pilai em ol selekta bai putim long lista ya.

Mogi i tok trening bilong dispela trening skwat bai stat long Januari 24 long Sir John Guise stadium long 3 kilok. Ol arapela de bilong trening em long Trinde na Fraide ya.

Em i askim ol skul we ol i ting ol i gat sampela gutpela pilai we i ken stap long trening skwat i mas ringim em o Joe Turia na givim nem bilong ol skul pikinini.

Long bihain astingting bilong School of Excellence program, Mogi i tok ol mangi i mas lainim soka pasin bilong pilai long taim ol i liklik yet. Em i askim papamama we pikinini bilong ol i stap long trening skwat long givim helpim.

Mogi singaut tu i go long ol tisa husat i save givim gutpela sapot long skuls soka long mekim wankain gen long dispela ya.

Las ya Pot Mosbi Skuls Soka i salim tupela tim bilong Anda 11 i go kik resis long Cairns Distrik Soka salens, na ol i kamap wantaim gutpela ripot tru. Na dispela em stat bilong dispela program ya

Trening skwat ya em:

Anda 17 (man)

Haro Mahumu, Warapai Pesat, Clinton Ikwari, Jeremy Mogi, Yomson Sandy, Clive Wavine, Morgan Tokana, Owen, Karo Gorohu (Kila Secondary), Jeffrey Feeger, Tapas Chango, Chique Posman, Meli Kaian, Jethro (POMIS), Obedaiha Modagai (Gerehu High), Nathaniel Lepani (K/Sec), Russel Iwai, Steven Norbert, Peter Polon, Charles Vaso (Sacred Heart) Constantine Iaso, Paul, Russel Murry (Tokarara High School).

Anda 18 (man)

Brian Tuhihana, Abraham Enoch, Kutan Salaiua, Ikara Kanasa, Koto Guina (Kilakila Secondary) Guena Babona, Shaun Katap (POMIS), Adolf Kaian (Ted Diro), Samson Tokiala (DelaSalle), Renspar Baloloi, Rodney Pulu, Noel Hapakos (POM Grammer), Brian Kumasi (Gordons Secondary), Paul Kaniolisi (Tokarara) and Elizah (Coronation).

Anda 18 (meri)

Carol Mwayubu, Samantha Kassman, Melaine Modagai, Elaine Bapal, Elizabeth Kaidon, Loise Posin (S/H), Prisca Davis, Mildred Mabaini (Laloki High) Leonie Paranda (H/R), Alice Sevesoa (Ted Diro), Mariam Wale (POMIS), Weny Sebastian, Rosylin Medabe, Margaret John (P/G) Elaine Mek, Bola Vaia, Annelle Silikara, Vinciancia Auru (Gordon Secondary), Priscial Dole, Decosta Dindillo, Jenny Hileia (GR/H), Isabella Popal, Edith Sebaewa, Joycelyn, Charlin Maget, Ruth, Virginia, Poincham Cholai, Steph Eka (Bavaroko), Lydia Turia, Ruby Lahi, Hipa Eafeare, Gloria Kaniolisi (K/Sec), Robert Kaul, Cassandra Sam, Pleana Waho, Dale Kelep, Dorien Waiko, Sharlin Gawi (Korobosea) Cathy, Sandra Kawia Badhagwa), Wendy (Caritas) and Evelyn Mesiwed (J/V).

Coke sapatim Hailens tim

HAILENS rijonel soka tim i kisim gutpela sapot tru i kam long Coca Cola long redim ol yet long bungim Momase insait long wanpela soka salens we bai kamap long pinis bilong dispela mun.

Coca Cola long Mt Hagen i givim nupela yunifcm, trening bal, ol trening t'siot na hat wantaim K1000 i go long kosa bilong tim, David Chung.

Mista Chung i tok tenk yu long Coca Cola husat i save helpim tru long sapatim soka insait long Hailens rijen.

Tim bilong Halens i wok long tren hat tru long Nesenel Spots Institut. Ol bai stap kem na bihain lusim Goroka na go long Lae long pilaiim namba wan gem long Januari 27. Namba tu gem bai kamap long Januari 28 na las gem bai kamap

long Lae Futbol Pak long Januari 29.

Chung i tok tim bilong em i ken kamapim gutpela salens egensim Momase tim we soka i strong tru ya.

Em i tok soka bilong bihain taim i stap long han bilong ol yangpela bilong nau olsem na sapos ol i kisim gutpela sapot na helpim.

Dispela em i namba wan taim Hailens Soka Asosiesen bai stap insait long dispela kain program long strongim soka insait long rijen.

HSA i bin stat long 1996 long traime developim soka insait long rijen bihain long planti man i lusim ragbi lig na laik pilai soka.

Dispela skwat bilong Hailens i gat 7-

pela pilai bilong Goroka na Mt Hagen. Na foapela senta olsem Wabag, Mendi na Porgera i gat wanpela pilai tasol long skwat.

Tupela biknem pilai bilong Hailens Andy Gole (Wabag) na Robert Upaiga (Mt Hagen) bai go pas long dispela tim. Ful skwat em Mannaseh Panda, Kennedy Yambu, Joe Kolep, Frence Alois, Andy Gole, Pais Tenge, Robert Yoauga, Kon Upaiga, Hanz Apo, Freeman Kamong, Steven Ludwig, Philip Vatpore, Banza Zureke, Roger Evupe, Mukute Mangin, Issac Leslie, Peter Kobuni, Cliffson Issah, Mathias Matu and Jacob Ruben.

Kosa em David Chung, tim menesa em Victor Simon and teknikal edvasia em Edris Kumbuwah.



Wiken Spot Dro

Port Moresby Womens Softball

1999/2000 season proper - Round 2
Saturday 22nd, January 2000

DIAMOND 3

Time	Grade	Team
09:00	B	All Stars vs Gazelle
10:30	C	Admiralty vs Malangan
12:00	A	All Stars vs Gazelle
13:30	A	AB Bears vs Malangan
15:00	A	Norths vs Chebu
16:30	A	Mazda vs Wantoks

DIAMOND 2

Time	Grade	Team
09:00	C	Dolphins vs Wantoks
10:30	C	Norths vs Chebu
12:00	B	Sunkist vs Dolphins
13:30	B	Admiralty vs Mazda
15:00	C	Sunkist vs Sharks

Bye: AB Bears "B"

NCD Public Servants Soccer

Saturday, 22nd January 2000

University Toa One (1)

Time	Div.	Fixtures
08:30	M2	Telikom vs Defence
09:45	W2	Defence vs Telikom
11:00	M2	A/Niugini vs Health
12:05	W2	Health vs A/Niugini
13:05	M2	A/General vs BPNG
14:20	W2	BPNG vs A/General
15:20	M2	NBC vs Works

University Toa Two (2)

Time	Div.	Fixtures
08:30	M1	Cellnet vs DCA
09:45	W1	DCA vs Cellnet
11:00	M1	NPF vs Post PNG
12:05	W1	Post PNG vs NPF
13:05	W1	Teachers vs PNGBC
14:20	M1	PNGBC vs Teachers

Sunday 23rd, January 2000

University Toa One (1)

Time	Div.	Fixtures
08:30	M2	IRC vs NCC
09:45	W2	NCC vs IRC
11:00	W2	Works NBC
12:00	M2	Harbours vs Commerce
13:10	W2	Commerce vs Harbours
14:15	W2	POSF vs Elcom
15:15	M2	Elcom vs POSF

University Toa Two (2)

Time	Div.	Fixtures
08:30	M1	NAQIA vs Fisheries
09:45	W1	Fisheries vs NAQIA
11:00	M1	Transport vs Police
12:05	W1	Police vs Transport
13:05	W1	NSO vs Education
14:20	M1	Education vs NSO

Bye: Pool One NCDC (Man/Woman) Pool Two UPNG (Man/Woman)

NCDPSSA points ladder - week nine
January 17, 2000

MENS POOL ONE

Team	GP	W	D	L	GF	GA	PTS
NPF	9	6	1	2	15	11	19
PNGBC	8	5	3	0	12	5	18
Education	8	5	1	2	12	7	16



• Skallain ragbi tim husat i save pilai long Pot Mosbi Ragbi yunion resis. Ol i bin lus long Biksi Raiders 12-5.

Police	9	5	1	3	13	9	16
Fisheries	9	4	2	3	13	8	14
Teachers	8	4	2	2	10	8	14
Cellnet	9	4	1	4	8	5	13
Post PNG	9	3	4	2	14	14	13
NSO	8	2	3	3	5	6	9
DCA	9	2	2	5	9	15	8
NAQIA	8	2	1	5	4	10	7
NCDC	9	2	1	6	7	14	7
Transport	8	1	2	5	6	10	5
Pangtel	3	0	0	3	0	6	0

MENS POOL TWO

Air Niugini	7	7	0	0	17	3	21
A/General	8	6	1	1	16	4	19
BPNG	9	5	3	1	12	8	18
Elcom	8	4	3	1	15	6	15
POSF	8	3	2	3	9	6	11
Defence	9	3	2	4	7	11	11
UPNG	9	3	2	4	10	15	11
Telikom	7	3	1	3	8	7	10
NCC	8	3	1	4	9	10	10
Works	7	2	3	2	7	7	9
Harbours	7	2	2	3	5	8	8
Health	8	2	1	5	8	16	7
Commerce	9	2	1	6	8	17	7
IRC	7	1	1	5	6	11	4
NBC	7	1	1	5	4	12	4

WOMENS POOL ONE

Education	8	6	2	0	12	0	20
-----------	---	---	---	---	----	---	----

Police	9	6	1	2	13	6	19
Teachers	7	5	2	0	6	0	17
NPF	9	5	2	2	8	5	17

Cellnet	9	5	1	3	11	9	16
Fisheries	9	2	4	3	10	9	10
PNGBC	7	3	0	4	6	6	9
NAQIA	8	2	3	3	6	7	9
NCDC	7	2	1	4	6	8	7
Transport	7	1	4	2	4	9	7
NSO	7	1	2	4	7	8	5
DCA	8	1	2	5	4	11	5
Post PNG	8	0	4	4	3	12	4
Pangtel	3	0	0	3	0	6	0




WOMENS POOL TWO

BPNG	9	6	3	0	11	1	21
UPNG	9	6	2	1	12	2	20
Defence	9	5	3	1	20	4	18
A/General	8	5	3	0	13	0	18
POSF	8	5	0	3	7	7	15
Works	8	4	2	2	8	6	14
Telikom	8	3	4	1	7	1	13
Elcom	8	4	1	3	8	5	13
IRC	8	3	2	3	8	5	11
Harbours	8	2	1	5	5	10	7
Health	9	2	1	6	6	16	7
Air Niugini	8	2	0	6	4	14	6
Commerce	9	2	0	7	4	18	6
NBC	8	1	2	5	3	13	5
NCC	9	1	0	8	2	16	3



ZENAG - Gutpela kiau

WANTOK SPOT



• SUSA bilong BPNG (lephan) i putim was long pilaia Air Niugini husat i banisim bal gut ya. Tasol wok o go krangi na BPNG wilwilm Air Niugini 3-0. Foto: Issac Ikuavi.

Abai i mekim stronpela ran long namba wan kompetisen

SEMPION rana Clement Abai i mekim namba wan resis bilong em ias wik long Niu Yok siti long Amerika.

Tim bilong em long Tulane Yunivesiti i bin go stap long dispela resis we em i ran long 800 mita na tu 400 mita.

Insait long 800 mita, taim bilong em i bin kamap olsem 1minit na 56 sekens, na long 400 mita relai, taim bilong em i kamap long 49 sekens.

Hetkosa bilong Tulane Yunivesiti tim Ron Bazil i tok olsem Abai i sindaun gut na kamap gut long trening bilong em.

Arapela bikpela resis nau em The Terrier Classics we bai kamap long Boston Massachusetts long Januari 29-30.

Mista Bazil i tok olsem olgeta resis ya i stap insait long haus ya namel long mun Januari i go long Mas. Na bihain long mun Mas, ol bai resis ausait na bai redim ol yet long bikpela US Koles (NCAA) sempionsip we bai kamap long mun Jun.

Kompetisen we bai kamap long narapela 5-pela mun bai karamapim olgeta hap bilong bikpela Amerika we Abai bai gat sans long go long olgeta siti ya.

Ol sampela siti we resis bai kamap em Coral Gables (Miami), Indianapolis, Philadelphia, Tuscaloosa (Alabama), Houston (Texas), Milwaukee, Boise (Idaho), Seattle (Washington) na Palo Alto (California).

Taim Abai i stap long Yunivesiti long Tulane, em bai skul long media arts. Na yet em i stap wantaim wanpela long distans rans na tupela arapela studen i stap long wanpela rum ya.

Gutpela kosa na referi long strongim ragbi yunion

RAGBI yunion insait long kantri bai kisim gutpela sapot i kam long ol referi na kosa long traim mekim gem i kamap bikpela.

Dispela em wanpela tingting bilong nesenel kosing dairekta Jack Takavis husat i bin mekim dispela wok klostu long 20 krismas nau.

Mista Takavis i tok dispela wok long kamapim gutpela referi na kosa i no bilong ol bikpela senta olsem Lae na Port Mosbi tasol, nogat em bilong olgeta rurel senta tu we i gat ol nesenel pilaia.

"Mipela i bin kisim planti ol pas i kam long ol senta husat i laik statim ragbi yunion kompetisen. Na tu i gat planti ol pas i kam long ol senta i gat kompetisen pinis long kisim sapot

long trening, na mi ken tokaut olsem dispela ol samting bai kamap nau," Takavis i tok.

Long Pot Mosbi yet, bai i gat wanpela level wan referi na kosa klinik i kamap long tupela wik taim.

Na arapela gutpela nius bilong ol arapela senta em nesenel toua bilong referi na kosa bai kamap long mun Februari na karamapim ol senta olsem Daru, Goroka, Mt Hagen, Kavieng, Rabaul na kamap long Lae. Long Lae em bai kamap wankain taim olsem nesenel 7's sempionsip.

Takavis i tok dispela kos bilong level 1 em bilong ol junia level we ol referi na kosa bai lainim ol skul bilong ragbi yunion.

Taim ol i pinisim Level 1 kos, ol rijonel opisa bai lukluk na glasim wok bilong ol dispela lain long karim aut skul long anda 19.

"Nau yet mipela i save olsem planti ol kosa na referi i wok long lukautim o kosim klab bikos ol i gat eksperiens olsem pilaia. Wok nau PNGRFU i laik mekim em long mekim ol dispela kosa na referi i mas klia gut long kain wok ol i mekim kamapim gutpela ol pilaia," Takavis i tok.

Dairekta bilong PNGRFU referi na kosa i tok bikpela amamas long gutpela wok bilong PNGRFU edministresen na tu menesemen long kamapim gutpela wok na to statim gen skulbois kompetisen.

**Em i Gutpela
Em i Tuna
Em i bilong
PNG stret...**



- ◆ Tuna kam long solwara bilong Papua Niugini Stret.
- ◆ 100% tuna mit stret, nogat bun na nogat skin.
- ◆ Planti mit istap long olgeta tin.
- ◆ Nambawan tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- ◆ Prais inap tru long yu baim.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.